

ବସନ୍ତ ରାଗ

শ୍ରীশচীন্দ্রনাथ बन्द्योपाध्याय
स्नेहसिन्धु

ভারতবর্ষের দক্ষিণ-পূর্ব উপকূলে পঞ্চপাণ্ডবের পঞ্চ রথ এবং বিরাটকায় প্রস্তুত হস্তী সমৃদ্ধ ভীৰ্হুল মহাবলীপূরম ও উত্তরে মাদ্রাজের কাছাকাছি একটি স্থান। ১৮০৩ খৃষ্টাব্দ। মাদ্রাজ তখন নামে মাত্র শহর, প্রকৃতপক্ষে কয়েকটি গ্রামের সমষ্টি। দক্ষিণ-পূর্ব দিকে—প্রায় সমুদ্রতটে একটি সুন্দর তপোবনের মত আশ্রম। সুন্দর সুগঠিত,—কি বলব, বাড়ি? না, বাড়ি বলতে যা বোঝায় তা নয়, তবে কুটির? না তাও নয়। কুটির বলতে যা বোঝায় তা থেকে অনেক সমৃদ্ধ; এবং বাড়ি বলতে যা বোঝায় তা থেকে আয়তনে আকারে স্থান-সম্মুখানে অনেক ছোট। চারটি পাথরের থামের মাথায় পাথরের ছাদের একটি ছয় হাত প্রস্থ বারো হাত দীর্ঘ বারান্দা, তার কোলে এমনি আয়তনেরই একখানি ঘরকে দুখানি করে নেওয়া হয়েছে; একখানি ছোট, একখানি বড়। সামনে ঘন বৃক্ষবেষ্টনীর মধ্যে কয়েক কাঠা পরিমিত জমিতে পরিচ্ছন্ন একটি উত্থান। কিছু দূরেই নারিকেল তাল গাছের সুদীর্ঘ সারি, তারই কোলে মহাসমুদ্রের বেলাভূমি। গাঢ় কৃষ্ণাভ নীল সমুদ্র-তরঙ্গ সাদা কেনা মাথায় নিয়ে কলকল্লোল তুলে আছড়ে এসে ঝড়ছে। তরঙ্গদ্বীপে রৌদ্রচ্ছটা বিকমিক করছে। অবিরাম কল্লোল ধ্বনিতে মূর্খিত।

বারান্দায় ঘরে সজ্জার উপকরণ স্বল্প কিন্তু শেগুলি বড় সুন্দর ও পরিচ্ছন্ন। ছোট ঘরখানির পাশেই অল্প একটু, হুতো বা দশ হাত পরিমিত স্থান তাকাতে আর একখানি ঘর। নারিকেল পাতায় আচ্ছাদিত একখানি মাটির ঘর। বেশ সুগঠিত ও পরিচ্ছন্ন। সামনে দুটি হুটপুট ধবলাঙ্গী গাভী রোমন্থন করছে।

একটি আশ্রম, সত্যিই একটি আশ্রম। নির্জন পরিবেষ্টনীর মধ্যে এমন মনোরম পরিচ্ছন্ন স্বল্পায়তন গৃহকে আশ্রম ছাড়া কিছু বলাও যায় না। আজ কিন্তু স্থানটি নির্জন নয়। বারান্দায় এবং বারান্দার সামনে উত্থানের মধ্যে বহু জনের ভিড়। উত্তেজিত অথচ চাপা কোলাহল কোন অতিকায় মধুচক্রের উত্তেজনা-চঞ্চল মধুমক্ষিকার গুঞ্জন-ধ্বনির মত ধ্বনিত হচ্ছে। প্রতিটি লোকই মূগ্ধ—চাপা গলায় প্রত্যেকে কথা বলছেন। স্বর অল্পটুকু কিন্তু সুরে উত্তেজনা রয়েছে—উত্তপ্ত বায়ুস্পর্শের মত স্পষ্ট। কিন্তু একটি কথা বা শব্দও বোঝা যায় না—হু জনের উচ্চারিত কথায় কথায় জড়িয়ে সব দুর্বোধ্য হয়ে পড়েছে এবং অদূরবর্তী সমুদ্র-কল্লোলের ধ্বনি তার উপর একটি আবরণ টেনে দিয়ে তাকে আরও অস্পষ্ট করে তুলেছে। শুধু মনে হচ্ছে—একটি হায় হায় হায় হায় আক্ষেপ সব কিছুর মধ্যে। উদাস সমুদ্রের একটানা ধ্বনির মধ্যেও, এবং এই কথাবার্তার চাপা কণ্ঠস্বরের মধ্যেও।

জনতার পিছন দিকে দূরে আশ্রম-প্রবেশ-পথের বাঁদিকে—যে দিকে ঐ গাভী দুটি বাঁধা ছিল—সেই দিকে বিষণ্ণতায় যেন আচ্ছন্ন হয়ে যান মুখে দাঁড়িয়েছিল শূদ্রকন্ডা লল্লা। মনে হচ্ছিল যেন রৌদ্রতাপক্লিষ্ট একটি শ্রামলতা। রৌদ্রম্লান পাতার মত তার সারা অঙ্গপ্রত্যঙ্গে ক্লিষ্টতার চিহ্ন। নির্বাক হয়ে সে শুনবার চেষ্টা করছিল, কে—কি বলছে!

এসেছে বহুজন। ব্রাহ্মণ শূদ্র—সকলেই কিন্তু প্রতিষ্ঠাবান এবং বিদগ্ধজন। কারও প্রতিষ্ঠা বেশী, কারও কম। বৈদগ্ধ্যও তাই। যার সেমন বেশী প্রতিষ্ঠা সে-ই তেমন আগে দাঁড়িয়েছে, স্বাভাবিক ভাবে। লল্লা দাঁড়িয়ে আছে একা—সকলের পিছনে। সে-ই শুধু নির্বাক—শুধু শুনছে।

আরও একজন নির্বাকী। অর্ধশায়িত অবস্থায় নির্বাক হয়ে শুয়ে আছেন—দক্ষিণের বিখ্যাত সঙ্গীতজ্ঞ সুকণ্ঠ গায়ক বীনকার রজনাতন,—বৈষ্ণব সঙ্গীতাচার্য রজনাতন। তিনিও নির্বাক হয়ে শুনছেন। তাঁর কপালে আঘাত-ক্ষতকে আবৃত করে বেশ পুরু কাপড়ের আবরণী বাঁধা, মুখ

চোখ ফুলেছে একটু। তিনিও র্লিষ্ট।

তিনি আহত। তাই এত লোকের সমাগম। মহাশুণী আচার্য রত্ননাথন। সুরের জাহ্ন-
কর। কণ্ঠস্বর বংশীধ্বনির মত। শুধু তাই নয়, নিজেই তিনি গীত রচনা করেন—নিজেই
সুরারোপ করে বীণা বাজিয়ে গেয়ে বেড়ান। বড় বড় মন্দিরের প্রাঙ্গণে গিয়ে প্রথম তাঁর নূতন
গান দেবতাকে শুনিয়ে আসেন; তারপর রাজার ধনীর নিয়ন্ত্রণ গ্রহণ করেন। মন্দিরের
পুরোহিতেরা তাঁর নূতন গানের সংবাদ পেলেই তাঁকে নিয়ন্ত্রণ পাঠান; তিনি পত্রখানি মাথায়
ধরে বলেন—শিরোধার্য—গিয়ে বেলো, যথা সময়ে উপস্থিত হব। মন্দির-প্রাঙ্গণে আসর পড়ে,
দীপাধারে উজ্জল আলো জালা হয়—তৈলদীপ, বর্তিকা, সুগন্ধি ধূপশলাকা জলে। চারিপাশে
হাজার হাজার শ্রোতা সমবেত হয়। নিরমাত্মযায়ী শূদ্রেরা অচ্ছুরে দূরে দাঁড়িয়ে শোনে।
তাঁর বীণা বন্ধার দেওয়া মাঝেই মোহের সঞ্চার হয় শ্রোতার মনে। বীণা গল্পপূত নয়, বন্ধারের
মধ্যেও কোন জাহ্ন নেই। কিন্তু তাঁর গান যারা পূর্বে শুনেছেন—তাঁদের মনে জেগে ওঠে পূর্ব
স্মৃতি; তাই করে মোহের সঞ্চার, যারা নূতন তাঁদের মনে এর ছোঁয়াচ লাগে। তিনি আলাপ
শুরু করেন। কণ্ঠস্বর—বীণার বন্ধারের সঙ্গে মিশে কিন্তু সত্যিই মোহ সৃষ্টি করে। স্বর এমন
মধুর অথচ বলিষ্ঠ। ভারতবর্ষের সানাইয়ের সুর ওঠে যেন। তারপর গান শুরু হয়। গানও
রত্ননাথনের নিজের রচনা। তাঁর মধ্যেও আছে এক নূতন ভাব ও ভাবনার প্রকাশ।

প্রতিবারই তাঁর বীণায় তিনি আঙুলের কোশলে প্রথমেই শব্দ তোলেন—ঝম। যারা
সঙ্গত করে তারাও করতাল ধ্বনিত মৃদঙ্গ শব্দে অতুরূপ ধ্বনি মিশিয়ে দেয়। তারপর তিনি
গেয়ে ওঠেন—অনাদি সৃষ্টির আদিতে নিস্তরঙ্গ শব্দের মধ্যে প্রথম নটরাজ চরণপাতে তাঁর নূপুর
বন্ধারের মধ্যে জন্ম নিল ধ্বনি। বিশ্বের সকল ধ্বনিই সঙ্গীত। প্রলয় তাণ্ডবের ভীম ভয়ঙ্কর
নিনাদ থেকে ব্রজের বংশীধ্বনি, যুদ্ধক্ষেত্রের আর্তনাদ হাজার থেকে বেতসকুঞ্জে প্রণয়ী যুগলের মৃদু
গুঞ্জন—আকাশের মেঘ গর্জনের বজ্রনাদ থেকে কোকিলের কুহুরব—সঙ্গীত-বন্ধার সবার মধ্যেই।
সব আছে এবং জন্ম নেয় নটনাথের নূপুরপাতে। হে নটনাথ—তা থেকেই প্রসাদস্বরূপ আহরণ
করেছি এই যৎকিঞ্চিৎ সুর ও সঙ্গীতকণা। তাই আবার নিবেদন করি নটনাথ, নটরাজ,
তোমারই চরণে।

এটুকু তাঁর প্রতিটি সঙ্গীতের বা তাঁর সঙ্গীত সাধনারই ভূমিকা। বঙ্গদেশে এমন ভূমিকার
নাম চৈতন্তের আবির্ভাবের পর থেকে গৌরচন্দ্রিকা। ভারতীয় কাব্যশাস্ত্রে এর নাম বন্দনা।
মহাভারতে ব্যাসদেব শুরু করেছেন—

“নারায়ণং নমস্কৃত্য নরঞ্জেব নরোত্তমম্—দেবীং সরস্বতীঞ্জেব ততো জয়োমুদীরয়েৎ।”

রত্ননাথনেরও এটুকু তাই। এদিক দিয়ে তিনি মহাভারতের অতুরাঙ্গী এবং মহাভারত-
কারের অতুসরণকারী। তারপর আরম্ভ হয় আসল গান। পুরাণ থেকে কাহিনী নিয়ে তিনি
গান রচনা করে তাই গেয়ে থাকেন। পালা গানের মত। কিন্তু গায়ক তিনি একক। মধ্যে
মধ্যে স্বতন্ত্রধারের মত কাহিনীর স্রষ্টা টেনে নিয়ে যান। আবার উপনীত হন সঙ্গীতে। যতক্ষণ
গান করেন ততক্ষণ শ্রোতার মস্তিষ্ক বা স্বপ্নাচ্ছন্ন হয়ে থাকে। বৃকের মধ্যে নানা ভাবভরঙ্গ
অবিরাম উচ্ছ্বসিত হয়—করমণ্ডল বেলাভূমের সমুদ্রের মত। লোকেও তাই বলে। সমুদ্রতটবাসী
মাতৃশৃগলি সমুদ্রকে বড় ভালবাসে;—তারা সমুদ্র-শব্দের অলঙ্কার পরে, তাই দিয়ে কত শিল্প
রচনা করে, তটভূমের নারিকেল কল ও বৃক্ষ তাদের সম্পদ,—বেদনার’আনন্দে তারা বেলাভূমে
গিয়ে বসে, সমুদ্রকল্লোলে হৃদয়ের প্রতিধ্বনি শোনে, সমুদ্রের বাতাস তাদের নিদ্রা আনে, সমুদ্রের
ঝড় তাদের ঘর উড়িয়ে ভাসিয়ে দেয়; সমুদ্রের নীলকঙ্কাল বর্ণের আভা তাদের অঙ্গলাবণ্যে

সুখমা সঞ্চার করে ; জীবনের উপমায় সমুদ্র তাদের রত্নাকর । সকালের সমুদ্র, দ্বিপ্রহরের সমুদ্র, সন্ধ্যার সমুদ্র, রাত্রের সমুদ্র, উজ্জ্বলিত সমুদ্র, শান্ত সমুদ্রেই তাদের জীবনের প্রতিবিম্ব দেখতে তারা অভ্যস্ত । ভাবোজ্জ্বলিত হৃদয়ের উপমা তাদের সমুদ্রে । রজনীনাথনের গান যখন তারা শোনে—তখন তাদের হৃদয়ের উপমা রাতের সমুদ্রের মত । শুধু তরঙ্গের পর তরঙ্গ । অস্ত চিন্তার একটি নৌকাও তখন থাকে না । তারপর কখন গান শেষ করেন রজনীনাথন । বীণাটি পাশে রেখে দেন । হাত জোড় করে বলেন—ক্রটি বিচ্যুতি সব ক্ষমা কর । আপনারাও করুন—আপনারা শ্রোতা, আপনারা দেবতা ।

এতক্ষণে শ্রোতারা যেন মোহমগ্নতা থেকে মুক্ত হয় । তারা সমবেত স্বরে ধ্বনি দিয়ে ওঠে—জয় রজনীনাথন !

রজনীনাথন হাত তোলেন—না ।

শুভ্র হয়ে যায় শ্রোতারা সবিস্ময়ে ।

রজনীনাথন বলেন—না । বলুন—জয় বিশ্বরজ-পতি রজনীনাথন,—নটরাজ শিব জয় ! •

এই রজনীনাথন । লোকপ্রিয় রজনীনাথন । সুন্দর রজনীনাথন । মধুরপ্রকৃতি সঙ্গীতসাধক রজনীনাথন ।

এই গুণী গীতিকার লোকপ্রিয় রজনীনাথন গত রাত্রে মাদ্রাজ শহরে এক বর্ষিষ্য শ্রেণীর নিমন্ত্রণে গান করতে গিয়েছিলেন, কিরাতাজুর্নীর উপাখ্যান । প্রত্যাবর্তনের পথে একদল অজ্ঞাত আততায়ী পথের মধ্যে আক্রমণ করে তাঁর মাথায় আঘাত করেছে । তিনি আহত হয়েছেন । রাত্রের অন্ধকারে মাথায় আঘাত করে তারা অন্ধকারে মিলিয়ে গেছে । স্বপ্ন কয়েকজন সঙ্গী ছিল, তারা তাঁকে কোন রকমে বয়ে এখানে এনেছে ।

ঘরের মধ্যে তিনি একখানি কাঠাসনের উপর বিছানো শয্যায় গোলাকার একটি উপাখ্যানের উপর চৈস দিয়ে অর্ধশায়িত অবস্থায় বসে আছেন । হাতের কাছে বীণাটি রয়েছে । একখানি হাত বীণার তারের উপর অলস বিশ্রামে পড়ে আছে । কপালের ক্ষতস্থান পরিচ্ছন্ন বস্ত্রখণ্ড দিয়ে বাঁধা । রক্তের একটি স্রাব রেখার চিহ্ন দেখা যাচ্ছে । রক্ত এখনও সম্পূর্ণরূপে বন্ধ হয় নি । সারা মুখে একটি বিষন্ন বেদনার ছায়া পড়েছে । দৃষ্টিও তাঁর উদাস বিষন্নতায় আচ্ছন্ন, সামনের জানালার ভিতর দিয়ে আকাশের নীলিগার মধ্যে যেন সাঙ্ঘনা খুঁজে কিরছে । তাঁর শয্যার সামনে মেঝের উপর বিস্তৃত আসনে বসে আছেন এখানকার কয়েকজন অতিবিশিষ্ট ব্যক্তি । এখানকার শাসনকর্তার প্রতিনিধিও রয়েছেন তাঁদের মধ্যে । আরও যারা আছেন তাঁরা স্থানীয় বিশিষ্ট ধনী ব্যবসায়ী, বিশিষ্ট চিকিৎসক, কয়েকজন পণ্ডিত ব্রাহ্মণও রয়েছেন, ব্রাহ্মণেরা স্বতন্ত্র আসনে বসে আছেন অবশ্য ।

মৃদু স্বরে কথা চলছে ; একটি কথাই বিভিন্ন ভঙ্গিতে বলছেন সকলে—এ অরাজক । এতবড় অশ্রায় আর হয় না । বর্বরতার চূড়ান্ত ।

ব্রাহ্মণেরাও তাই বলছেন ; কিন্তু তাঁদের প্রকাশভঙ্গি অতি কঠোর, অতি রূঢ় । বলছেন—এ পাপ । মহাপাপ । বিধর্মী রাজশক্তির উদাসীনতাই এর কারণ । কিন্তু দেবতা ক্ষমা করবেন না ।

রাজপ্রতিনিধি শ্রীনিবাসন প্রশ্ন করে উত্তরের প্রতীক্ষায় রজনীনাথনেরই মুখের দিকে তাকিয়ে—ছিলেন, কিন্তু রজনীনাথন সেই উদাস দৃষ্টিতে আকাশের দিকে তাকিয়ে নিরন্তর হয়ে বসে আছেন । ব্রাহ্মণদের কথা শ্রীনিবাসনের কানে যেতেই তিনি অ কুক্ষিত করে আবার প্রশ্ন করলেন—বলুন আচার্য, আততায়ীদের কাউকেই কি আপনি চিনতে পারেন নি ?

একটা দীর্ঘনিশ্বাস কেলে রঙ্গনাথন ঘাড় নাড়লেন—না।

—কাল ছিল তিথিতে ত্রয়োদশী, আজ রাত্রে পূর্ণিমা, আকাশেও মেঘের লেশ ছিল না। পরিপূর্ণ জ্যোৎস্নার মধ্যেও আপনি চিনতে পারলেন না! আশ্চর্য!

পণ্ডিত চিদম্বরম এতক্ষণ চুপ করে বসেছিলেন, এবার বলে উঠলেন—আপনি রাজপ্রতিনিধি হয়ে ব্রাহ্মণ-প্রকৃতি বিশ্বৃত হয়েছেন শ্রীনিবাসন। রঙ্গনাথন ব্রাহ্মণ এবং গায়ক। সম্ভবত ভয়ে তাঁর চোখের সামনে গত্রাত্তির এমন জ্যোৎস্নালোক গাঢ় অন্ধকারে পরিবর্তিত হয়েছিল। ভয়ে বোধ করি উনি চক্ষু মুদ্রিত করে ছিলেন।

তাঁর কথার মধ্যে শ্লেষ যেন রণ-রণ করছিল।

এবার একটু বিষন্ন হাশ্বের সঙ্গে রঙ্গনাথন বললেন—আচার্য চিদম্বরম, অম্বর চিয়র হলে তাতে তার স্বরূপ আবৃত হয় না, কিন্তু মুক্তিকা-জাত কার্পাস থেকে তৈরী বস্ত্রে তারা অতি সাধারণে তাদের স্বরূপকে আবৃত করে ছিল। এবং আমিও কিছু অশ্রমবস্ত্র ছিলাম। সঙ্গীরা পশ্চাতে পড়েছিল। সুতরাং সঠিক চেনা তো সম্ভবপর হয় নি!

রাজপ্রতিনিধি শ্রীনিবাসন বললেন—তারা তো কিছু যেন বলেছিল আপনাকে! কি বলেছিল?

—হ্যাঁ বলেছিল। এই বিকৃত ব্যাখ্যা কোথা থেকে পেলে তুমি?

চিদম্বরম বললেন—তাদের বাক্যবিশ্বাস—উচ্চারণ—

বাখা দিয়ে রঙ্গনাথন বললেন—তাঁরা ব্রাহ্মণ নন আচার্য। অবশ্য গ্রাম্য মূর্খ ব্রাহ্মণের তো অভাব নেই দেশে। বাক্‌ভঙ্গি, উচ্চারণ দিয়ে সিদ্ধান্ত করা দুঃসহ। কিন্তু তবুও তাঁরা ব্রাহ্মণ নয়।

চিদম্বরম বললেন—সম্ভ্রষ্ট হলম রঙ্গনাথন। তোমার গানে তুমি পুরাণের যে ব্যাখ্যা করেছ তাতে তুমি আঘাত করেছ ব্রাহ্মণদেরই। তোমার প্রেম সহানুভূতি ওই সকল ক্লমকায়দেরই উপর। ব্রাহ্মণদের মধ্যেও মূর্খ অবশ্যই আছে। তবুও তোমার এই সিদ্ধান্তের জন্ত আমি প্রীত। তার কারণ এ নয় যে তুমি ব্রাহ্মণদের সন্দেহ কর নি—নিছক প্রীতির বশে বা ভয়ে। ব্রাহ্মণ-প্রকৃতির সভ্য তুমি উপলব্ধি করেছ।

শ্রীনিবাসন বললেন—আপনি কি কাউকে সন্দেহ করেন না? বগ্নস্বর আকারে আয়তন এগুলি তো বস্ত্রাবরণের ছদ্মবেশে ঢাকা যায় না!

বেশ একটু চিন্তা করে নিয়েই যেন রঙ্গনাথন বললেন—না।

দৃষ্টি তাঁর সেই জানালা দিয়েই বাইরে নিবদ্ধ। বাইরে গোশালার ধারে বিষন্ন ক্লিষ্ট শ্রাম-লতার মত শূদ্রকন্ঠাটি গোশালার কাঠের খুঁটিটা ধরে দাঁড়িয়েই আছে। বিষন্ন বেদনাচ্ছন্ন মুখ—চোখে যেন জল টলটল করেছে। তিনি ওকে চেনেন। বড় ভাল মেয়ে। এখান থেকে অল্প দূরেই ওদের বাস। কন্ঠাটি সুকণ্ঠী। অন্ধ মায়ের হাত ধরে গান গেয়ে ভিক্ষা করে বেড়াত এই কিছুদিন পূর্বে পর্যন্ত। তাঁর সম্মুখে বা কাছে বিশেষ আসে নি। ভয়ে আসে নি—অধর্মের ভয়, শাসনের ভয় এবং লজ্জার ভয়ও বটে। গান তাঁর সামনেও কখনও গায় নি। এই সুকণ্ঠী কিশোরীর দূরগত সঙ্গীতধ্বনি শুনে তাঁরও কখনও কখনও ইচ্ছা হয়েছে ডেকে ওর গান শোনে। কিন্তু সামাজিক অলুশাসন এবং মর্ধ্যদার সন্ধোচে ডাকতে পারেন নি। তার দু-চারদিন পরই হয়তো বিশ্বৃত হয়েছেন। এক মাস আগে সমুদ্রতটে একদিন ওর সঙ্গে ক'টি কথা বলেছিলেন। তারপর আর এদিকে আসে নি। কাল রাত্রে ওকে দেখেছিলেন। গানের সময় অনেক দূরে চক্করের বাইরে জনতার প্রথম শ্রেণীতে একটি কাঠের দীপদণ্ডের সামনেই যেন ও দাঁড়িয়ে ছিল।

তার দৃষ্টি আকর্ষণ করেছিল ওর চোখের অশ্রুধারা। আজও এসেছে—তার আঘাতের কথা শুনেই এসেছে। 'নইলে এতটা নিকটে তাঁর আশ্রমের মধ্যে প্রবেশ করে গোশালার খুঁটি ধরে ও দাঁড়াতে সাহস করত না। আজও ওর চোখে জল।

শ্রীনিবাসন বললেন—এ না—কি না রজনাক্ষন ? আমি বললাম মাহুঘের কর্ণস্বর আকার আয়তন এগুলি বস্তাবরণের ছদ্মবেশে ঢাকা পড়ে না। আপনি 'না' বলে তাই সমর্থন করেছেন ?

রজনাক্ষন বললেন—মাননীয় শ্রীনিবাসন, আমি আপনার দুটি বাক্যাংশের উত্তরেঃ না বলেছি। আপনার বুদ্ধি সত্য—ছদ্মবেশে আকার আয়তন ঢাকা যায় না ; একে সমর্থন করেও বলেছি—না। আবার কাউকে সন্দেহ করি কি না এর উত্তরেও বলেছি—না, কাউকে সন্দেহ করি না।

চিদম্বরম বললেন—অজ্ঞাত আঘাতকারী এবং রজনাক্ষন অসাধুতার এবং সাধুতার দুই দূরতম প্রান্তে অবস্থান করেন শ্রীনিবাসন। রেখাটি কাল অকস্মাৎ গোলাকার হতেই মুহূর্তের জ্ঞান পরম্পরের নিকটতম স্থানে পৌঁছে সংঘর্ষ হয়েছে—তারপরই আবার সরলরেখার দূরতম প্রান্তে চলে গেছে। সূত্রাং সাধুতার উচ্চতম বা শেষতম বিন্দুতে স্থিত রজনাক্ষন অসাধুতম ব্যক্তিকে দেখেও চেনেন নি, কর্ণস্বর শুনেও শোনেন নি, জেনেও জানেন না। অবাস্তুর প্রশ্নে লাভ নেই।

রজনাক্ষন এবার বললেন—আচার্য চিদম্বরম, প্রণাম আপনাকে, অহুমান অশ্রান্ত আপনার। শুধু আমি সাধুতার শেষতম বা উচ্চতম বিন্দুতে পৌঁছেছি এটুকুটি প্রতিবাদ করি। আচার্য, যে পাণ্ডিত্য সাধুতার শেষতম বিন্দুর পথ বলে দেয়—তা আমার নেই। বোধ করি আপনি ওই বিন্দুতে থেকে পথের মাঝখানের যে রেখাটি ঠিক সন্দেহের গভীর অতিক্রম করতে পারেন না—তার অন্তরটি দেখতেও পারছেন না, বুঝতেও পারছেন না। আচার্য, আঘাত আমার সত্য। বেদনা দুঃখ সত্য। রক্তপাত তার সাক্ষী। যারা ঘেরেছে তারা ব্রাহ্মণ নয় এও সত্য। কিন্তু তারা মারলে কেন আমাকে ? আমি তো তাদের আঘাত করি নি। আমার শত্রু বলে কাউকে তো মনে করতে পারছি না।

—তুমি উদার। তাই বা কেন—উদারতম ব্যক্তি। তুমি শবর চণ্ডালও ব্রহ্মবিদ হতে পারে বলে বিশ্বাস করেছ।

—আমি মহাভারত থেকে উপাখ্যান নিয়েছি আচার্য। মহর্ষি বেদবাস স্বয়ং এ সত্য মহাভারতের অঙ্গীভূত করেছেন। কেবল দুটি বিভিন্ন অংশকে আমি একত্রিত করেছি। কিরাতাজুর্নীয় উপাখ্যানের আগে ধর্ম ব্যাধ উপাখ্যানের সারমর্মটুকু ভূমিকাস্বরূপ জুড়ে দিয়েছি।

—কিন্তু তার ব্যাখ্যা সে তোমার নিজস্ব। “কৃষ্ণচর্ম চর্মের অন্তরালে যিনি বসবাস করেন তিনিই বসবাস করেন বৈকুণ্ঠে। যিনি বসবাস করেন বৈকুণ্ঠে তিনিই বাস করেন শবর পল্লীতে, সকল পতিত পল্লীতে, ওই ওদের মধ্যে ওদের কৃষ্ণচর্মের অন্তরালে। কৈলাসে যিনি বাস করেন ভবানীপতি, তিনিই আছেন ওদের মধ্যে। ওদের কৃষ্ণচর্ম দেখে যদি তোমার ঘৃণা হয়, ওদের পল্লীর অপরিচ্ছন্নতা, কটু গন্ধে যদি তোমার বিধা হয় কাছে যেতে, তবে তোমার জানা হবে না তাঁকে। ব্রাহ্মণ তনয়, তুমি ব্রহ্মাভিলাষী—ক্রোধে ঘৃণায় অহঙ্কারে শিক্ষার মধ্যে তোমার জানা হয় নি ব্রহ্মকে। আমি নারী, আমার ধর্মে আমি অধিষ্ঠিতা। আমার যিনি পতি তিনি শুধু আমার পূজ্যই নন তিনি আমার প্রিয়, প্রিয়তম। তাঁর সেবা আমার ধর্মই শুধু

নয়, সেই আমার জীবনধর্ম, সেই আনন্দ যার স্বাদে আর ত্রেকের স্বাদে প্রভেদ নেই। তুমি তাতে আমার উপর ক্রুদ্ধ হলে। সে ক্রোধে কোন ক্ষতি হয় নি বা হবে না আমার। সুতরাং তোমার পরম সত্য পরম তত্ত্বকে জানা সম্পূর্ণ হবে ব্যাধ-পল্লীতে ব্যাধ-ধর্মে অধিষ্ঠিত ধর্ম ব্যাধের কাছে। ঘৃণা করো না, নাসিকা কুঞ্জন করে প্রবেশপথে দাঁড়িয়ে থেকো না, প্রবেশ করো। তুমি কি জান ভবানীপতি মহারুদ্র কিরাত রূপেই দেখা দিয়েছিলেন তপস্রাপারায়ণ অর্জুনকে? অর্জুন কিরাত বলে অবজ্ঞা করেছিল, ঘৃণাও করেছিল, কিরাতরূপী ভগবান তাঁর সে শক্তির অবজ্ঞা চূর্ণ করেছিলেন। হিমগিরির কাঞ্চনজঙ্ঘার স্বর্ণচ্ছটায় প্রতিভাত স্বর্ণকাস্তি কিরাত নীলগিরিতে যখন আসেন তখন তিনি সুনীল সমুদ্রলাবণ্যে অবগাহন করে হন নিবিড় নীলকাস্তি।” এ তো তোমারই ব্যাখ্যা রজনাতন।

—আমি কি ভ্রান্ত বা বিকৃত ব্যাখ্যা করেছি আচার্য?

—সে কথা তুমি খৃষ্টান পাদ্রীদের জিজ্ঞাসা কর রজনাতন।

শ্রীনিবাসন বললেন—এর মধ্যে খৃষ্টান পাদ্রীদের কথা তুলছেন কেন আচার্য চিদম্বরম?

চিদম্বরম বললেন—তার কারণ কি, রাজপ্রতিনিধি আপনি, আপনার সুবিদিত নয় শ্রীনিবাসন? মাস্ত্রাজের চারিপাশ, সারা তেলেকানা ওদিকে ত্রিবাঙ্গুর কোচিন আজ তারা গির্জা গড়ে বসেছে। মাস্ত্রাজে তারা সুপ্রতিষ্ঠিত। মহারাষ্ট্র-শক্তি পানিপথে প্রায় শেষ। যেটুকু অবশিষ্ট ছিল নানা ষড়নবীশের মৃত্যুতে তাও গেল। তিন বছর যেতে না যেতে পেশোয়া ইংরেজের কাছে অধীনতার খত লিখেছে। মহীশূরে সুলতান টিপু বিগত। সুলতান টিপু হিন্দু-ধর্মের বন্ধু ছিল না, কিন্তু পাদ্রীদেরও কঠোর শাসনে শাসিত রেখেছিল। নিজাম আজ অক্ষম। দক্ষিণে ইসলাম তিন শত বৎসরেও সনাতন ধর্মের ক্ষতি করতে পারে নি। কিন্তু খৃষ্টান ধর্মের প্রসার দেখ। এরা যে কৌশলে ধর্মের প্রসার করে সে তো কারো অবিদিত নেই। তার উপর এই নিকটক অবস্থায় তারা অতি উগ্রভাবে ধর্ম প্রসারে শক্তি নিয়োগ করেছে। তারা অস্পৃশ্যদের এই পন্থায় বিদ্রোহী করে তুলে পরিশেষে তাদের খৃষ্টান করছে। সুতরাং কারণটা তুমি সম্ভবত জেনেও অস্বীকার করছ।

শ্রীনিবাসন বললেন—এ সব আলোচনা রাজনৈতিক আচার্য। অস্বীকার করছি না যে, এ আলোচনায় আমার অধিকার নেই। তবু অপরাধীকে জানতে পারলে শাস্তি নিশ্চয় দেব।

চিদম্বরম বললেন—কারণবশতঃ কার্য হয় শ্রীনিবাসন; কিন্তু ওই কারণটিও স্বয়ম্ভূর মত তার পূর্ববর্তী কোন কার্য বা কারণ ভিন্ন উদ্ভূত হয় না। এ আঘাত করেছে অস্পৃশ্যরা এবং অস্পৃশ্যদের উত্তেজিত করেছে ওই খৃষ্টান ধর্মপ্রচারকেরা। রজনাতন যে ব্যাখ্যা করেছে তার গানের মধ্যে, তাকে বিকৃত করে বুঝিয়েছে ওই পাদ্রীরাই। এ সংবাদ আমি নিশ্চিতরূপে জানি। অপরাধীকে আবিষ্কার করলেও তোমাকে প্রসারিত হস্ত সঙ্কচিত করতে হবে শ্রীনিবাসন।

শ্রীনিবাসন বললেন—আমি প্রতিজ্ঞা করে যাচ্ছি, আমি তাদের আবিষ্কার করব, শাস্তি দেব। শুধু রজনাতনকে বলতে হবে—আমি চিনেছি, আকার আয়তন কণ্ঠস্বর এক—শুধু এইটুকু। সকলের সম্মুখে এ আমি শপথ করছি। তারপর রাজপ্রতিনিধিত্ব পরিত্যাগ করতে হলে তাও করব আমি।

• সকলে একবাক্যে বলে উঠল—সাধু সাধু সাধু।

ওপাশে বসেছিলেন বর্ষিষ্ণু ব্যবসায়ী গোপালন। তিনি বললেন, আততায়ীর নাম বা সন্ধান তিন দিনের মধ্যে আমি আপনাকে দেব মাননীয় শ্রীনিবাসন। আমি ব্যবসায়ী—আমার দোকানে ‘বহুলোকের সমাগম হয়, বহুজন কর্ম করে। এ সন্ধান পেতে আমার দেরি হবে না।

তবে আচার্য চিদম্বরমের কথা সম্পূর্ণ সত্য। এ কথা আমিও জানি। আচার্য রজনাতন এই গান করেন প্রথম কাঞ্জীভরমে। তাঁর ব্যাখ্যা বহু উচ্চবর্ণের জ্ঞানী-শুণীর কাছে প্রীতিদায়ক হয় নি, ব্যথিত হয়েছেন—বলেছেন, এ তবু, এ ব্যাখ্যা সকলের জ্ঞান নয়; তবু অস্বীকার করেন নি, সাধুবাদ উচ্চারণ করেছেন। কিন্তু শবরদের মধ্যে এ ব্যাখ্যা ক্ষোভের কারণ হয়েছে। আপনারা বর্ধিষু শবর ব্যবসায়ী খুষ্টান যোশেককে জানেন? খুষ্টান হয়েছে—ইংরাজী ভাষা শিখেছে—তবু সে যে শবর সে কথা ভুলতে পারে নি। সেও বোধ হয় কাঞ্জীভরমে গিয়েছিল গান শুনতে। আমার কাছে কিছুদিন আগে সে নারিকেল আর নারিকেল দড়ির চালান এনেছিল। রজনাতনের গানের কথাই আলোচনা হচ্ছিল। আমরা সকলেই প্রশংসা করছিলাম একবাক্যে। অপূর্ব এবং হৃদয়স্পর্শী ব্যাখ্যা। যোশেকের মুখ চোখ ক্ষোভে কঠিন হয়ে উঠল। বললে, কুংসিং, কুংসিং—শেঠ গোপালন, অতি কুংসিং ব্যাখ্যা। অতি স্নেহশীল আমাদের জাতিকে' হয় করা অবজ্ঞা করা ছাড়া আর কিছু নয়। কোথায় আমাদের পল্লীতে আবর্জনা, কোথায় দুর্গন্ধ? রজনাতন এতে ঈশ্বরের দয়া পাবে না, তাঁর কাছে শাস্তি পাবে। এ আমি নিশ্চিত বলে দিলাম—তুমি দেখো। হাতের মুষ্টিটা দৃঢ়বদ্ধ করে বললে, আমরা শবর থেকে খুষ্টান হয়েছি, তবুও আমরা শবর। এই উক্তি এবং তার সঙ্গে এই দুর্ঘটনার এলাকা, তার সঙ্গে আঘাতকারীরা ব্রাহ্মণ নয়—

ঘরের সামনের বারান্দা থেকে কেউ বললে—ব্রাহ্মণ এবং শবর ছাড়া কি আর কান্নার বা কাদেরও দ্বারা এ কাজ হতে পারে না শ্রেষ্ঠী গোপালন?

—কে? আলি নাসের সাহেব—

—হ্যাঁ, আমি।

—আপনি এসেছেন? তা বাইরে কেন?

—ভিতরে স্থান সংকীর্ণ। বাইরেই রয়েছি। রজনাতন আমার বড় প্রিয় গায়ক। আমি মুসলমান হলেও এসব পালাগান শুনতে ভালবাসি। যেদিন বিষ্ণুকাঞ্চীতে রজনাতন এই গান প্রথম করেন সেদিন আমি ব্যবসায়স্থলে ওখানে গিয়েছিলাম। রাত্রও ছিলাম। সেখানে শিবকাঞ্চীর একদল আধা সন্ন্যাসী ভক্তের আলোচনা আমি শুনে এসেছি। আমাকে তারা গ্রাহ্য করে নি। তারা অত্যন্ত ক্রুদ্ধ হয়ে বলেছিল, এর জন্ত রজনাতনের শাস্তি বিধান করবে তারা। বৈষ্ণব ধর্মের এই একাকার করার পন্থার প্রতি, রজনাতনের ব্যাখ্যার প্রতি তাদের আর ঘৃণার শেষ ছিল না।

তাঁর কথায় ঘরের ভিতরের প্রত্যেকেই স্তব্ধ হয়ে গেলেন। শৈব সম্প্রদায়ের মধ্যে এমন একদল অধোন্মাদ কোপন স্বভাবের ভক্ত আছে বটে।

ত্রিনিবাসন বললেন আচার্য চিদম্বরমকে—আচার্য!

আচার্য চিদম্বরম বললেন—হ্যাঁ, শুনলাম। একটু স্তব্ধ থেকে আবার বললেন—অসম্ভব নয় ত্রিনিবাসন। আমাদের গুণ-বারিধির সীমা পরিসীমা নেই। ধর্ম ধর্ম বিরোধ সে ছেড়েই দিলাম। ভারতবর্ষে হিন্দুধর্মের মধ্যে সম্প্রদায়ে সম্প্রদায়ে বিরোধও অনিবার্ণ অগ্নিকুণ্ডের মত জ্বলছে। রজনাতন ধর্মের অগ্নিতে হবি দিতে গেছে, সঙ্গে সঙ্গে বিরোধের বহিও জলে উঠে থাকতে পারে। আশ্চর্য হবার কিছু নেই। তা হলে আকার আরতন কঠোর বাক্‌বিত্তাস থেকে রজনাতনকে কষ্ট করে আততায়ীর স্বরূপ অহুমান করতে হবে না। তাদের গাজগন্ধ থেকেই অহুমান হবে সর্বাগ্রে। তাদের গায়ের একটি গন্ধ আছে—যেমন বৈষ্ণবেরও আছে। রজনাতন—

শ্রেষ্ঠী গোপালন বললেন—শৈব অধোম্মাদদের সন্দেহ করে খুঁটান যোশেক এবং পাদ্রীদের ছেড়ে দেওয়া অনেকটা নিরাপদও হবে।

শ্রীনিবাসন বললেন—নিরাপত্তার কথা পরে শ্রেষ্ঠী গোপালন। আগে আচার্য রঙ্গনাথন বলুন।

রঙ্গনাথন বললেন—গন্ধের কথা স্মরণ করতে পারছি না রাজপ্রতিনিধি। তবে হতে পারে না এমন কথা বলতে পারি না। এবং এর পর সনাতনধর্মী মুখ গোঁড়ার দলই যে হতে পারে না তাই বা কেমন করে বলব আচার্য চিদম্বরম, আমাকে ক্ষমা করবেন আপনি।

চিদম্বরম বললেন—রঙ্গনাথন, ভালই বলেছ তুমি। তুমি উদার।

ঠিক এই মুহূর্তে একজন বারান্দা থেকে ঘরে প্রবেশ করল এবং অতি সন্তুর্পণে দেওয়ালের প্রান্তভাগ ঘেঁষে গোপালনের কাছে গিয়ে অতি মৃদুস্বরে প্রায় কানে কানে কিছু বললে।

গোপালন চমকে উঠে বললেন—কই, কোথায়?

—ওই যে গোশালার কাঠের খুঁটি ধরে। জানালার দিকে আঙুল বাড়িয়ে সেও সবিস্ময়ে বলে উঠল—কই! ওই তো ওইখানেই তো দাঁড়িয়েছিল। কই!

সকলেই বিস্ময়ভরে প্রশ্ন করলেন—কে? কি?

—যোশেকদের গ্রামের একটি মেয়ে। লল্লা বলে একটি মেয়ে গান গেয়ে ভিক্ষা করে, সেই-ই। ওই গোশালার খুঁটি ধরে সেই সকাল থেকেই এখানে দাঁড়িয়েছিল। আপনাদের কথা শুনে আমি ভিতরে বলতে এসেছি—আর দেখি নি। আমার সন্দেহ হয়েছিল এই কথাগুলি শুনে অবশ্য যে ও এখানে এসেছে সংবাদ সংগ্রহের জন্ত। তাহলে ঠিক তাই।

রাজপ্রতিনিধি শ্রীনিবাসন ক্ষিপ্ততার সঙ্গে উঠে পড়লেন এবং ঘরের বাইরে এসে ডাকলেন—থিরুমল!

কোতোয়ালীর কর্মচারী থিরুমল এসে সম্মুখভরে অভিবাदन করে দাঁড়াল।

—দেখ তো থিরুমল, এই স্থানটি তন্ন তন্ন করে সন্ধান করে দেখ—এখানে লল্লা বলে কোন শবরকত্তা—

—গান গেয়ে সে তো তার অঙ্ক মায়ের হাত ধরে ভিক্ষা করে বেড়াত। তাকে তো চিনি। সে তো এখানেই ছিলো। ওইখানে ওই গোশালার ধারে।

—খোঁজ। তাকে খোঁজ। বের কর তাকে। সম্বর কাউকে আশ্রমের বাইরে পাঠাও দেখি।

রঙ্গনাথন চঞ্চল হয়ে উঠলেন। বললেন—আচার্য, রাজপ্রতিনিধি, এ কী করছেন? এই-খানেই বসে আমি দেখেছি একটি স্নানমুখী শবর বালিকা গোশালার পাশে দাঁড়িয়ে ছিল। কিন্তু সে কী অপরাধ করলে রাজপ্রতিনিধি?

রাজপ্রতিনিধি বললেন—আমার কর্তব্যকর্মে বাধা আপনি দেবেন না রঙ্গনাথন। আপনি সরল—

আচার্য বললেন—সরল নয়, নির্বোধ।

রঙ্গনাথনকে চুপ করতে হল।

থিরুমল তার চৌকিদারদের নিয়ে তল্লাস শুরু করলে। গোশালার অভ্যন্তর ঘরের ঘাটান, বাইরে প্রতিটি গাছের আড়াল—গাছের ঘন পল্লব ভেদ করে শাখাপ্রশাখায় দৃষ্টি সঞ্চালন করে দেখলে কোথায় গেল। তাদের সঙ্গে সমবেত লোকদেরও কিছু লোক যোগ দিলেন সন্ধানে। কই—কোথায়? আশ্রম থেকে বেরিয়ে চারপাশ তাল্লা দেখলে—চারপাশে যতদূর দৃষ্টি যায়

দেখলে। কই—কোথায় ?

একজন বললে—বেলাভূমি তো দেখা হয় নি।

ছুটে গেল একজন। তার পিছন পিছন আরও কয়েকজন। বেলাভূমি নির্জন। বিহুখ শামুক বিকীর্ণ—দূর স্রুদূর মনে হয়। দিগন্ত পর্যন্ত বালুতট চলে গেছে। কোলে কোলে অশান্ত গাঢ় নীল সমুদ্র গর্জন করে আছড়ে আছড়ে পড়ছে। দূরন্ত বাতাস নিরন্তর ক্রন্দন করে বয়ে চলেছে হা হা কঁরে। একদল উপকূলবর্তী নারিকেল তালের সারির অন্তরালে যথাসম্ভব সন্ধান করলে। কিন্তু কই ? সে কোথায় ? নেই তো !

শ্রীনিবাসন বললেন—আমি এর প্রতিকার করবই ! অপরাধীকে দণ্ড দেবই। সকলজনের সম্মুখে দেবতা সাক্ষী করে শপথ করলাম আমি। সে তারা যে-ই হোক। শৈব অর্ধোন্মাদ অথবা খৃষ্টান প্রচারক নিয়োজিত নির্বোধ যোশেক—যেই হোক।

আচার্য চিদম্বরম বললেন—শ্রীনিবাস তোমার সংকল্পে দেবতা এবং ধর্ম তোমাকে সাহায্য করবেন। শুধু—। রঙ্গনাথন !

—আচার্য !

—তোমাকে দৃঢ়চিত্ত হতে হবে।

—সত্য বাক্য বলব আমি আচার্য। সত্য স্থিতির চেয়ে তো দৃঢ়তা আর হতে পারে না আচার্য !

—হ্যাঁ রঙ্গনাথন ; মহাভারতে আছে—ধর্মরাজ যুধিষ্ঠির অশ্বখামা হত উচ্চকণ্ঠে বলে নিয়-
কণ্ঠে ইতি গজ বলে সত্য বলার নীতির নিয়ম রক্ষা করেছিলেন কিন্তু ধর্ম তাঁকে ক্ষমা করে নি।
তাকে নরক দর্শন করতে হয়েছিল। মনে রেখো। চল শ্রীনিবাসন।

শ্রীনিবাসন বলেন—এখানে গ্রহরার জন্ত জন দুয়েককে রেখে যাই।

রঙ্গনাথন হাত জোড় করে বললেন—মার্জনা করুন রাজপ্রতিনিধি। তার চেয়ে আমার মৃত্যুই শ্রেয়।

শ্রীনিবাসন সবিস্ময়ে তাঁর মুখের দিকে তাকিয়ে রইলেন। রঙ্গনাথন বললেন—কতদিন
আমাকে গ্রহরাধীনে রেখে রক্ষা করবেন আপনি ? অসম্মান করবার জন্ত কথাটা বলি নি
আমি। আপনি চিন্তা করে দেখুন।

শ্রীনিবাসন উত্তর দিলেন না। গ্রহরীদের নিয়ে তিনি চলে গেলেন। তাঁর সঙ্গে শ্রেষ্ঠী
গোপালন, আচার্য চিদম্বরম এবং তাঁদের পশ্চাৎ পশ্চাৎ অপর সকলেই। অল্পক্ষণের মধ্যেই
আশ্রম প্রায় জন্তশূন্য হয়ে গেল।

রঙ্গনাথন আশ্রমে একরকম একাই বাস করেন। জীবন তাঁর বিচিত্র। ব্রাহ্মণের সন্তান
কিন্তু শাস্ত্রবিদ বা পণ্ডিত তিনি নন। নিতান্ত বাল্যকালে পিতামাতৃহীন হয়ে অনাথে পরিণত
হয়েছিলেন। তাঁকে পালন করেছিলেন একজন বৈষ্ণব সাধু। রঙ্গনাথনের প্রতি আকৃষ্ট হয়ে-
ছিলেন তিনি—রঙ্গনাথনের সুস্বর এবং সঙ্গীতে জন্মগত অমুরাগ ও অধিকার দেখে। তিনিই
তাঁকে গান শিখিয়েছিলেন। এবং পুরাণ কথা মুখে বলে শুনিতে পুরাণে পারদম্ব করে তুলে-
ছিলেন। তারপর পাঠিয়েছিলেন কর্ণাটক সঙ্গীতের একজন কর্ণধারের কাছে। ভক্তিবাদী
বৈষ্ণব সাধুর তিনি ছিলেন ভক্ত। বালকের অমুরাগ, অধিকার এবং সুস্বর দেখে তো মুগ্ধ তিনি
হয়েই ছিলেন—কিন্তু তারও থেকে বেশী মুগ্ধ তাঁকে করেছিল বালকের হৃদয়ের মমতার তৃষ্ণা।
মমতার কাঙাল ছিল। শুধু পাবার জুতাই নয়, তার আপন মমতা রাখবার জন্তে ব্যাকুল হয়ে

আধার খুঁজে সে বিরত। ক্রমে তার সঙ্গীত-রচনার শক্তি ক্ষুরিত হল,—তখন সে ঘুবা; সঙ্গীত-গুরু তখন তাকে বিদায় দিলেন; পাঠিয়ে দিলেন বৈষ্ণব সাধুর কাছে। তাঁকে জানিয়ে ছিলেন এর পর নিজের পথ সে নিজেই করে নেবে। এখন শুধু চাই এর জীবনের সঞ্চয় রাখবার একটি আধার। আপনি নিজে পরীক্ষা করলেই বুঝতে পারবেন।

কথাটা সত্য। এক গানের সময় ছাড়া বাকী সময় সে এক নিরবচ্ছিন্ন উদাসীনতায় মগ্ন থাকত। বৈষ্ণব গুরু জিজ্ঞাসা করেছিলেন—এমন উদাসীন হয়ে তুমি কেন থাক রঙ্গনাথন?

তরুণ রঙ্গনাথন বলেছিলেন—জানি না প্রভু। হয়তো—

—হয়তো কি রঙ্গনাথন?

—ঠিক জানি না প্রভু, মনে হয় বড় একা আমি।

—তুমি সংসার কর রঙ্গনাথন। আমি আমার গৃহী শিষ্যদের বলি—তারা একটি সুন্দরী সুশীলা পাত্রী দেখে দেবে।

হাত জোড় করে রঙ্গনাথন বলেছিলেন—না প্রভু, না।

—কেন?

—সংসারে আমি অল্পযুক্ত। আমার ভয় করে।

—ভয় করে?

—হ্যাঁ প্রভু। বড় ভয় আমার। আপনি আমাকে পালন করেছেন। আপনি গুরু। আমি আপনার কাছে মিথ্যা কথা বলছি না।

গুরু অনেকক্ষণ চুপ করে থেকে প্রশ্ন করেছিলেন—তোমার কিসে সবচেয়ে উল্লাস বোধ হয় বলা তো? নিজেকে বুঝে সন্ধান করে বল। কখনও কোন মুহূর্তেই তুমি এই উদাসীনতা থেকে মুক্তি পাও না? ক্ষণেকের জন্তও কি মনে হয় না তুমি আনন্দ বোধ করছ? তুমি খুশী?

অনেকক্ষণ পর রঙ্গনাথন বলেছিলেন—হ্যাঁ প্রভু, সঙ্গীত-গুরুর সঙ্গে কয়েকবার সঙ্গীতের বড় আসরে গান গাইবার সুযোগ পেয়েছিলাম। বহু শ্রোতা মুগ্ধ হয়ে যখন আমাকে সাধুবাদে অভিনন্দিত করেছিল তখন মনে হয়েছিল আমি সুখী।

—একলা বসে কখনও কি আনন্দ অনুভব কর না?

—করি প্রভু। সে বিচিত্র অবিবাহিত কথা। কেঁদে আমি আনন্দ পাই। যখন “আমার কেউ নেই”—এই চিন্তা গাঢ় ভীক্স হয়ে ওঠে, তখন চোখ থেকে জল গড়িয়ে আসে আপনিই। আরও একটি কারণে কারা আমার পাশ—মাত্রাঘের দুঃখ দেখে।

গুরুর মুখ উজ্জ্বল হয়ে উঠেছিল। তিনি বলেছিলেন—এইটিই আমার শেষ প্রশ্ন। বল রঙ্গনাথন যখন বিপদ হয়, দুঃখ খুব গভীর হয়—কাকে ডাকতে ইচ্ছে করে? কাকে মনে পড়ে? কার কাছে ছুটে যেতে ইচ্ছে হয়?

—ঠিক জানি না। তবে বিপদে পড়লে আপনার কথা মনে পড়ে, মনে হয় আপনার কাছে গেলেই পরিত্রাণ পাব। কিন্তু দুঃখ গভীর হলে তো কাউকে মনে পড়ে না। মনে হয় আমি একা। কেউ নেই আমার।

কয়েকদিন পর গুরু তাকে ডেকে বলেছিলেন—রঙ্গনাথন, এ কয়েকদিন চিন্তা করে আমি দেখলাম। জীবনের আধেয় তোমার অমৃতের মত। সে অমৃত রাখবার স্বর্ণপাত্র নেই, পাছ না বলে তোমার এই বেদনা, এই দুঃখ। গানের প্রশংসায় তোমার আনন্দ। গানই হোক তোমার কর্ম; অনেক প্রশংসা পাবে—প্রতিষ্ঠা পাবে। সে সব যদি তুমি গোবিন্দ-চরণের

আধারে সঞ্চয় করতে পার তবে এই জন্মেই মুক্তি হবে তোমার।

সেই সাধনাই করে আসছেন রঙ্গনাথন। একাই চলেছেন তাঁর বীণাটি হাতে। তাঁর বাদকেরা আছে, প্রয়োজনমত আসে। না হলে একাই থাকেন। ঠিক একা নয়—পরিচারক আছে বুদ্ধ কুড়ুমনি।

সঙ্গীতের জন্ত তাঁর খ্যাতি হয়েছে। তাঁর গান হবে শুনলে সহস্র জনের সমাগম হয়। গানের সময় তাদের মুখ দৃষ্টি দেখে তাঁর বুক ভরে ওঠে আনন্দে। গুরুর কথা স্মরণ করে মন্দিরের দিকে তাকিয়ে চোখ বুজে বলেন—তোমাতে অর্পণ করছি। গান-শেষে প্রসাদী মালা নিয়ে কিরে আসেন; ধনীর গৃহ থেকে সম্মান-অর্থ নিয়ে কিরে আসেন; পথ থেকেই সে আনন্দ মিলিয়ে যেতে শুরু করে। বাড়ীতে এসে বীণাটি পাশে রেখে বসবার সঙ্গে সঙ্গেই উদাসীনতা আবার তাঁকে আশ্রয় করে। মাঝে মাঝে অস্বাভাবিকতার মধ্যে তাঁর মধ্যমাসুলি বীণার তারে যুহু আঘাত করে, মনে যেন ধ্বনি ওঠে—কেউ নেই তাঁর। বিগ্রহের মুখ স্মরণ করতে চেষ্টা করেন। স্মরণ হয় না, তার বদলে ভেসে ওঠে সঙ্গ্রাম-দৃষ্টি কোন শ্রোতার মুখ। কখনও কখনও দুঃখীজনের মুখ মনে পড়ে। কোন ভিক্ষুক। কোন নিপীড়িত মাল্লুষ। তার মধ্যে নারীর মুখও আছে। কিন্তু কোন বিশেষ একটি নারীর মুখ বার বার ভেসে ওঠে না। কিছুদিন থেকে তাঁর মনকে আলোড়িত করেছে এই শবরদের দুঃখ। কিছুদিন আগে তিনি মহাবলীপুরমে সমুদ্রতটভূমি ধরে পদযাত্রা করেছিলেন উত্তরমুখে। এই উদাসীনতা-যেন হিমাচল প্রদেশের পার্বত্য অঞ্চলের কুয়াশা ও ঘন শীতে বরক হয়ে জমে স্তূপীকৃত হয়ে তাঁকে আচ্ছন্ন করে ফেলেছিল। অনেক বেদনাতুরতা ও ভারাক্রান্ততার পর একদিন সারারাত্রি কেঁদে-ছিলেন। পরদিন তুষারচ্ছন্ন জীবনভূমি ও নির্গল মানসাকাশ নিয়ে তিনি পড়তে বসেছিলেন মহাভারত। সাবিত্রী উপাখ্যান মনকে আকৃষ্ট করেছিল। তার প্রধান কারণ মদ্ররাজ কন্ঠা মহীয়সী সাবিত্রী। মদ্ররাজ অশ্বপতির কন্ঠা। তিনি যাচ্ছিলেন মাল্যবান পর্বতবেষ্টিত পম্পা-সরোবর দেখতে এবং সেখানে স্নান করতে। ইচ্ছা ছিল সেখানে বসেই সাবিত্রী উপাখ্যান নিয়ে পালা গান রচনা করবেন। ওইখানেই আছে সেই মহামহিমময় ভূমি—যেখানে কৃষ্ণচতুর্দশীর প্রগাঢ় অন্ধকারের মধ্যে যুত সত্যবানের মাথা কোলে রেখে বসে চোখে দেখেছিলেন কৃষ্ণ-জ্যোতির্মান যুত্য়দেবতাকে। ইচ্ছা ছিল গভীর রাজ্যে বনে বসে বীণা বাজিয়ে মনে মনে গীতে যাবেন স্নর এবং কথা। কিন্তু তা হয় নি। হঠাৎ তিনি রুদ্ধগতি হয়ে গিয়েছিলেন একখানি শবরপল্লীতে। ঝড় উঠেছিল সমুদ্রে। আকাশ নিকষ কালো মেঘে আচ্ছন্ন হয়ে এল, তার সঙ্গে প্রচণ্ড ঝড়। সমুদ্র-বেলাভূমির বালুকণা উৎক্ষিপ্ত হয়ে ছড়িয়ে পড়ছিল। ভেঙে পড়ছিল তাল নারিকেল শীর্ষ। শাখাপ্রাশা সমন্বিত গাছ যেগুলি সেগুলির শাখা ভাঙছিল, পাতাগুলি ছিন্নবিচ্ছিন্ন হয়ে উড়ে যাচ্ছিল, মধ্যে মধ্যে ছ'চারটি সমুলে উপড়ে গিয়ে মাটিতে অস্ত্র গাছের উপর সবগে আছড়ে পড়ছিল। উজ্জ্বলিত সমুদ্রতরঙ্গ পাহাড়ের মত উঁচু আকার নিয়ে বেলাভূমি পার হয়ে স্থলভাগে এসে প্রাবন বইয়ে দিচ্ছিল। রঙ্গনাথন সমুদ্রকে পিছনে রেখে পশ্চিমমুখে স্থল-ভূমির অভ্যন্তরে আত্মরক্ষার জন্ত প্রবেশ করবার চেষ্টা করেছিলেন। বহু কষ্টের পর একখানি শবরপল্লী পেয়ে বেচেছিলেন। কালটা দিনমান ছিল তাই পেয়েছিলেন—নইলে পেতেন না। নাতিউচ্চ পার্বত্য অঞ্চল। সবটাই ছোট ছোট গাছের জঙ্গলে পরিপূর্ণ। তারই মধ্য দিয়ে পায়ে চলা পথ পেয়ে যথাসাধ্য দ্রুত যেতে যেতে হুঁচোট খেয়ে পড়ে জ্ঞান হারিয়েছিলেন। জ্ঞান হলে দেখেছিলেন টোডা জাতীয় শবরদের পল্লীতে শুয়ে আছেন একটি ছোট কুটির। ঝড় তখন কেটে গেছে। ছোট গ্রাম, পনের-কুড়ি ঘর মাছঘের বাস। কুটির নামেই কুটির। তৃণাচ্ছাদিত

কুঁড়ে। কৃষ্ণকায় সরল নরনারীর দল। 'বন থেকে জীবিকা সংগ্রহ করে। এদের দক্ষিণী রূপ রজনাক্ষন দেখেছেন। উত্তরে কিছু কিছু পরিবর্তন হয়েছিল সে রূপের।' মেয়েরা বুকের উপরে কাপড় পরে। কাঁধ খোলা। পুরুষদের কাপড় সামান্য, কোমর থেকে জাম্ব পর্যন্ত। তাও অনেকের নেই, সামান্য কোণীয়া সখল। জ্ঞান যখন হয়েছিল তখন শিরে বসেছিল এক বৃদ্ধা। তাকে তিনি তামিল ভাষাতেই প্রশ্ন করেছিলেন—তোমরা আমাকে বাঁচিয়েছ ?

প্রোঢ়ার মুখ হাসিতে উদ্ভাসিত হয়ে উঠেছিল, কথা সে বলতে পারে নি। এর পর খবর পেয়ে এসেছিল পল্লীর কর্তা। সে বলেছিল, বাঁচাবার মালিক তোমাকে বাঁচিয়েছে। আমরা অচেতন অবস্থায় তোমাকে কুড়িয়ে পেয়েছিলাম। বাঁচবে সে আশা করি নি।

কর্তার পিছনে দল বেঁধে এসে দাঁড়িয়েছিল পল্লীর সমস্ত লোক। প্রতিটি জনের দৃষ্টিতে দেখেছিলেন আনন্দ এবং মমতায় মিশ্রিত প্রসন্ন দৃষ্টি। অকস্মাৎ পিছন থেকে একটা তীক্ষ্ণ ক্রুদ্ধ চীৎকার উঠেছিল। নারীকণ্ঠে কে চীৎকার করে বলেছিল—রক্ত রক্ত—ওর রক্ত নে। আমাদের রক্ত নিলে। নে নে। ছাড়—পথ ছাড়।

গ্রামের কর্তা চকিত হয়ে বলেছিল—যা যা, ওকে নিয়ে যা। এখানে এল কি করে ? তারপর তাঁর বিস্মিত মুখের দিকে চেয়ে বলেছিলেন—ও পাগল।

সন্ধ্যার পর থেকে সারারাত চীৎকার করেছিল মেয়েটি। আতঙ্কের চীৎকার। যেন দলে দলে আততায়ীরা তাকে আক্রমণ করতে এসেছে। নিদারুণ আতঙ্কে চীৎকার করেছে।

কর্তা তার বীণাটি এনে পাশে রেখে বলেছিল—এটি আপনার পাশেই পড়েছিল।

—হ্যাঁ। আমার বীণা। ভেঙে গেছে, এতে আর কাজ হবে না। অক্ষত থাকলে গান শোনাতাম। তোমরা প্রাণ বাঁচিয়েছ।

—গান! কর্তার মুখ আনন্দে উদ্ভাসিত হয়ে উঠেছিল। তুমি গান গাও ?

—হ্যাঁ গাই।

—আমাদের শোনাবে ? আমরা গান ভালবাসি।

—তোমরা গান গাও না ? মেয়েরা নাচে না ?

—নাচত। গাইত। খুব ভাল। ওই পাগল মেয়েটা সবচেয়ে ভাল নাচত। ওটা আমার মেয়ে। • কিন্তু—এখন পাগল। শুধু চেঁচায়। ওই চেঁচাচ্ছে, সারারাত চেঁচাবে। মাঝে মাঝে ঘুম আসে, হঠাৎ ঘুম ভাঙে আর চেঁচায়। এলো—এলো। ছেড়ে দে—ছেড়ে দে। ওর উপর বড় জুলুম করেছে। মরে যদি যেত—

রজনাক্ষন কি উত্তর দেবেন ? কি বলবেন ? চুপ করে ছিলেন নির্বাক হয়ে। কিছুক্ষণ পর বলেছিলেন—গান গাইব ? শুনবে ? শুধু গলাতেই ?

—গাও। গাও। সেটা ওরও ভাল লাগবে।

তিনি গেয়েছিলেন। ছোট একটি পালা গান। রামায়ণের—গুহক চণ্ডালের সঙ্গে রামচন্দ্রের মিতালি।

ওই পাগলিনী এসে বসেছিল শাস্ত হয়ে। সকলের পুরোভাগে বসেছিল। আশ্চর্য শ্রীময়ী মেয়ে। নিতান্ত তরুণ বয়স। কুড়ির নিচে।

• গান শেষ হলে সে হঠাৎ জিজ্ঞাসা করেছিল—রামচন্দ্রের লোকেরা এসে খর পুড়িয়ে দিলে না ?

কর্তা উদ্বিগ্ন হয়ে তাকে হাত ধরে বলেছিল—উনি, উনি—সীতারাম, সীতারাম। বলতে নাই। সীতারাম।

—হ্যাঁ। সীতারাম। ভগবান।

—হ্যাঁ। ভ-গ-বা-ন।

—ভগবান হুং দেয় না। জ্বরদস্তি জ্বলুয় করে না। মাহুয—মাহুযে করে। তারপরই চীৎকার করে উঠেছিল—মরে যা। মাহুয মরে যা।

রাজে রজনাক্ষন জিজ্ঞাসা করেছিলেন—উম্মি কেন ও-কথা বললে ?

কর্তা তাকে বলেছিল সব কথা। এ গ্রাম তাদের সেই প্রাচীনকালের বাসভূমি নয়। তাদের বাস ছিল সমুদ্রের ধারে বন্দর শহরের কাছে—খানিকটা দূরে। একসঙ্গে তারা থাকত—প্রায় পঞ্চাশটি পরিবার। জ্বলুয় তাদের উপর হয়—হত। কিন্তু গতি হু-বৎসরে মারাঠা নিজাম আংরেজদের লড়াই হয়েছে। সেই লড়াইয়ে তাদের গোটা গ্রামটা জ্বলেছে চারবার। দুবার জালিয়েছে বর্গীরা, একবার ইংরেজ, একবার নিজাম। যার পথে যখন পড়েছে, সে জালিয়েছে—জ্বলুয় করেছে। ওই মেয়েটাকে—উম্মিকে ধরে নিয়ে গিয়েছিল। ধরে রেখেছিল তিন দিন। তিন দিন পর যখন ছেড়ে দিলে—তখন ও পাগল। রাত্রি হলেই চীৎকার করে—না—না—না। ছেড়ে দে। ছেড়ে দে। মেরে ফেল্ মেরে ফেল্। সারারাত। দিনের বেলা নতুন লোক দেখলে ছুটে গিয়ে লুকোয়। লোকজন থাকলে তখন চোঁচায়—রক্ত নে, রক্ত নে। ওরা কেন রক্ত নিলে! আমাদের গ্রামে চারবারে তারা কুড়িজনের বেশী লোককে খুঁচিয়ে মেরেছে ও দেখেছে। সেই থেকে আমরা গ্রাম ছেড়ে এই বনে এসে ঘর বৈধেছি। এই দেখ—এখনো ঘর-গুলান ভাল করতে পারি নি। ঝুপড়ি বৈধে আছি। এখনও সব বলছে—ইখানেও নয়—চল—” আরও বনের ভিতরে চল। যেখানে কেউ খোঁজ পাবে না।

রজনাক্ষনের চোখ জলে ভরে উঠেছিল। সারারাত ঘুমোতে পারেন নি। পরের দিন তিনি তাদের কাছে বিদায় নিয়ে বেরিয়ে এসে মাল্যবান পম্পাসরোবরের দিকে পিছন ফিরে, ফিরে এসেছিলেন মাদ্রাজের প্রাস্তে তাঁর আশ্রমে।

মনের মধ্যে শুধুই ভেবেছিলেন এদের কথা। এই সরল মাহুয, দীন মাহুয, বঞ্চিত মাহুয, পদানত মাহুযদের কথা। কেন? কেন এত অত্যাচার এদের উপর? কেন এত অবজ্ঞা? কেন এত ঘৃণা? মহাভারত মনে পড়েছিল।

মহাবলীপুরমে পাথরের বৃকে খোদাই করা অর্জুনের তপস্তা-কাহিনী মনে পড়েছিল।* অর্জুনের তপস্তায় ভুট্ট হয়ে স্বয়ং মহারুদ্র এসেছিলেন কিরাত বেশে—সঙ্গে এসেছিলেন কিরাত নারীবেশে স্বয়ং পার্বতী। এইটি অবলম্বন করেই তিনি নতুন গান রচনা করে বলবেন এরা সেই রুদ্রের বংশধর। অস্পৃশ্য নয়, পরম পবিত্র—বিপুল শক্তির অধিকারী। তারপর মনে পড়েছিল—ধর্মব্যাধের কথা, যার কাছে গিয়েছিলেন ব্রাহ্মণ কুমার কৌশিক ব্রহ্মকে জানবার জন্ত। তার কিছুটাও জুড়ে দিয়েছিলেন।

কৌশিককে ব্যাধের কাছে যাবার নির্দেশ দিয়েছিলেন এক পতিতা নারী। তিনিই বলেছিলেন—ঘৃণা নিয়ে যেয়ো না। মনে রেখো—ওই কৃষ্ণবর্ণ মাহুযগুলির অন্তর-মন্দিরে যিনি বসবাস করেন—তাঁরই বসতি সর্বোচ্চ স্বর্গে, গোলক নিবাসে। এইটুকুই হয়েছিল ভূমিকা এবং এইটুকুই কিছু বিশদ করে হয়েছিল উপসংহার। পথেই শুরু হয়ে গিয়েছিল রচনা। ফিরে এসে রচনা করেছেন আর কেঁদেছেন। এই রচনার সময়েও একদিন তিনি ওই শবরকস্তা লটার দুরাগত সঙ্গীত শুনেছিলেন। ভগবানের স্তবগান করে বোধ হয় ভিক্ষা করছিল। কস্তাটি

* এখন এই খোদাই চিত্র ভগীরথের তপস্তা বলে প্রমাণিত হয়েছে। ঊনবিংশ শতাব্দীতে অর্জুনের তপস্তা নামেই পরিচিত ছিল।

বিচিত্র। শুনেছিলেন যোশেফের আপন জ্ঞান, নাকি আপন জ্যোষ্ঠ সহোদরের কণ্ঠ। এই ব্যবসায় আরম্ভ করেছিল লল্লারই বাপ। যোশেফ তখন যোশেফ হয় নি। তবে পাত্রীদের কাছে যাতায়াত ওর অনেক দিন থেকেই। গীর্জার সংলগ্ন বাগানেও কাজ করত। বাড়ি থেকে ঝগড়া করে পালিয়ে গিয়েছিল। তারপর লল্লার বাপের মৃত্যুর পর গ্রামে ফিরে দাদার ব্যবসায়ের ভার নিয়েছিল। অল্প চার-পাঁচ বছরেই সে সমৃদ্ধ করে তুলেছে তার ব্যবসায়। এখন ব্যবসায় তার। এরই মধ্যে সে নিজে খুঁটান হয়েছে, তার গ্রামের আরও অনেককে খুঁটান হতে প্রলুব্ধ করেছে। মাজ্জাজে কোম্পানীর চাকরি বড় প্রলোভন। তার সঙ্গে পোশাক, মর্যাদা—অনেক কিছু। হিন্দু-সমাজের যারা মাননীয়, যাদের সঙ্গে এক পথে হাটবার উপায় নেই, যাদের গায়ে কোনরকমে তাদের ছায়া পড়লে তাদের অপরাধ হয়—তাদের উপেক্ষা করার, অস্বীকার করার অধিকার পেয়ে ওরা প্রমত্ত উল্লাসে মেতে উঠেছে। মুক্তিও পেয়েছে বইকি। গ্রামে তাদের এখন পাত্রীদের পাঠশালা হয়েছে। গ্রামের ছেলেমেয়েরা শিক্ষা পাচ্ছে। লল্লাও শিক্ষা পেয়েছিল। তার মায়ের আপত্তিতেই ধর্মাস্ত্র তার গ্রহণ করে নি। নইলে—। না না, তা তো নয়। মেয়েটির গান শুনে তা তো মনে হয় না। মেয়েটি স্বকণ্ঠী—তার ওপর ওই টোডা মেয়েটির—ওই উল্লির চেয়েও সুশ্রী। তার উপর একটি মার্জনা আছে। শিক্ষার মার্জনা—নগর বাসের মার্জনা। এই মেয়ে—। সে কি এইখানে এসেছিল সংবাদ সংগ্রহ করতে? তার চোখে যে জল তিনি দেখেছিলেন—তা কি শাস্ত্র সমুদ্রের নিস্তরঙ্গতাকে বিষণ্ণতা ধরে নেওয়ার মত একটি কল্পনা! মাত্র স্বেচ্ছাকৃত ভ্রম! যোশেফও তাঁর অপরিচিত নয়। তার সঙ্গীরাও তাঁর পরিচিত। কতদিন তারা গান শুনে যায় তাঁর আশ্রমের সামনে ওই বেলাভূমে বসে। দেখা হলে প্রসন্ন হাসিতে ভরে ওঠে তাদের মুখ, চোখ প্রদীপ্ত হয়ে ওঠে জলন্ত প্রদীপের মত। অপরিমেয় ভালবাসা তারা ব্যক্ত করেছে সামান্যতম উপলক্ষে। আশ্রমের বাঁশের কটকটির পাশে রেখে যায় ফুলের গুচ্ছ। সবুজ কাঁচা নারিকেল, পরিপুষ্ট কলা, অমৃত কলের সময় অমৃত ফল—বাঁশের নতুন আধারে সাজিয়ে এসে ডাকে—আচার্য! আচার্য!

তিনি শুনতে পেলেই বাইরে এসে বলেন—এস। আমার এখানে কোন সন্দোচ নেই। এস।

তারা হাসিমুখে এসে পাত্রটি নামিয়ে দিয়ে বলে—আমার বৃক্ষের ফল। আপনার জ্ঞান এসেছি।

তিনি তুলে নিয়ে বলেন—আজ আমার দেবতা পরম তৃপ্তিতে ভোজন করবেন ভদ্র।

রজনান্থন তাদের ভদ্র ছাড়া সম্বোধন করেন না।

অবশ্য এসব আদান-প্রদান খুঁটান শবরদের সঙ্গেই বেশী হয়। খুঁটানোও আসে—যোশেফই এসেছে। সে একবার তাঁকে নারিকেল রজ্জুর সুন্দর পাপোশ তৈরী করে এনে দিয়ে গেছে। তার কণ্ঠস্বর সঙ্কোচহীন কিন্তু সহজ নয়। ওই সঙ্কোচ বর্জনের প্রয়াসেই কিছুটা যেন অস্বস্তিকর। ভেঁকে বলেছিল—সঙ্গীতাচার্য, রয়েছ নাকি?

—কে?

—আমি যোশেফ।

—এস এস।

—তোমার জ্ঞান এই পাপোশটি নিয়ে এসেছি। দেখ তো, সুন্দর হয় নি?

—সুন্দর—সুন্দর হয়েছে ভদ্র।

—ভদ্র কেন বলছ। বল যোশেফ।

—বেশ তাই বলব।

—হ্যাঁ। আমি তো এখন একজন খুঁটান জেক্টু। জান তো?

—হ্যাঁ জানি।

—আমি তোমাকে সঙ্গীতাচার্য রঞ্জনাতন বলব। কিছু মনে করবে না তো?

—না না। কেন মনে করব।

—এই কারণেই তোমার জন্যে এটি আনবার ইচ্ছা হল। ওই সব ব্রাহ্মণ আচার্যদের আমি এ সব দিই না। তারপর বলেছিল, জান সঙ্গীতাচার্য, তোমার গান শুনবার আমার ইচ্ছা হয়। কিন্তু আমরা অনেকেই তো প্রভু বীণাকে ভজনা করি। তাই ভয় হয় যদি প্রভু রুষ্ট হন। পাত্রী বাবারা রুষ্ট হবেন এ নিশ্চিত। নইলে রীতিমত তোমার দক্ষিণা দিয়ে পালা গান শুনে একদিন আনন্দ করতাম। তুমি যেতে আচার্য?

একটু ভাবতে হয়েছিল তাঁকে। গেলে হয়তো উচ্চবর্ণের সমাজে, দেবমন্দিরে তাঁর প্রবেশপথ রুদ্ধ হতে পারে।

যৌশেক বলেছিল—তোমার ইচ্ছা আছে সে আমি জানি আচার্য। আমার মত তোমারও ভাবতে হচ্ছে পুরোহিত পণ্ডিত সমাজপতিদের কথা। হ্যাঁ, ভাবনার কথা।

—হ্যাঁ যৌশেক, ভাবছি তাই।

—থাক আচার্য। তোমার গান আমরা দূর থেকেই শুনব। কিন্তু তোমার গানে তুমি বৃড় বেশী কাঁদাও।

কালো মানুষটি শুভ্র সুন্দর সুগঠিত দুপাটি দস্ত বিস্তার করে হেসেছিল—আমরা হাসতে ভালবাসি। বলে সে চলে গিয়েছিল। যেতে যেতে আবার ফিরে এসে বলেছিল—আচ্ছা একটা কথা বলতে পার?

—কি বল।

—হাসতে ভালবাসি। তোমার গানে কাঁদতে হয়। তবু যাই। আর কৈদেও সুখ হয়। কেন বল তো? হেসে রঞ্জনাতন বলেছিলেন—তোমারই মত—ওর উত্তর আমি জানি না যৌশেক।

—আমার ভাবনা—সে খুব ভাল গান গায়। খুব ভাল কণ্ঠ। আর শুনেই ঝঞ্ঝে নেয়! মধ্যে মধ্যে যখন মেজাজ খারাপ হয় ওকে ডাকি। গান গাইতে বলি। শুনে মেজাজ ভাল হয়।

—হ্যাঁ। দূর থেকে ওর গান শুনেছি আমি। সুন্দর কণ্ঠ।

—ওকে দেখেছ? সুন্দর দেখতে। ওকে আমাদের খুঁটান পাঠশালার লেখাপড়া শিখিয়েছি। দাদা মারা গেল। ভার তো আমার ওপর। ইচ্ছা ছিল ভাল লেখাপড়া শেখাব, খুঁটান করে দেব—ভাল বিয়ে হয়ে যাবে। ইস্ট ইণ্ডিয়া কোম্পানীর কত ছোকরা ইংরেজ কর্মচারী আসে। তারা এখানে বিয়ে করে। তা দাদা ছিল গৌড়া আর কুসংস্কারাচ্ছন্ন। ওর বউটা আরও বেশী। সেই মাই ওকে হতে দেয় নি খুঁটান। রাগ করে আমার কাছ থেকে একমুঠো চালও নিত না। ভিক্ষে করে খেতো। আমিও খুব কড়াংলোক, খুব কড়া। আমিও দিই নি। তা ছাড়া অুইনের ভয় আছে। জান তো, ও থেকেই ওরা বলতে পারে আমরা এক সংসার। সব কিছুতে তাদের ভাগ আছে। মেয়েটার বিয়ে হবে—জামাই দাবী করবে। ওর মা-টা অন্ধ হয়েছিল—মেয়ের হাত ধরে গান গেয়ে ভিক্ষে করত। রোজগার ভাল হত আচার্য। মেয়েটা এখন মায়ের গৌড়ামি পেয়েছে। মা বলত, খুঁটান হতে কখনও দেব না।

তার চেয়ে কোনও মন্দিরে দিয়ে আসব, 'মন্দিরের চারপাশ ঝাড়ু দেবে, বাইরে দাঁড়িয়ে গান করবে—ওর গতি হয়ে যাবে।

অবাক হয়ে শুনেছিলেন রজনাক্ষন। এ সবই নূতন কিছু নয়। শুনেছেন। তিনি বৈষ্ণব—কত অক্ষুণ্ণ ভক্ত জীবনে সন্ত হয়ে গেছে। কিন্তু এমন করে চোখের সামনে ঘটেছে—অথচ জানানো না—এইটেতে বিস্ময় তাঁর।

যোশেফ বলেছিল—মেয়েটা নাচতেও পারে। এখন ওর ইচ্ছে ভাল করে নাচু শেখে, গান শেখে। কোন কথাকলির দলে ওকে দেওয়া যায় না আচার্য? তুমি একটু সাহায্য করতে পার না? ঠিক বলছি তোমাকে, লজ্জা খুব নাশ করবে। খুব ভাল পারবে।

এ সব ঠিক পম্পাসরোবর যাবার আগের কথা। পম্পাসরোবর যাবেন—জ্ঞান করবেন—সাবিত্রীর উপাখ্যান নিয়ে পালা রচনা করবেন এই ভাবনার মধ্যে যোশেফ লজ্জা এদের কথা মনেই পড়ে নি। পথে ঝড়ে বিপর্যস্ত হয়ে টোডা গ্রাম থেকে ফিরে আসবার পথে কিন্তু ওই উঁয় মেয়েটির সঙ্গে লজ্জার স্মৃতি জড়িয়ে গিয়েছিল। উল্লিকে মনে হলেই তার পিছনে লজ্জা এসে দাঁড়াত। মনে হত লজ্জার ভাগ্যেও হয়তো এমনই দুর্গতি লেখা আছে। ভেবেছিলেন যোশেফকে ডেকে বলবেন—যোশেফ, লজ্জা তোমার ভাইঝি! দেশকাল তো দেখছ। আজ যুদ্ধ—কাল যুদ্ধ। রাজারা সব সামুদ্রিক ঝড়ে নারিকেল স্তম্ভের বৃক্ষের মত পড়ে যাচ্ছে। এর মধ্যে লজ্জাকে এমন শিক্ষা করে বেড়াতে দিয়ে না। ওর বিয়ে দাও। সংসারী করে দাও। পল্টনের সিপাহী—সে তোমার যেমন দেনী হিন্দু মুসলমান, তেমনি ফিরঙ্গী। এদের কাছে আমরা সবাই দুর্বল। তার উপর মাস্তাজ নগর দিন দিন বড় হচ্ছে। নানান স্থানের ধনী আসছে, দুষ্ট আসছে। এরাও বর্বর। সংসারে মানুষ ভূমি আর নারীর প্রলোভনে জন্ত হয়ে যায়। কতটি বিয়ে দিয়ে ওকে কিছুটা রক্ষা কর, নিরাপদ কর।

ভেবেছিলেন বলবেন, কিন্তু তাও ভুলে গেছেন। বলা হয় নি। যোশেফও এদিকে আসে নি। লজ্জার কষ্টের দূর থেকে তাঁর কানে আসে নি। তিনি নিজেও রচনার কাজে এমনি তন্ময় হয়ে গিয়েছিলেন যে বাইরের পৃথিবীর সঙ্গে যোগ ছিল না।

লজ্জাকে এরপর দেখেছিলেন কালীভরম—বরদরাজের মন্দিরচত্বরে এই গান প্রথম দেবতা ও সাধারণের সামনে গাইবার দিন। মন্দির প্রবেশপথে গোপুরমের বাইরে সে দাঁড়িয়েছিল অম্পশ্চ শ্রোতাদের মধ্যে।

মেয়েটিকে দেখে তাঁর দৃষ্টি আকৃষ্ট হয়েছিল। এ কি লজ্জা নয়? হাতে করতাল, কাঁধে ভিক্ষার কোলা? রঙ কৃষ্ণবর্ণ নয়, শ্যামবর্ণ। সুন্দর মুগঞ্জী। তবী দীর্ঘাঙ্গী। পরনের হরিদ্রাবর্ণ মোটা কার্পাস বস্ত্রখানি নিম্নপ্রান্ত বাহুবন্ধনীর আকর্ষণে হাঁটুর উপরে উঠেছে। পাটো অঞ্চলখানি কোনমতে বৃকের বন্ধাবরণীকে ঢেকে কাঁধ পার হয়ে পিঠে পড়েছে। মাথায় কৃষ্ণ কালো চুলের রাশি—রঙীন স্নাকডার ফালি দিয়ে তাল পাকিয়ে পরিষ্কার বাঁধা। তাতে একগুচ্ছ ফুল।

দেখে একটি টুকরো স্নিত হাসি বিকশিত হয়ে উঠেছিল তাঁর মুখে। ভিখারিণী হলে কি হবে, জীবনে যৌবন-ধর্মের লীলা অমোঘ। তৈলহীন অবিস্তৃত চুলের বোঝার উপরে পুষ্পগুচ্ছটি গুঁজেছে লজ্জা। লজ্জার দৃষ্টিতে মুগ্ধ সন্মম। তার প্রতি দৃষ্টিপাতের জুজু তার চোখে ওই মুগ্ধ সন্ময়ের শিখা জ্বলে উঠেছে। সঙ্গে সঙ্গে সশ্রদ্ধ হাসি। সে যেন কৃতার্থ হয়ে গিয়েছিল। করতাল নিয়েই হাত দুটি কৃতজ্ঞলিতে আবদ্ধ করেছিল লজ্জা। মণিবন্ধে অনেকগুলি শব্দবলয় পরেছে, হাতের আঙুলগুলি দীর্ঘ—তার অনামিকায় পিতলের অঙ্গুরীয়। পারে? পারে

ভূষণ পরে নি ? হ্যা, তাও পরেছে। রূপদস্তার চরণভূষাও পরেছে।

আসবার সময়ও দেখেছিলেন। গোপূরমের মাথায় ঝোলানো বড় দীপাধারটির আলো পরিপূর্ণভাবে তার মুখে পড়েছিল। শুভ চক্ষুচ্ছদ রক্তাভ মনে হয়েছিল। চক্ষুপল্লবের দীর্ঘ রোমগুলি সিক্ত। লল্লা গান শুনে কঁদেছিল।

সেদিন রাত্রে লল্লার কথা ভেবেছিলেন। চিন্তিত হয়েছিলেন। যে যৌবন-ধর্ম পুষ্পিত বৃক্ষের পুষ্পগুচ্ছের দিকে তার অন্নকাঙাল ভিক্ষাপাত্রবাহী হাতটিকে ভিক্ষাপাত্রের কথা ভুলে প্রসারিত করে—সেই যৌবন-ধর্মে মানুষ মাটির বন্ধুরতার কথা ভুলে গিয়ে আকাশের চাঁদের দিকে তাকিয়ে পথ হাটে। মৃত্তিকা পরমাশ্রয়—সে আশ্রয়ে পাথর কঁটা কীট পতঙ্গ সন্ন্যাস পানান্দধরে তো অভাব নেই। আবার জ্যোৎস্নার বিষম-লাগা চোখে রতীন সাপকে মালা ভ্রম করে গলায় পরাও তো বিচিত্র নয়।

মনে পড়েছিল উল্লিকে। শিউরে উঠেছিলেন। লল্লাও পাগল হয়ে যাবে না তো! কাজীভরম থেকে ফিরে এসেই তিনি যোশেককে বলবেন ভেবেছিলেন। কাজীভরম থেকে পরদিন প্রাতে এক প্রহরের সময় রওনা হয়েছিলেন। সকলে প্রত্যাশা করেছিলেন শিবকাঞ্চী থেকে তাঁর আহ্বান আসবে। এর পূর্বে পূর্বে তাই হয়েছে। তিনি বৈষ্ণব—বরদরাজের শতশত মণ্ডপে গান তিনি প্রথম করে থাকেন, তারপর আহ্বান আসে শিবকাঞ্চী থেকে। একে একে একাধরেশ্বর, মাতঙ্গেশ্বর, ঐরাবতেশ্বর, ত্রিপুরাস্তকেশ্বর মণ্ডপে গান তিনি করেন। কোনবার এক যাত্রাভেই সেরে আসেন—কোনবার এক যাত্রায় সম্ভবপর হয় না, দুবার তিনবার যেতে হয় কাজীভরমে। এবার কোন মন্দির থেকে আহ্বান আসে নি। তিনি লোক পাঠিয়েছিলেন একাধরেশ্বর মন্দিরে কর্তৃপক্ষের কাছে। রজনাতন কাল প্রভু বরদরাজকে গান শুনিয়েছিলেন—আজ প্রভু একাধরেশ্বরের মণ্ডপে—

মধ্যপথেই রুচভাবে বাধা দিয়ে মঠাধীশ বলেছিলেন—না।

লোকটি বিস্মিত হয়েছিল। সঠিক বুঝতে পারে নি। সে কিছুটা বিলাস্তের মত শুক্ক হয়ে দাড়িয়েই ছিল, বলতে কিছু পারে নি, চলে আসতেও পারে নি।

মঠাধীশ বলেছিলেন—একাধরেশ্বর সম্প্রতি দ্বারবন্ধ করেছেন। অর্জুনের তপস্রায় যে কিরাত বেশে এসেছিলেন—সেই কিরাত বেশের জ্ঞা কি প্রায়শ্চিত্ত করবেন চিন্তা করছেন। প্রায়শ্চিত্ত শেষ হলে রজনাতন পালাটিকে যখন সম্পূর্ণ করবে তখন শুনবেন একাধরেশ্বর।

লোকটি ফিরে এসে সব বলতে রজনাতনও একটু চিন্তিত হয়েছিলেন। তিনি কি ভুল করেছেন? কোথাও কোন অপরাধ করেছেন মহেশ্বর মহিমা কীর্তনে? চিন্তাস্থিত হয়েই ফিরেছিলেন আশ্রমে।

আশ্রমে ফিরে আগাগোড়া রচনাটি পরীক্ষা করে দেখেছিলেন—খুব যত্ন এবং তীক্ষ্ণ সতর্কতার সঙ্গে বিশ্লেষণ করেছিলেন। কোথাও কোন অপরাধ তো চোখে পড়ে নি! হঠাৎ মনে হয়েছিল—বাস্য লিখেছেন—স্বর্ণকাস্তি কিরাতরূপী মহাদেব। হ্যা, এখানে তিনি বাখা করেছিলেন—হিমগিরির অরণ্যে যিনি হিমাচলে কাঞ্চনজঙ্ঘার জ্যোতিস্নাত হয়ে স্বর্ণকাস্তিতে বিচরণ করেন—তিনিই নীলগিরিতে বিচরণ করেন নীলাভ কৃষ্ণকাস্তিতে, নীলসমুদ্রের লাবণ্য অঙ্গে মেখে শবর বেশে। তাতে অপরাধ হয়েছে? না—কখনও না! আর কি? মহাভারতে অঙ্গক্ষের কথা নেই। তিনি অঙ্গক্ষের কথা বলেছিলেন। বলেছিলেন, দেবতা যখন ব্যাধ শবর বেশ ধারণ করেন তখন তাঁর দেবগন্ধকে লুকিয়ে কটুগন্ধই ধারণ করেন অঙ্গে। এতে অপরাধ হয়েছে? না। স্বীকার কর্তব্যে তিনি পারেন নি।

পরদিন পত্র লিখতে বসেছিলেন তিনি। লিখেও ছিলেন—“মহামাশ্র পূজ্যপাদ আচার্যদেব, দেবাদিদেব একাধরেখর দ্বার রুদ্ধ করিয়া কিরাভবেশ ধারণের জন্ত প্রারশ্চিত্তের চিন্তা করিতেছেন অবগত হইয়া কৌতূহলবশে একটি প্রশ্ন নিবেদন করিতেছি। দেবাদিদেব কি অনাদিকাল হইতে আশানবাসের নিমিত্ত প্রারশ্চিত্ত-কথাও চিন্তা করিতেছেন না?”

লিখে অনেকক্ষণ পত্রখানি ধরে বসেছিলেন। পাঠাবেন?

এই সময়েই তিনি গান শুনতে পেরেছিলেন। সমুদ্রতটে বসে কেউ গাইছে। অতি মিষ্ট নারীকণ্ঠ। এই লল্লা! লল্লা গাইছে। উপকূল অভিমুখী সমুদ্রবায়ু বয়ে নিয়ে আসছে। তিরক্কুলের পদ। দ্রাবিড় ভারতের ঋষি তিরুবল্লুর, প্রণাম তোমাকে। কি রচনাই দিয়ে গেছ! লল্লা গাইছে—

বেণু বীণা রবে কেন এত মিছে মোহ—

বালগোপালের হাসি-কাকলী

শুনিস নি কি তোরা কেহ?

বাঃ! এর আগে অবশ্য এমন করে মন দিয়ে কখনও লল্লার গান শোনেন নি রজনাতন। কানে ঢুকেছে—ভাল লেগেছে ওই পর্ষন্ত। তখন লল্লা সম্পর্কে কোন বিশেষ কৌতূহল ছিল না। সেদিন তাঁর মনে কৌতূহলের অনেক কারণ ছিল।

ওর সম্পর্কে যোশেকের কথাগুলি রজনাতনের মনে বিশ্বাসের সঞ্চার করেছিল। খুঁটান হয়েছে বলে যোশেকের তত্ত্বমুষ্টির সাহায্যও নেয় না। খুঁটান হবে না বলে গান গেয়ে ভিক্ষা করে খায়। ওদের পোশাকের লোভ সামলেছে। ওদের প্রবল প্রভাপের মোহও আচ্ছন্ন হয় নি। ওদের সাদা রঙ ওর চোখে কাজল পরায় নি। মনে মনে হয়েছিল—বাঃ বাঃ বাঃ।

তারপর উল্লিকে দেখে ওর সম্পর্কে একটি আশঙ্কা জেগেছিল। যদি অসহায়া বালিকাটি এমন করে পাগল হয়ে যায়! আহা-হা-হা!

পরশু কাজীভরমে গোপুরমের সামনে কুতাজলিপুট লল্লার চোখের অন্ধাভাবানত দৃষ্টি দেখে অন্তরে অন্তরে স্নেহ উচ্ছ্বসিত হয়ে উঠেছিল।

আজ গান গাইছে—সে গান মহর্ষি তিরুবল্লুরের তিরক্কুলের পদ। সপ্রশংস হয়ে উঠলেন রজনাতন—মনেক শিখেছে লল্লা।

তিনি সেদিন ঘর থেকে বেরিয়ে পড়েছিলেন। সমুদ্রতটে এসে দেখেছিলেন নারিকেলকুঞ্জে একটি বৃক্ষকাণ্ডে ঠেস দিয়ে বসে সে গাইছে।

কৃষ্ণ গোপাল—কৃষ্ণ গোপাল—কৃষ্ণ গোপাল—

বরদরাজ—বরদরাজ—বালগোপাল!

অংশটুকু লল্লা নিজে জুড়েছে ওর সঙ্গে। বুদ্ধিমতী লল্লা। বাঃ! পিছন দিক থেকে এসে তিনি থমকে দাঁড়িয়ে সরবে ‘বাঃ’ কথাটি উচ্চারণ করেছিলেন।

চমকে উঠেছিল লল্লা। চকিত ভক্তিতে পিছন ফিরে তাঁকে দেখেই লজ্জায় আনত হয়ে মাটির দিকে দৃষ্টি নিবদ্ধ করে যেন পাথরের মূর্তির মত স্থির হয়ে গিয়েছিল। রজনাতন বলেছিলেন—বাঃ! তুমি তো বড় চমৎকার গান কর! সুন্দর!

লল্লা উত্তর দিতে পারেনি। নীরবে আরও একটু যেন নত হয়ে গিয়েছিল। রজনাতন আর কথা খুঁজে পাননি। না পেয়েই বোধ হয় বলেছিলেন—খামলে কেন? গাও।

অতি মৃদু জড়িত কণ্ঠে সে বলেছিল—না প্রভু। আপনার সামনে গাইতে পারব না।

তারসে কথার আশ্চর্য আবেগ ছিল, কথা বলতেই কণ্ঠস্বর রুদ্ধ হয়ে যাচ্ছিল। সেইটিই

তার সব থেকে বড় আকৃতি ।

এবার রজনাক্ষন বলেছিলেন—তিরিকতুলের পদ শিখলে কি করে ?

—মঠে শুনেছি প্রভু । শুনে শিখেছি ।

—শুনে ?

—হ্যাঁ প্রভু । যেটুকু মনে থাকে লিখে রাখি ।

—লিখতে পার তুমি ? ও হ্যাঁ—যোশেক বলেছিল, তুমি পাদরীদের পাঠশালায় লেখাপড়া শিখতে ।

—অল্প শিখেছিলাম । তারপর মা আর পড়তে দেয়নি ।

—শুনেছি ।

—মা বলেছিল, লল্লা, তোর বাপ বলত কলাত্তরী আমার বরদরাজ স্বাগীর কিরুপা পাবে ।

—কলাত্তরী কে ?

এবার মুখ তুলে শ্রিত হেসে বলেছিল—আমি প্রভু । ডাকনাম আমার লল্লা । ছেলেবেলা থেকে গাইতে পারতাম, নাচতাম গান গেয়ে, বরদরাজের নাম গেয়ে । তালি দিত বাপ, ভাল ভঙ্গ হত না । তাই বাবা নাম রেখেছিল—, কাজীতে গিয়ে নামটা নিয়ে এসেছিল ; এক নৈফব সাধুর কাছে বাবা আমার কথা গল্প করেছিল—আমার গল্প ফুরোত না তার । সাধু বলেছিলেন, এ কত্তা তোমার কলাত্তরী কত্তা—বরদরাজ কিরুপা করবেন ।

রজনাক্ষন বুঝলেন, একটু হেসে বললেন—ও ! কলাবস্তী !

—হ্যাঁ প্রভু, কলাবস্তী । লজ্জিত ভাবে আবার সে মাথাটি নামাল ।

আপন মনে রজনাক্ষন শব্দটি বার তিনেক উচ্চারণ করলেন—কলাবস্তী । কলাবস্তী । কলাত্তরী ।

তারপর হঠাৎ বলে উঠলেন—কলাত্তরী—কল্যাণী ! কল্যাণী ! তুমি কল্যাণী হবে তার চেয়ে ।

মাথা সে আবার তুললে—কল্যাণী !

—হ্যাঁ, কল্যাণী । কলাবস্তীও তুমি বটে, কল্যাণীও তুমি বটে । তোমার কল্যাণী রূপটিই আমার ভাল লাগে লল্লা । আমি তোমাকে কল্যাণীই বলব ।

মুখ কণ্ঠে কৃতার্থের মতই সে বলেছিল—কল্যাণী !

—হ্যাঁ, কল্যাণী । নৃত্যগীতে পারঙ্গম হওয়া তুমি । কলাবস্তী নাম তোমার সার্থক হোক । কিন্তু জীবনে তুমি কল্যাণী হবে ।

দূর থেকেই সে প্রণতা হয়েছিল বেলাভূমের উপর । রজনাক্ষন পরম স্নেহে এগিয়ে গিয়ে তার মাথার রক্ষ কেশরাশিতে হাত রেখে বলেছিলেন—কল্যাণী হও ।

সেই ভূমিষ্ঠ অবস্থাতেই সে চমকে উঠেছিল—তার সে চমক তিনি মাথার হাত দিয়েই অনুভব করেছিলেন । সে উঠে কাতরস্বরে বলেছিল—আমাকে ছুঁলেন প্রভু !

রজনাক্ষন বলেছিলেন—তুমি সেদিন আমার গান শুনেছ কাজীভরমে । শোন নি, বৈকুণ্ঠ-ধামে যার বসতি তিনিই বাস করেন পৃথিবীতে, মাহুঘের সাদাকালো সকল চর্মের অন্তরালে ? এ কি, তুমি কীদছ ?

হাসবার চেষ্টা করে চোখ মুছে সে বলেছিল—এ শুনে আমার কান্না পায় প্রভু । এমন কথা তো কেউ বলে না । আপনি বড় ভাল—প্রভু, আপনি বড় ভাল ।

হঠাৎ তাঁর মনে পড়েছিল যোশেককে যে কথাটা বলবেন ভেবেছিলেন সেই কথাটা । এই

মেয়ে, এমন কণ্ঠস্বর, এমন সুগঠিত দেহ—নবপদ্যের মত শ্রাম দেহবর্ণ যা শবরদের মধ্যে দুর্লভ ; এই দুটি দীর্ঘায়ত চোখ ; এই কল্পা—আর এই মাংসভ্রাতার কাল, এর—

উরিকে মনে পড়েছিল। তিনি বলেছিলেন—তোমার অভিভাবক কে কল্যাণী ?

তিনি তার দিকে চেয়ে ছিলেন, সে আনত দৃষ্টিতে মাথা নীচু করে বসে ছিল। নীরবতার পর এই বাক্যটি হারিয়ে গিয়েছিল, সে ধরতে পারেনি। তিনি আবার ডেকেছিলেন—কল্যাণী !

—আমাকে বলছেন প্রভু ?

—হ্যাঁ। এই মাত্র যে তোমার নাম দিলাম কল্যাণী।

হেসে সে বললে—কল্যন্তরী নামও আমার সবসময় খেয়াল থাকে না। লজ্জা না বললে—

হাসলে আরও একটু।

—তোমার অভিভাবক কে ? যোশেফ ?

—অভিভাবক ? না প্রভু। মানুষ কেউ আমার অভিভাবক নেই। নিতান্ত বালিকা বয়সে, আমার তখন ছ-সাত বছর বয়স—

—জানি, যোশেফ আমাকে বলেছে। বলেছে—সে তোমাকে খুঁটান-ধর্মে—

—ও কথা শুনতেও আমাকে বারণ করে গেছে আমার মা। আমার বাবা বলে গেছে আমি বরদরাজের কুপা পাব। আমার কাকা আমার অভিভাবক নয়। ; সে আমাদের সব নিয়ে নিয়েছে। ও ব্যবসা তো আমার বাবার ব্যবসা। বাড়ি জমি তাও নিয়েছে। আমাকে হয়তো—আমাকে বেচে দেবে ফিরিকীদের কাছে।

তার সুন্দর শাস্ত্র চোখ দুটি উত্তেজনার বিস্ফারিত হয়ে উঠেছিল। মস্ত ললাটখানি ভরে উঠেছিল সারি সারি কুণ্ডলরেখায়। রক্তনাথন বলেছিলেন—তাহলে কে তোমার অভিভাবক ?

—মা মরবার সময় বলে গেছে—লজ্জা, বরদরাজ তোকে দেখবেন।

কথাটা এবার ঘুরিয়ে পেড়েছিলেন তিনি—তোমার বাবা কি তোমার বিয়ের কোন সন্ধ করে যায় নি ?

—না প্রভু।

—তোমার মা ?

—তিনিও না। তিনি বলে গেছেন, এদের কাউকে বিশ্বাস নেই লজ্জা। এরা সব খুঁটান হয়ে যাবে। তুই ওই বরদরাজের গন্ধিরের চারপাশ ঝাড়ু দিবি। ভিক্ষা করবি।

—তা হলে—

—আমি তাই করব প্রভু। গান গাইতে পারি, ছেলেবেলা থেকে গান গেয়ে ভিক্ষে করি। বাইরে—দেবহানেই বেশী কেটেছে আমার। গ্রামে কখনও কখনও আসি। এদের মতন থাকা—সে আমি আর পারব না প্রভু।

সে অকস্মাৎ সমুদ্রের দিকে মুখ করলে। তারপর বললে—আজ আমি আপনার কাছেই এসেছিলাম প্রভু। কথাকলি নাচ শিখবার আর গান শিখবার যদি কোন সুবিধা করে দেন—

—তোমার কাকাও আমাকে বলেছিল—

—সে আমার শত্রু। তার নাম আপনি করবেন না। শুধু আমার নয়—আপনারও। আজ সকালে কাঞ্চী থেকে এসে গ্রামে গিছিলাম। সেখানে দেখলাম কাকা আপনার নামে গজরাচ্ছে। বলছে, গান গেয়ে শবরদের আপনি অপমান করেছেন। আপনাকে দেখবে।

রজনাক্ষন সবিস্ময়ে বললেন—আমি অপমান করেছি ?

—তারা তাই বলছে ।

—তুমি ? তুমিও তো শবরকন্ঠা কল্যাণী । তোমার মনেও কি আঘাত লেগেছে ?

—সেদিন রাতে গান শুনতে শুনতে কেঁদেছিলাম । আপনি যখন বেরিয়ে এলেন তখনও চোখের পাতায় জল লেগে ছিল । ভালবাসায় গাছুষ কীদে—সে কাল সেদিন কেঁদে বুঝেছি ।

—তবে এরা কেন রাগ করলে বলতে পার ?

—তা তো জানি না । শুধু এরাই নয়, শিবকাঞ্চীতে তারা নাকি আপনাকে কখনো ডাকবে না ।

—সেটা জানি ।

তারপর অনেকক্ষণ দুজনেই স্তব্ধ হয়ে ছিলেন । তিনি ছিলেন সমুদ্রের দিকে তাকিয়ে—লল্লা ছিল মাটির জগতের দিকে তাকিয়ে । সমুদ্র ছিপ্রহরের আভাসে ঘনতর নীল এবং তরঙ্গশীর্ষ তীব্রোজ্জ্বল রৌদ্রচ্ছটায় ঝলমল করে উঠে পরক্ষণেই গাঢ় নীলের মধ্যে ডুবে যাচ্ছে । তিনি শুধু ভাবছিলেন—কেন ?

—কেন ? এরা এমনি—

—প্রভু !

—কিছু বলছ ?

—আপনি আমার মাথায় হাত দিয়ে আশীর্বাদ করেছেন । এবার যাবার সময় আগি চরণ স্পর্শ করে প্রণাম করি ?

—নিশ্চয় । তুমি কল্যাণী । আর আমার প্রভুর কাছে সংসারে সব গাছুষ সমান । হয়তো লল্লা, সবাই তিনি । ভক্ত শুধু আগি ।

—কি সুন্দর কথা প্রভু !

প্রণাম করে উঠে সে বলেছিল—আমার নাচগান শিখবার স্বযোগ কি হবে না প্রভু আগি শবরী বলে ?

—দেখব আমি । এবং হবে, নিশ্চয় হবে ।

বেলাভূমির নারিকেল সুপারির ঘন বীথিকার মধ্য দিয়ে সে চলে গিয়েছিল । তিনি চিন্তিত মনে ফিরে এসেছিলেন—কেন ? কেন ? কোথায় কোন্ ক্রটি বিচ্যুতি ঘটল ?

অনেকক্ষণ পর তিনি চিন্তকে দূর করে বলে উঠেছিলেন—না, আমার অস্ত্রায় হয় নি—হয় নি । আমি সত্যকে প্রকাশ করেছি । সত্যেরও আঘাত আছে । মিথ্যাশ্রমী এবং ভ্রান্তজনেরা সে আঘাতে আহত হয় । ক্রুদ্ধ হয় । হোক—তাই হোক । তিনি আবার এই গান করবেন । সারা দেশে এই গানে সুরে কথায় আচ্ছন্ন করে দেবেন ।

এ সব তো এই এক মাস আগের কথা । এক মাস পর শুক্লা ত্রয়োদশী ছিল কাল, কাল ওই গান গেয়ে ফিরবার পথে এই ঘটনা ।

* * * *

কালও লল্লা ছিল—বাইরে যেসব শ্রোতা দাঁড়িয়ে শুনছিল তাদের প্রথম সারিতে । কালও একটি দীপাধারের আলো তার মুখের উপর পড়েছিল । সে তাঁকে শ্রদ্ধা করে—গভীর শ্রদ্ধা ; সেটা সে তাঁকে প্রতিবার নিবেদন-কালে জানাতে চায় ; তাই সে এমন করে দাঁড়ায় প্রতিবার । কালও তার দীর্ঘ অক্ষিপল্লবগুলি জ্বুজে ছিল । তিনি তাঁর মুখের দিকে তাকিয়েছিলেন । কাল

তার সঙ্গে কথা বলবার তাঁর ইচ্ছা ছিল। কিন্তু কতাকুমারীর একদল যাত্রী এসেছিল পার্শ্বসারথি ও কপালীশ্বর দর্শনে। তাঁদের এক প্রোতা কুমারী সন্ন্যাসিনী তাঁকে এসে অভিনন্দিত করতে গিয়ে তাঁর বিলম্ব করে দিয়েছিল—সেই সময় সে চলে গিয়েছিল। আজ সে এসেছিল তাঁকে অজ্ঞাত আততায়ীরা আঘাত করে আহত করেছে শুনে। ছুটে এসেছিল। এসে দূরে গোশালার চালায় বেদনার আর্তিতে যেন নিজে ভেঙে পড়ে কোন রকমে খুঁটি ধরে দাঁড়িয়ে ছিল। চোখ ছিলছিল করছিল তিনি দেখেছেন। ঠোঁট দুটিও কাঁপছিল নিশ্চয়। শাস্ত কোমল-প্রকৃতি ভক্তিমতী মেয়েটি কথা কইবার সুযোগ পেলে বোধ হয় শুধু ‘প্রভু’ এই কথাটি উচ্চারণ করেই রুদ্ধবাক হয়ে যেত। চোখের কোণ দুটি থেকে অশ্রুর ছুটি ধারা গড়িয়ে পড়ত। ঠোঁট দুটি কেঁপে উঠত প্রবল কম্পনে। তাঁকে এরা ধরেছে শবরদের চর।

কিন্তু তারা কি শবর? শবরই যদি হয় কেন তাকে তারা আঘাত করলে? তিনি তো তাদের ভালবেসেই ওই পরম সত্যকে প্রকাশ করেছিলেন তাঁর সমস্ত জীবনাব্যয় দিয়ে। তারা তো এর পূর্ব পর্যন্ত তাঁকে গভীর ভালবাসা দিয়ে অভিষিক্ত করেছে। এদের বালক বালিকা যুবক প্রৌঢ় যে মুখ দৃষ্টিতে, প্রশংসা-প্রসন্ন হাসিতে তাঁর যে আরতি করেছে তা তো ব্রাহ্মণ শৈব ধনী বিদ্বানেরা করে নি। তারা দিয়েছে প্রসাদ, এরা করেছে পূজা। তবে? তা ছাড়া—। গন্ধের কথা এরা তুলেছিলেন। কথাটা খুব যুক্তিসঙ্গত। গাত্রগন্ধ একটা আছে। সেটা ছদ্মবেশে ঢাকা পড়ে না। গাত্রগন্ধ একটা পেয়েছিলেন। সেটা কি শবরদের?

না।

তবে? শৈবদের?

তারা হি বা এতটা ক্ষিপ্ত হবেন কেন? হতে পারে। ধর্মের আবেগ—প্রবলতম আবেগ। স্বর্গলোক থেকে পৃথিবীর বুকে যে বেগের প্রচণ্ডতা নিয়ে গঙ্গা ধরে পড়েছিলেন, সে বেগের মুখে ঐরাবত ভেসে গিয়েছিল, তার থেকেও এ আবেগের বেগ প্রচণ্ড—প্রবলতর, প্রচণ্ডতর।

একটা গভীর দীর্ঘনিশ্বাস কেমনে। কি করবেন তিনি? তিনি তো হৃদয় কলহ হিংসা চাননি। বরং উচ্চৈঃস্বরে চেয়েছেন। তবে এমন কেন হল!

—আচার্য রজনাতন রয়েছ?

কণ্ঠস্বর শুনে চমকে উঠলেন রজনাতন। যোশেকের কণ্ঠস্বর। যোশেক—

—আচার্য—

নিজেকে সংযত করে নিয়ে তিনি উত্তর দিলেন—যোশেক, এস এস।

যোশেক এসে ঢুকল। চোখে তার প্রখর দৃষ্টি, পদক্ষেপ যেন যুদ্ধকাঙ্গার মত উজ্জ্বল এবং অপ্রয়োজনে দীর্ঘ ও সবল।

—তোমাকে কারা আঘাত করেছে শুনলাম রাজির অন্ধকারে?

একটু হেসে রজনাতন বললেন—হ্যাঁ। মাথায় আঘাত করে তারা দ্রুত-পদে চলে গেল। সন্ধের সঙ্গীরা সংখ্যায় তাদের থেকে বেশী ছিল এবং কাছেরই ছিল। নইলে হয়তো—

—আমি দুঃখিত আচার্য। কিন্তু তার থেকেও বড় দুঃখে ক্ষুব্ধ যে তুমি আমাদের সন্দেহ করছ।

—আমি করি নি যোশেক, করেছেন অপর সকলে। তুমি মাস্তাজের শ্রেষ্ঠী গোপালনের দোকানে—

—হ্যাঁ হ্যাঁ বলেছিলাম। মনে আঘাত লেগেছিল আমার।

—একটা প্রশ্ন করব তোমাকে ?

—মেরেছি কি না ? আচার্য, আমি মারলে এইটুকু আঘাত দিতাম না। উচ্চবর্ণের হিন্দু, বিশেষ করে আর্যর যারা তারা দেহের শক্তিতে দুর্বল ভীক, কিন্তু কুটিল এবং মারাত্মক তাদের বিষ। সাপের মত। এদের মাঝখানে পা দিয়ে ছেড়ে দেওয়ায় বিপদ আছে। আমি একেবারে মেরে ফেলতাম।

—তা আমি প্রশ্ন করি নি।

—ও তবে খুঁটান হয়েছি বলে জিজ্ঞাসা করছ ? শোন আচার্য, খুঁটান হয়েও শবর ছিলাম এটা ভুলতে পারি না।

—তাও নয় ভাই। আমার প্রশ্ন আমি তো তোমাদের ভালবাসি এবং সেই কথাই তো বলেছি। তবে কেন হুঃখ পেলে তোমরা ?

—কেন ?

এ প্রশ্নে স্তব্ধ হয়ে যোশেক তাঁর মুখের দিকে তাকিয়ে রইল। বোধ হয় ভেবে নিলে। 'তার পর বললে—কথাটা তোমার সত্য। এতটা ভাবি নি। তবে এটা সত্য রঙ্গনাথন, গান শুনে রাগ হয় আমাদের। সঙ্গে সঙ্গে এও বলি, আঘাত আমরা করি নি। এটা বিশ্বাস করো।

—বিশ্বাস করলাম যোশেক।

—আমার ভাইঝি লগ্না এসেছিল ? তাকে এখানে শ্রীনিবাস চৌকিদার দিয়ে পাকড়ানে চেয়েছিল আমাদের গুপ্তচর বলে ?

—হ্যাঁ। আমি প্রতিবাদ করেছিলাম যোশেক। কিন্তু তারা শোনে নি।

—তাও শুনেছি। কিন্তু সে তোমার ভক্ত। ভক্তি করে। তোমার গান সে আমাদের সকলের চেয়ে ভালবাসে। তাই সে এসেছিল বোধ হয়। গুপ্তচর আমাদের নয়। আমাদের কেউই সে নয় আর। তার মা তাকে আমাদের পর করে দিয়ে গেছে। তাকে ভিক্ষুক করে দিয়ে গেছে। মন্দির বাঁট দিয়ে খেতে বলেছে। সে ভিক্ষুক। শবরদের চেয়েও অধম। গুপ্তচর হলে শৈবদের—আমাদের নয়।

একটু তিক্ত হেসে বললে—চর সে কাকরই নয় রঙ্গনাথন—সে তোমার উচ্ছিষ্ট-সন্ধানী লোভী কুকুরী।

—যোশেক !

রঙ্গনাথনের কর্ণধর উচ্চ হয়ে উঠল এবার।

হেসে যোশেক বললে—সেদিন বালুবেলায় তোমাদের আলাপ আমাদের কেউ কেউ দেখেছে, শুনেছে। তার কাছে তুমি বড় ভাল—বড় ভাল রঙ্গনাথন। তুমি তার মাথায় হাত দিয়ে আশীর্বাদ করেছ, সে তোমার পায়ে হাত দিয়েছে, এর কিছু অজানা নেই আমাদের। সে যদি আমাদের হত, তা হলে তোমার কাছে এর জন্ত কৈকিয়ত চাইতাম। কিন্তু সে ভিক্ষুক। আমাদের সে কেউ নয়। আচার্য রঙ্গনাথন, তোমাকে আঘাতকারী যদি কেউ লগ্নার প্রতি লুক্ক ব্যক্তি হয়, তবে তাও আশ্চর্য হব না আমি। তোমার গান শুনতে শুনতে সে যেন মোহগ্রস্ত হয়, এলিয়ে পড়ে। এ হয়তো তুমি জান না, কিন্তু আমরা জানি। শবরদের যারা পালা গান শুনতে যায় তারা বলেছে আমাকে। সেদিনই বলেছে, ওই কথাপ্রসঙ্গে।

রঙ্গনাথন কেমন সঙ্কুচিত হয়ে গেলেন। বিস্ফারিত দৃষ্টিতে তার দিকে তাকিয়ে রইলেন। যোশেক বললে—তুমি আঘাত পেয়েছ, তার জন্তে আমি হুঃখিত। আমি আঘাত করলে তোমাকে হত্যা করতাম। কল্যাণটি আমাদের কেউ নয়। আচ্ছা, চললাম।

চলে গেল সে। রত্ননাথন দাঁড়িয়ে রইলেন স্তম্ভিতের মত।

সামনের সমস্ত কিছু যেন অর্থহীন হয়ে গেছে। হৃবোধ্য একটা এলোমেলো বিশৃঙ্খলা—
সব যেন ফাঁকি হয়ে যাচ্ছে। চিত্তলোক অন্ধকার। কানে কিছু শুনছেন না।

বুকে একটা কিসের আঘাত চলেছে। অল্পভবে বুঝছেন।

হে বরদরাজ স্বামী! ক্ষমা কর। ক্ষমা কর প্রভু।

অকস্মাৎ একটি যন্ত্রণা-কাতর মুদ্রু আত্মনাদ তাঁর কানে এসে ঢুকে তাঁকে সচেতন এবং ঈষৎ
চকিত করে তুললে।

উঃ! উঃ! উঃ মা!

কি? কে? কোথায়?

উঃ-হু-হু!

এ তো সেই লল্লা! কিন্তু—।

দিক লক্ষ্য করে রত্ননাথন গোশালার দিকে তাকালেন। গোশালার চালার পাশেই
বিচালির স্থূপ। পোয়াল অর্থাৎ, এলো খড় স্থূপের মত করে রাখা হয়েছে। সেটার মাথা
নড়ছে। শব্দ ওখান থেকেই আসছে। তিনি দ্রুতপদে এগিয়ে গেলেন। ই্যা, পড়ে গেল
পোয়ালের মাথাটা। পোয়ালের পিছন দিকেই ঘন বৃক্ষবেষ্টনী। সেই দিক থেকে পোয়াল ঠেলে
উঠে দাঁড়াল লল্লা। মাথার রক্ষ চূলে মূগে খড়ের কুটি লেগেছে কিন্তু সেদিকে তার লক্ষ্য ছিল
না—একটা যন্ত্রণায় তার মুখ বিকৃত হয়ে উঠেছে। দাঁড়িয়ে সে যেন এই যন্ত্রণার মধ্যেও সঙ্কোচে
প্রাণপণে নিজেকে সামলাতে চেষ্টা করছে।

—কি হল? লল্লা! লল্লা!

—ওঃ, কিসে আমাকে কামড়েছে প্রভু!

—কোথায় কামড়েছে? কোন্ জায়গায়?

—পিছন দিকে। ঠিক ঘাড়ের নীচে। চুলের মধ্যে ঢাকা পড়েছে।

—দেখি দেখি।

লজ্জায় সে যেন মাটির সঙ্গে মিশে গেল, বললে—না প্রভু, আমি যাই, সমুদ্রের জলে গিয়ে
ডুব দিই। তাতে সেটা ছেড়ে দেবে।

—না, দেখি। তোমার লজ্জার এতে কারণ নেই।

—আমি শবরী।

—না, তুমি মানুষ। অবাধ্য হতে নেই। বস পিছন ফিরে।

বলতে বলতেই তিনি নিজেই তার পিছনে গিয়ে দাঁড়ালেন। সেও অবাধ্য হল না, বসল।
রত্ননাথন সন্তর্পণে তার অযত্ন-বদ্ধ, রক্ষ, পোয়ালের ধূলায় ধূসর চুলের বোঝায় হাত দিলেন।
লল্লা বললে—দেখবেন প্রভু, আপনাকেও হয়তো কামড়াবে।

রত্ননাথন সন্তর্পণে চুলের বোঝা ওলটাতে ওলটাতে বললেন—ওখানে ঢুকলে কেন?

—ভয়ে প্রভু। ঘরে যখন শবরদের কথা বলছিলেন শ্রেষ্ঠী গোপালন, তখন বাইরে কয়েক-
জন কে আমার দিকে আঙুল দেখাচ্ছিল। আমি ভয়ে ওই পোয়ালের পিছনদিকে গিয়ে
লুফিয়েছিলাম। তারপর আমার নাম করতে ভয়ে ওই পোয়ালের ভিতর—

রত্ননাথন বললেন—এ কি! এ যে—! এঃ, রক্ত বের করেছে কামড়ে!

বিষাক্ত বৃশ্চিক জাতীয় কীট। কর্কটের মত দুটো দাড়ায় তার পিঠের মাংস কেটে কামড়ে
ধরেছে এবং হল দিয়ে দংশন করেছে। দাড়ায় কাটা, ক্ষত থেকে রক্তের একটি ধারা গড়িয়ে

এসেছে। তখনও ছাড়ে নি। নিষ্ঠুর আক্রোশ হয়েছে কীটটার। রজনাতন মুহূর্ত চিন্তা করে তাঁর পুরু উত্তরীরের তাঁজে কীটটাকে সঙ্গর্শনে দৃঢ় হুটি আঙুলে চেপে ধরে সজোরে টেনে নিলেন। লজ্জা যন্ত্রণার চীৎকার করে উঠল। উঃ—

কিন্তু অর্ধপথেই নিজেকে সংযত করে শুরু হল। হাতে টিপেই সেটাকে মেরে ফেলে দিয়ে রজনাতন বললেন—লজ্জা, এ বিষাক্ত ছোট বৃশ্চিক। তুমি কি যন্ত্রণার সঙ্গে অবসন্নতা বোধ করছ?

—হ্যাঁ প্রভু।

—তোমাকে বিশ্রাম করতে হবে। আমার কাছে ওষুধ আছে লাগিয়ে দেব। ওঠ। উঠতে পারবে?

—আমার কোন গাছতলার শুইয়ে দিন প্রভু।

—না। ঘরে বিশ্রাম করবে।

—না।

অর্তস্বরে সে বলে উঠল।

—না নয়। ওঠ।

—তা হলে ওই গোশালার—

—না। না। ওঠ। একি তুমি যে কাঁপছ!

—বড় যন্ত্রণা হচ্ছে। আর—

মুখ চোঁট যেন শুকিয়ে গেছে, চোখ দুটির পাতা ঢলে আসছে। দাঁড়িয়ে ভেঙে পড়ছে। রজনাতন তাকে দুই হাত প্রসারিত করে, হাতের উপর শুইয়ে ঘরে নিয়ে গিয়ে শুইয়ে দিলেন। বিড় বিড় করে প্রতিবাদই করলে লজ্জা, কিন্তু কণ্ঠস্বর জিহ্বা যেন জড়িয়ে যাচ্ছে। রজনাতন তার মুখে খানিকটা জল দিলেন খাবার জন্য। মুখ ধুইয়ে দিলেন। মাথাটা ধোয়ানোর প্রয়োজন। পিছনের বারান্দায় নিয়ে গিয়ে প্রচুর জল ঢাললেন মাথায়। আরও খানিকটা জল খাওয়ালেন। এতে একটু সুস্থ হয়ে চোখ মেলতে চেষ্টা করলে লজ্জা। রজনাতন বললেন—চুপ করে শুয়ে থাক। আমি বাইরে থেকে একটা শিকড় তুলে আনি। খাওয়ালেই এবু ওই-খানে ঘষে লাগালেই অনেকটা সেরে যাবে। কিন্তু কথা শুনো, উঠো না তুমি।

বাইরে এসে নিজের বাগান খুঁজে শিকড় ওষুধ তুলে এনে গোলমরিচ মিশিয়ে বেটে খানিকটা খাইয়ে দিলেন,—কয়েক মুহূর্ত পরেই লজ্জা যন্ত্রণা উপশমের আরামে বলে উঠল, আঃ। সঙ্গে সঙ্গে হাতখানি বাড়িয়ে কিছু যেন খুঁজলে।

রজনাতন জিজ্ঞাসা করলেন—কি, কি খুঁজছ?

—আপনার চরণের ধুলো একটু—

—না।

—প্রভু, দিন। তাতে আমার মনে বল হবে।

এবার দ্বিধা করলেন না রজনাতন। তিনি বিশ্বাসের বলকে জানেন। নিজে তার মাথার হাত বুলিয়ে দিয়ে বললেন—এবার ঘুমোও দেখি একটু।

—আমাকে এইবারে বাইরে—

—চুপ কর।

উৎকণ্ঠিত দৃষ্টিতে তিনি জানালার দিকে তাকিয়ে ছিলেন। উঠে গিয়ে জানালার দাঁড়ালেন। বৃক্ষবেষ্টিত একটি কাঁক দিয়ে দেখা যাচ্ছে শহর থেকে গ্রামে আসবার যে পথটা

তার আশ্রমের সুমুখ দিয়ে চলে গেছে, সেই পথে দূরে, জন দুই সওয়ার এবং কয়েকজন লোক আসছে। সওয়ারদের পোশাক যেন কোতোয়ালীর পোশাক। মাদ্রাজের ফিরিজিদের কোতোয়ালী কোথায় যাবে? এখানে নয় তো? যদি হয়! হওয়া খুবই সম্ভব! হঠাৎ তার মাথাটা ঘুরল যেন আপনা-আপনি।

লজ্জা অবসন্ন লতার মত পড়ে আছে! বোধ হয় ঘুম আসছে। বিব্ব এবং ওষুধ দুয়ের ক্রিয়াতেই এখন ও আচ্ছন্নের মত পড়ে থাকবে কয়েক প্রহর। তারা লজ্জাকে খুঁজছিল। শ্রীনিবাসন প্রতিজ্ঞা করে গেছে, এর প্রতিকার সে করবেই। লজ্জাকে যদি ধরে! মুহূর্তে কর্তব্য স্থির করে ফেললেন রজনাতন। পাশের ছোট ঘরটির দরজা খুলে ফেললেন। ঘরটিতে আবার দুখানি ঘর। একখানি ভাণ্ডার, তার ওপাশের খানি পূজার। পূজার ঘরে সুন্দর একখানি সিংহাসনে বরদরাজ স্বামীর অল্পকৃতি, তার পাশে লক্ষ্মী, আর একটি আসনে পিতৃলের নটরাজ-মূর্তি। নানান ধরনের সুশোভন সামুদ্রিক শস্য, কড়ি কিছুক দিয়ে সাজানো। ফুল বিছানো। এই ঘরে, দেবতার সামনে মেকের উপর, লজ্জার অসাড় নমনীয় দেহখানি বয়ে নিয়ে গিয়ে শুইয়ে দিলেন। মনে মনে বললেন, ওর অপরাধ কিছু নেই প্রভু। যদি অপরাধ হয় তবে আমার। দণ্ড আমাকে দিয়ো। তুমি ওকে রক্ষা কর।

তাড়াতাড়ি বেরিয়ে এসে দরজা বন্ধ করে তালা বন্ধ করে দিলেন। তারপর ভাণ্ডার ঘর থেকে এ ঘরে এসে, দরজা বন্ধ করে আপন আসনে বসলেন।

মাথার ক্ষতে এতক্ষণে যেন যক্ষণা বোধ করছেন। ক্লান্তিও বোধ হচ্ছে। একটা দীর্ঘনিঃশ্বাস ফেলে মনে মনে বললেন, হে বরদরাজ! হে বৈকুণ্ঠেশ্বর!

অস্থপদশস্য যেন আশ্রমের বাইরেই থামল। রজনাতন বুঝলেন, তার অনুমান মিথ্যা হয় নি। যারা আসছিল তারা এখানেই এসেছে। কণ্ঠস্বরও শুনলেন পরমুহূর্তে—আচার্য রজনাতন!

—আসুন।

ভিতরে এলেন কোতোয়ালীর কর্মচারী। অভিবাদন করে দাঁড়ালেন। রজনাতন উঠে বাইরে এলেন—বলুন।

—মাননীয় শ্রীনিবাসন আমাদের পাঠালেন। বললেন, আচার্যের আশ্রম পাহারা দিতে হবে। সারা শহরে নানান গুজব রটেছে। বলছে, আচার্যের আশ্রম যে কোন মুহূর্তে আক্রান্ত হতে পারে।

—সে কি! কে আক্রমণ করবে? এবং কেনই বা করবে?

—যারা আক্রমণ করেছিল, এবং যে কারণে করেছিল তারাই করবে, সেই কারণেই করবে।

রজনাতন বিব্রত হয়ে উঠলেন এবং তিক্তও হলেন—না না না। এ ধারণা ভ্রান্ত। এ হতে পারে না। আপনারা যান।

—আমরা আদেশের দাস। স্থানত্যাগের ভো আদেশ নেই।

—বেশ, আমি স্থানত্যাগ করছি।

—তাহলে, প্রভু, আমরা একজন আপনার সহগামী হব, একজন এখানে আপনার গৃহ রক্ষার জন্ত থাকব।

‘সুস্তিত হয়ে গেলেন রজনাতন। সারা চিন্তা বিদ্রোহী হয়ে বলে উঠল, এ কী অত্যাচার!

কর্মচারীটি বললেন—শুধু তাই নয় আচার্য, মীনানীর ত্রিনিবাসন বলে দিয়েছেন যে আপনি যেন এখন তাঁকে না জানিয়ে কোথাও গান করতে যাবেন না।

—কাজীভরম এবং মহাবলীপুরম তাজোর এসব স্থান এখনও কোম্পানীর অধিকারের বাইরে। সেখানে নিশ্চয় এ আদেশ বলবৎ নয়।

—তা নয়। কিন্তু মাজাজের এলাকা পর্যন্ত আমরা সঙ্গে থাকব। তারপর অল্প সীমানার পা দিলেই আমরা ফিরে চলে আসব। আচার্য, জানেন না আমরা শুনে আসছি শহরে উত্তেজনা প্রবল। পাদরীরা উত্তেজিত হয়েছে তাদের উপর দোষাত্মক করা হয়েছে বলে, হিন্দুদেরও শৈব যারা তারা উত্তেজিত হয়েছে, তাদের সন্দেহ করা হয়েছে বলে। আপনার গুণমুখেরা অত্যন্ত ক্ষুব্ধ আপনার উপর আক্রমণের জন্য। ওদিকে প্রভু ত্রিনিবাসন কোম্পানীর বড় সাহেবের সঙ্গে দেখা করেছিলেন, তিনি আদেশ দিয়েছেন আক্রমণকারীদের সন্ধান করা চাই। সারা শহরে লোক বেরিয়েছে, খুঁজছে কোথায় গেল সেই শব্দ ভিখারিণী।

অসহায় অথচ ভিক্ত কর্তে রজনাতন বললেন—তার জন্য আমাদেরই গৃহবন্দীর মত আপনাদের প্রহরাধীনে বাস করতে হবে?

—না না না। আমরা আপনার আজ্ঞাধীন, আপনাকে রক্ষা করবার জন্যই এসেছি। আপনার মঙ্গলের জন্য।

—আমি অত্যন্ত বিব্রত বোধ করছি। আমি মনে করি আমার শত্রু কেউ নেই। আমি কারুর শত্রু নই। রক্ষা আমাকে করেন এবং করতে পারেন একমাত্র আমার দেবতা আমার প্রভু শ্রীবরদরাজ।

কিসের যেন শব্দ উঠছে না? রজনাতন কথা বলতে বলতেও উৎকর্ণ হয়ে আছেন। প্রায় চেতনাহীন হয়ে পড়ে আছে লল্লা। তার তো নিজের উপর কোন সংঘম নেই, সে তো জানে না এদের উপস্থিতির কথা।

কোতোয়ালীর কর্মচারী বললে—আচার্য জানেন না এমন কথা অনেক আছে।

দৃঢ় কর্তৃ উষ্ণ হয়েই বললেন রজনাতন—সব কথা কেউ জানে না ভাই। ভাল, এখন আমার অনুরোধ—আপনারা কোন বৃক্ষতলে ছায়াতে বিশ্রাম করুন। আমার পূজার সময় হয়েছে। আমি পূজা করব। এ সময়—

—নিশ্চয়। নিশ্চয়। তাই আমরা যাচ্ছি।

তারা বারান্দা থেকে নেমে ছায়াঘন একটি লতামণ্ডপের তলদেশে গিয়ে বসল।

রজনাতন ছোট ঘরটির প্রথম দরজা খুলে ভাণ্ডার ঘরে প্রবেশ করলেন। তারপর ঢুকলেন পূজার ঘরে। অসম্ভবত্বাঙ্গা লল্লা লুটিয়ে পড়ে আছে লতার মত। মুখে এখনও যন্ত্রণার ছাপ রয়েছে। তার একখানি হাত গিয়ে পড়েছে পূজোপকরণগুলির উপর। ছোট একটি ধূপাধারে ধূপশলাকা পুড়ছিল—শেটি পড়ে গেছে। হাতখানির চাপে ধূপশলাকা নিভে গেছে। শব্দটি সম্ভবত এই জন্য হয়েছে। যুদ্ধ কাতর শব্দ একটি মধ্যে মধ্যে বেরিয়ে আসছে শ্বাস-প্রশ্বাসের সঙ্গে। রজনাতন নাড়ী দেখলেন। নাড়ী দুর্বল—কিন্তু আশঙ্কা করার মত কিছু নয়। একটু দুধ দিলে বোধ হয় উপকার হত। ভোগের দুধ আছে। পূজাতে তাঁর আড়ম্বর নেই। অল্প কিছু ফুল-চন্দন-ধূপ-দীপ আর ভোগ—দুধ ও শর্করা এবং নারিকেল ও কদলী; ভোগের পূজা হয়ে গেছে। বিপ্রহরের পূজার সামগ্রী সাজিয়ে তারপর তিনি সহায়ভূক্তি-জ্ঞাপনকারীদের সঙ্গে দেখা করেছেন। এখন বিপ্রহরের পূজা কেমন করে করবেন? ভোগ না দিয়েই বা দুধ কেমন করে খাওয়াবেন লল্লাকে? লল্লা ইঁদুর করেছে—জল চাইছে। চোখ মেলেও চাইলে একবার। চোখ ঝলুঝলু হয়ে

উঠেছে। চোখের তারা ছুটি যেন স্বচ্ছ। তিনি মুহূ স্বরে ডাকলেন—লল্লা!

লল্লা সাড়া দিলে না। আবার হাঁ করলে।

রজনাতন দেবতার চরণোদক নিলেন কুশীতে, তারপর ঢেলে দিলেন তার মুখে। আবার সে হাঁ করলে, আবার—আবার। একবার আরক্ত চোখ মেলে বিভ্রান্তের মত লল্লা বললে—আঃ! তারপর তাঁর দিকে তাকিয়ে বললে—বড় জালা সর্বাঙ্গে।

বলেই আবার সে চোখ বন্ধ করলে। রজনাতন ভাবলেন একটু, তার পর সংকল্প স্থির করে দেবতার সামনে থেকে একটু সরিয়ে পূজোপকরণগুলি আবার ঠিক করে নিয়ে বসে করজোড়ে বললেন—হে বরদরাজ! করুণাময়! যদি অপরাধ হয়, সে দণ্ড আমাকে দিও। তোমার ভক্তিতে বিগলিত এই বালিকার প্রাণরক্ষার জন্য তোমার পূজা করব সংক্ষেপে এবং তোমার এনাদ দিগ্বেই ওর সেবা করব।

আবার লল্লা অশ্রুত স্বরে বললে—বড় দাহ, বড় জালা!

রজনাতন ভেবে নিলেন এক মুহূর্ত। তারপর আসন ছেড়ে উঠে ভাণ্ডার ঘরের কোণে রক্ষিত বড় মাটির কলসী থেকে বড় ভৃঙ্গার পরিপূর্ণ করে নিয়ে এসে বসলেন। আচমন করে, সংক্ষেপে প্রাথমিক কৃত্যগুলি সেরে, ভৃঙ্গারের জল নিয়ে উচ্চ কণ্ঠে মন্ত্রোচ্চারণ করে দেবতার মাথায় কুশীতে করে জল ঢেলে গোটা ভৃঙ্গারটি নিয়ে উঠে এসে লল্লার শিরে বসে আবার উচ্চ কণ্ঠেই উচ্চারিত মন্ত্রের সঙ্গে তার সর্বাঙ্গ জলধারায় অভিষিক্ত করে দিলেন।

আত্রেয়ী ভারতী গঙ্গা যমুনা চ সরস্বতী।

সরযুগুণ্ডকী পুণ্যা শ্বেতগঙ্গা চ কৌশিকী ॥

ভোগবতী চ পাতালে স্বর্গে মন্দাকিনী তথা।

সর্বা স্মনসো ভূত্বা ভৃঙ্গারৈঃ স্নাপয়ন্ত তাঃ ॥

সিন্ধু-ভৈরব-শোনাভা যে হ্রদা ভূবি সংস্থিতা।

সর্বে স্মনসো ভূত্বা ভৃঙ্গারৈঃ স্নাপয়ন্ত তে ॥

লবণেশু—সুরাসপিদ্ধিহিহুঙ্ক-জলাত্মকাঃ।

সমুত্তে সাগরাঃ সর্বে ভৃঙ্গারৈঃ স্নাপয়ন্ত তে ॥

অভিসিঙ্কনের স্নিগ্ধতায় লল্লার দেহের জালা যেন জুড়িয়ে গেল। সে আবার চোখ মেলে চাইলে। মুহূস্বরে বললে—আরও। আঃ!

আবার এক ভৃঙ্গার জল এনে দেবতার চরণ স্পর্শ করিয়ে নিয়ে মন্ত্রোচ্চারণ করে তাকে স্নান করিয়ে দিলেন। লল্লার ধূলি-ধূসরতা ধুয়ে গেল—শুদ্ধতাও মুছে গেল খানিকটা। সে আবার মুহূস্বরে বললে—আঃ!

এবার পূজা সারলেন রজনাতন। লল্লার সঙ্গে প্রত্যক্ষ সংযোগস্পর্শ না থাকলেও তার অস্তিত্বের স্পর্শ রজনাতন অহুভব করেও নিজেকে অশুচি মনে করলেন না। পূজা সেরে ভোগ নিবেদন করে দুধটুকু নিয়ে তিনি লল্লার মাথার গোড়ায় বসে মুহূস্বরে ডাকলেন—লল্লা!

লল্লা চোখ মেলে চেয়ে বললে—জ্যা! তারপর সন্মত হুঁসে বললে—প্রভু!

—দুধটুকু খাও তো। হাঁ কর আমি ঢেলে দিই। হাঁ কর।

লল্লা কিন্তু হাতে ভর দিয়ে উঠতে চেষ্টা করলে। একটু উঠেই সে সভয়ে অশ্রুত আতর্জন করে উঠল। তিনি এক হাতে লল্লার মুখ চেপে ধরে বললেন—চূপ কর লল্লা। বাইরে কোতোয়ালীর লোক—

ধরথর করে কাঁপছে লম্বা। ফিসফিস করে বজলে—আমি শবর-কন্না, পূজার ঘরে—

—চূপ কর। .না হলে উপায় ছিল না। দেবতা তাতে রুষ্ট হন নি। তিনিই তোমাকে রক্ষা করবেন। আমি বলছি। খাও। তুমি খাও। গুদের অনেক অর্ধসত্যো ছলনা করে বৃক্ষতলে বসিয়ে রেখে এসেছি। তুমি স্নহ হয়ে ঘুমোও। আর ভয় নেই। এবার স্নহ হয়ে উঠবে। শুধু শব্দ করো না।

বেরিয়ে দরজা বন্ধ করে রজনাতন বেরিয়ে গেলেন। লম্বা হাত জোড় করে বরদরাজের ক্ষুদ্র অহুর্ভূতিটির দিকে তাকিয়ে বসে রইল। কিন্তু একটু পরেই আবার ক্লান্ত হয়ে শুয়ে পড়ল।

রজনাতন বাইরে এসে দেখলেন গ্রহরী ছুটি বৃক্ষচ্ছায়াতলে সমুদ্রের আর্দ্রবায়ুস্পর্শে গভীর ঘুমে আচ্ছন্ন হয়ে পড়েছে। তিনি ওপাশের বারান্দার রান্নাঘরে রান্নার আয়োজনে বসলেন। এ বাড়িতে তিনি একাই বাস করেন। এ পর্যন্ত কোনদিন শত্রুর ভয় তিনি করেন নি। রমণীহীন সম্পদহীন গৃহ, থাকবার মধ্যে ছুটি দুগ্ধবতী গাভী। তা নিয়েও চোরের ভয় ছিল না। নিজেও স্নহ-সবল-দেহ যুবা। বাল্যাবধি কর্মের পরিশ্রমে অভ্যস্ত। বৈষ্ণব গুরুর আশ্রমে এবং সঙ্গীত শিক্ষক আচার্যের গৃহে শ্রমসাধ্য কর্মে তাঁদের সাহায্য করতেন। কুড়ুল দিয়ে কাঠ-চেলানো এবং নিজ হাতে কুপিয়ে বাগান করা ছিল তাঁর প্রিয় কর্ম। জলও তুলতেন কূপ থেকে। এখানে নিজের আশ্রমে এখনও কাজগুলি অবসরমত করে থাকেন। পরিচারক বৃদ্ধ কুড়ুমণির কর্মের লাঘব করে দেন। বৃদ্ধ পরিচারক কুড়ুমণির পাশের গ্রামেই বাড়ি। সে রাতে বাড়ি যায়, সকালে আসে। গরু দুটির পরিচর্যা করে। শহর থেকে প্রয়োজনমত জিনিসপত্র আনে। তিনি গানের নিমন্ত্রণে বাইরে গেলে সে অবশ্য এখানেই শোয়। আজ ভোরবেলাতেই তিনি তাকে পাঠিয়েছেন তিরু আল্লিকেনি—পার্শ্বসারথি মন্দিরে। সেখানে আজ পূর্ণিমার তাঁর গানের কথা ছিল। দুর্ঘটনার কথা জানিয়ে মার্জন্য চেয়েছেন রজনাতন। সংবাদ হয়তো তাঁরা পেয়েছেন, কিন্তু তবু তাঁর দিক থেকে তিনি জানিয়েছেন। তাঁর স্বস্তির যন্ত্রীরা কখন কাল রাতে এখানে থেকে সকালে আপন আপন বাড়ি চলে গেছে। নিরীহ যন্ত্রশিল্পী—তারা ভয়ও পেয়েছে। তাদের বাড়ি সব এই দিকেই কাছাকাছি পল্লীতে। বৃদ্ধকে না পাঠিয়ে উপায় ছিল না।

স্বস্তির নিঃশ্বাস ফেললেন রজনাতন। ভাগো বৃদ্ধ এখানে ছিল না। থাকলে তার চোখ এড়িয়ে বেচারা লম্বা ওই পোয়ালের মধ্যে আত্মগোপন করতে পারত না। কোতোয়ালীতে তার লাঞ্ছনার সীমা থাকত না। আজ তার চেয়ে এই বৃশ্চিক-বিষ-জালাও তার পক্ষে অনেক ভাল।

বরদরাজ তাকে রক্ষা করেছেন। তাঁর পায়েই তাকে উনি রেখে এসেছেন।

আবার তিনি বললেন—এবার ক্ষুট কণ্ঠেই বললেন—হে বরদরাজ। তুমি পতিভের ভগবান। আজ তোমার চরণে তার আশ্রয় নেওয়ার যদি অপরাধ হয়ে থাকে তবে সে অপরাধ আমার—তার নয়। দণ্ড দিতে হলে আমাকে দিয়ো। তুমি অন্তর্যামী, তুমি জান—তোমার জন্ত তার কত আকৃতি। তুমি তাকে রক্ষা কর।

*

*

*

. . .

বরদরাজস্বামী—পতিভের ভগবান! বিপন্নর রক্ষক! অনন্ত করুণার আধার! রজনাতনের উপলব্ধি মিথ্যা নয়। তিনি সঠিক সত্যকেই উপলব্ধি করে গান রচনা করেছিলেন—“যিনি বসবাস করেন বৈকুণ্ঠে তিনিই বাস করেন শবর-পল্লীতে, সকল পতিত পল্লীতে—ওই ওদের

মধ্যে—ওদের কৃষ্ণচর্মের অন্তরালে। কৈদ্যাসে যিনি বাস করেন ভবানীপতি—তিনিও
 আছেন ওদের মধ্যে। ওদের কৃষ্ণচর্ম দেখে যদি তোমার ঘৃণা হয়, ওদের পল্লীর অপরিচ্ছন্নতার
 কটু গন্ধে যদি তোমার বিধা হয় কাছে যেতে, তবে তোমার জানা হবে না তাঁকে। ব্রাহ্ম-
 তনয় তুমি, ব্রহ্মাভিলাষী,—ক্রোধে,—ঘৃণায়, অহংকারে শিকার মধ্যে তোমার জানা হয় নি
 ব্রহ্মকে। আমি নারী—আমার ধর্মে আমি অধিষ্ঠিতা। আমার যিনি পতি তিনি শুধু আমার
 পূজ্যই নন, তিনি আমার প্রিয়—প্রিয়তম। তাঁর সেবা আমার ধর্মই শুধু নয়—সেই আমার
 জীবনধর্ম, সেই আনন্দ—যার স্বাদে আর ব্রহ্মের স্বাদে প্রভেদ নেই। তুমি তাতে আমার
 উপর ক্রুদ্ধ হলে। সে ক্রোধে ক্ষতি হয় নি, হবে না আমার। সুতরাং তোমার পরমসত্য
 পরমতত্ত্বকে জানা সম্পূর্ণ হবে ব্যাধ-পল্লীতে, ব্যাধধর্ম অধিষ্ঠিত ধর্মব্যাবহের কাছে। ঘৃণা করো
 না, নাসিকা কুঞ্জন করে প্রবেশ পথে দাঁড়িয়ে যেয়ো না। প্রবেশ করো। তুমি কি জানো,
 ভবানীপতি মহারুদ্ধ কিরাতরূপেই দেখা দিয়েছিলেন তপস্তা-পরায়ণ অর্জুনকে। অর্জুন কিরাত
 বলে অবজ্ঞা করেছিল, ঘৃণাও করেছিল। কিরাতরূপী ভগবান তার সে শক্তির অবজ্ঞা চূর্ণ করে-
 ছিলেন তার বুকে একটি মৃষ্টাঘাত করে। ঘৃণাকে উপহাস করেছিলেন—অর্জুনের ইষ্টকে
 নিবেদন করা মাধ্যস্থানি তাঁর কর্ত্তে ধারণ করে। হিমগিরির কাঞ্চনজঙ্ঘার স্বর্ণচ্ছটায় প্রতিভাত
 স্বর্ণকাস্তি কিরাত নীলগিরিতে যখন আসেন তখন তিনি সুনীল সমুদ্রলাবণ্যে অবগাহন করে হন
 নিবিড় নীলকাস্তি।”

অপার বরদরাজের করুণা। এবং হয়তো আশ্চর্য সত্য তাঁর উপলব্ধি। লল্লা যেন রহস্তের
 মহিমা দেখিয়েই গভীর রাত্রে ঘুমন্ত গ্রহরীদের ব্যঙ্গ করে অন্তর্হিত হয়ে গেল।

অপরাজে স্তম্ভ হয়ে উঠেছিল লল্লা এবং কৈদেছিল। তাঁকে বলেছিল—আর নয়, এবার
 আমার জ্ঞান হয়েছে, আমি স্তম্ভ হয়েছি। প্রভু, এ পূজা-মন্দিরে আতুর বলে চেতনাহীনা আমার
 যে অধিকার ছিল সে আর নেই। আমার অপরাধের জন্য আমি ভাবি না প্রভু, রাজপ্রতিনিধির
 শাস্তি-লাঞ্ছনাকেও আমার ভয় নেই। আপনি আমাকে বের করে গ্রহরীদের হাতে সমর্পণ
 করুন। প্রভু—

রজনাতন বলেছিলেন, না।

—আমার জন্ত বরদরাজ আপনার উপর রুষ্ট হবেন। আপনার তপস্তা—

বাধা দিয়ে রজনাতন বলেছিলেন, আমার তপস্তা এতেই পূর্ণ হবে কল্যাণী। তুমি লল্লা নও,
 নও কলাবন্তী, তুমি কল্যাণী। তুমি থাক। দেবতার মহিমার মত তুমি এই ঘরে থাক। মিথ্যা
 বলব না কল্যাণী, আমি যে বরদরাজের করুণাধন মহিমাকে আজ প্রত্যক্ষ করছি আমার পূজার
 ঘরে। কিন্তু আর কথা বলো না। ওরা এখনও সন্দেরের অবকাশ পায় নি। এরপর কখন
 কোন মুহূর্তে সন্দের করে বসবে। এই প্রভুর প্রসাদ রইল—দুধ, শর্করা, কদলী। পেয়ো।
 দুর্বল হয়েছ—বল প্রয়োজন।

—কিন্তু কতদিন রাখবেন প্রভু?

—ওই ঠুঁকে প্রশ্ন কর।

—যদি আমার অস্তিত্ব ওরা জানতে পারে তবে আপনাকে যে লাঞ্ছনা ভোগ করতে হবে।

প্রভু, না—

—চুপ। তারপর শ্মিত হেসে বলেছিলেন—সেই লাঞ্ছনায় আমার তপস্তা পূর্ণ হবে
 লল্লা।

লল্লা শব্দটির মধ্যে সঙ্গীত আছে। শব্দটি আপনি বেরিয়ে এসেছিল কল্যাণীর পরিবর্তে।

তিনি বাইরে এসে বীণা বাজিয়ে গান করেছিলেন। প্রথমেই সঙ্গীত অধিষ্ঠাত্রী দেবতার বন্দনা করে গেয়েছিলেন গোটা দক্ষিণ ভারতে বহু প্রচলিত স্তবগান—

কলাদেবতে শরণম
বন্দে মধুর চরণম—
বন্দে মধুর সঙ্গীত দেবতে কলাদেবতে শরণম—
সত্য সুর সুরপিণী
সমস্তকে হৃথহারিণী
আনন্দ মদবাহিনী
আনন্দ ভৈরব মোহিনী
তালমেল সঙ্গিলিত নানিত
রাগরঙ্গিণী হৃদয়হাসিনী
মেঘ মধুরিম মঙ্গল বদনম্
মোহ দরদী
জীবজীবনী জীবজীবনী
কলাদেবতে—
কলাদেবতে শরণম।

প্রহরী দুটি বিভোর হয়ে শুনেছিল। কুড়ুমণি বাড়ি যেতে যেতেও যেতে পারে নি। কুড়ুমণি পার্থসারথি মন্দির থেকে ফিরে এসেছে একটু আগে। বৃদ্ধ মাহুষ, তার উপর একটু পেটুক সে। সেখানে প্রসাদ পেয়ে ছপুরে বিশ্রাম করেছে। তার উপর নদী পার—সমুদ্রের কাছাকাছি নদীগুলি মোহনার কাছে বিস্তারে বিপুল; খরায় নৌকা এপার থেকে ওপারে গেলে ফিরতে প্রায় একবেলা কেটে যায়। আদিয়ার নদী পার হতে দেরি হয়েছে। ফিরবার পরই সে বাড়ি যাবার জন্ত ব্যস্ত হয়েছিল। তাকে এবং প্রহরী দুটিকে তাদের রাজের খাবার দিয়ে তিনি বীণা নিয়ে বসেছিলেন। তন্ময় হয়ে গিয়েছিলেন গানে। তাঁর নিজের চোখ থেকে জল গড়িয়ে পড়ছিল, প্রহরী দুটি বার বার চক্ষু মার্জনা করেছিল, কুড়ুমণি হুঁপিয়ে কঁদেছিল। তিনি বেশ অল্পভব করেছিলেন পূজার ঘরেও লল্লা কঁদেছিল শুয়ে শুয়ে। রাত্রির প্রথম প্রহর পার হয়ে গেলে বীণাটি তিনি রেখে তাঁর শয্যার উপর শুয়ে পড়েছিলেন। কান পেতে জেগে ছিলেন, নিজা তাঁর আসে নি লল্লার সাড়ার জন্ত। লল্লা কি ঘুমিয়েছে? ঘুমন্ত অবস্থায় গভীর দীর্ঘনিশ্বাস-প্রশ্বাস উঠছে কি? কিছুক্ষণের মধ্যেই প্রহরী দুটির মূহু নাসারব উঠতে শুরু করেছিল। কুড়ুমণির নাসাগর্জন প্রবল। লল্লা কি এখনও জেগে? কই, তার শ্বাস-প্রশ্বাস তো গভীর হয়ে ওঠে নি। উঠে গিয়ে দেখতেও সাহস হয় নি। কি জানি কখন কে জেগে উঠবে। সন্ধ্যায় ভোগ ও দীপারতির পর দেবতার শরন হয়, তারপর সে দ্বার প্রভাত পর্যন্ত খোলা হয় না। দরজা খুললে যদি শব্দে জেগে ওঠে। দরজা তিনি ভালাবন্ধ আজ করেন নি এই জন্তই। জেজ্ঞানো আছে। তবু যদি দেখে, শব্দ হয়! রাজে প্রহরী দুটিকে গাছতলা দেখিয়ে দিতে পারেন নি। তারা বারান্দায় শুয়ে।

এরই মধ্যে তাঁরও তন্দ্রা এসেছিল। হঠাৎ পায়ের কিছু স্পর্শে তিনি জেগে উঠেছিলেন। চোখ মেলে চেয়ে দেখে তিনি যেন পাথর হয়ে গেলেন। লল্লা! লল্লা তাঁর পায়ের হাত দিয়ে প্রণাম করেছে। সে বেরিয়ে এসেছে ঘর থেকে। তাঁর কণ্ঠ থেকে একটা চীৎকার বেরিয়ে আসতে চেয়েও পথ পেলো না। কে যেন তাঁর কণ্ঠ রোধ করে চেপে ধরেছে। লল্লা, কিন্তু

দাঁড়াল না, কোন কথাও বললে না, প্রণাম করেই লঘু পদে ঘর থেকে বেরিয়ে ঘর এবং বারান্দার মাঝের দরজার ক্ষণেকের জন্ত দাঁড়াল ; বাইরে পূর্ণিমার পরিপূর্ণ জ্যোৎস্না, দুধ-সুত্র স্বচ্ছতার প্রকৃতি যেন ক্ষীরসমুদ্রে অবগাহন করে অমলধবল স্পষ্টতার স্পষ্ট ; অদূরবর্তী সমুদ্রে পূর্ণিমার জোয়ার উঠেছে। তরঙ্গাঘাতের শব্দের সঙ্গে কল্লোলধ্বনি উঠেছে। লজ্জা মুহূর্তের জন্ত দাঁড়িয়ে—বোধ হয় বারান্দার ঘুমন্ত তিনজন মানুষকে দেখে নিরে সন্তর্পিত লঘু পদক্ষেপে তাদের পাশের খালি জায়গার উপর দিয়ে একেবেঁকে বেরিয়ে নেমে গেল বারান্দা থেকে। উজ্জানে জ্যোৎস্নার মধ্যে ওকে স্পষ্ট দেখলেন। লঘু দ্রুত পদে লজ্জা উজ্জান প্রবেশমুখে আশ্রমপ্রবেশের কটকে গিয়ে দাঁড়াল। সেও ক্ষণেকের জন্ত—তারপর সে বেরিয়ে দুটির অন্তরালে যেন অদৃশ্য হয়ে গেল।

এতক্ষণ তাঁর স্তম্ভিত চেতনা ফিরল তড়িতাহতের মত। তিনি চীৎকার করতে চাইলেন, লজ্জা! কিন্তু সংযত করলেন নিজেকে। এবং উঠে ঘর থেকে বের হয়ে এলেন। এই গভীর রাত্রি, এই রাত্রি একা কিশোরী লজ্জা কোথায় যাবে? মাৎস্যজ্ঞানের কাল। রাজসক্তি সারা দেশে ভেঙে পড়েছে। গ্রামে গ্রামে হিংস্রক চোর ডাকাত লম্পট ঘুরে বেড়ায় দল বেঁধে। শহরে কোম্পানীর তেলেকী সিপাই, গোরা সিপাই মদ খেয়ে সমুদ্রতটে হজ্জা করে। ধনীর উজ্জান-বাটিকায় মত্ত কণ্ঠের স্থলিত বাক্য, তাল-ছন্দ-কাটা নূরুধনি নটরাজের অপমান করে। ভগবানের পৃথিবীতে ম্যানমগ্ন ভগবানের অঙ্গে নিক্ষিপ্ত হয় অশুচি আবর্জনা—এই রাত্রি ও যাবে কোথায়? তার উপর আজ সারাটা দিন বৃশ্চিক-বিষে আচ্ছন্ন হয়ে ছিল। মৃত্যু-যন্ত্রণার মত যন্ত্রণা ভোগ করেছে। ও যাবেই বা কতদূর? দ্রুতপদে তিনি আশ্রম থেকে বেরিয়ে এলেন। কই, কোথায় লজ্জা?

জ্যোৎস্না-প্রাণিত পৃথিবী; গাছের তলদেশে শুধু অন্ধকার। তিনি তাকালেন লজ্জাদের গ্রামের পথের দিকে। কই? সারা বালুময় পথটা জ্যোৎস্নায় ঝিকঝিক করছে। শূন্য পথ। মাস্তাজ যাবার পথের দিকে চাইলেন। সেদিকেও তাই। অনেক দূরে শহরের দুটো পাকা বাড়ি দেখা যাচ্ছে। আলো জ্বলছে দীর্ঘদেশে। বহু দূর থেকে ভেসে আসছে কয়েকটা কুকুরের চীৎকার। কিন্তু লজ্জা কই? নেই তো! পূর্ব দিকে সমুদ্রবেলা। তবে কি এদিকে গেল! ছুটে এগিয়ে গেলেন তিনি। উঁচু বালুর বালিয়াড়ি ক্রমশ নিম্নভূমিতে নেমে গেছে। তার পরেই তাঁল নারিকেল সুপারি বনের সারি; পূর্ণিমার চাঁদ মধ্যগগনে, গাছগুলির ছায়া তাদের পায়ের তলার জমেছে ঘন হয়ে, মধ্যে মধ্যে পত্র-পল্লবের ফাঁক দিয়ে গড়া টুকরো টুকরো জ্যোৎস্না দীর্ঘ রশ্মিভঙ্গের মত ওই ছায়ায় বিচ্ছিন্ন করছে। বায়ু-তাড়নার পল্লব-আন্দোলনে যেন উৎক্লিপ্ত বিক্লিপ্ত হচ্ছে। হ্যাঁ, ওই যে, ওই চঞ্চল দোলারমান জ্যোৎস্নার খণ্ডগুলি কখনও একটি মহুস্ত-মূর্তির মাথায়, কখনও পিঠে কখনও পায়ে পড়েছে। তার আভাষ সর্বাঙ্গ আভাসে ছায়ামূর্তির মত দেখাচ্ছে। লজ্জা চলছে ওই নারিকেল তালের সারির কোল ঘেঁষে, ওরই ছায়ায় আশ্র-গোপন করে চলতে চাচ্ছে।

তিনি আবার চীৎকার করে ডাকতে গিয়ে থেমে গেলেন। প্রহরীরা জেগে উঠবে। তিনি নিজেকে ছুটলেন। এসে দাঁড়ালেন নারিকেল তালের সারির মধ্যে। সামনে সমুদ্র, পূর্ণিমায় উত্তাল জোয়ারে উচ্ছ্বসিত। আঘাতের পর আঘাত করছে ভটভূমিতে, এক একটা বৃহৎ উচ্চ তরঙ্গ আছড়ে পড়ে এই গাছগুলির তলদেশ পর্যন্ত চলে আসছে। একটা গুরুতর তাঁর পা ভিজিয়ে দিল।

ওই চলছে লজ্জা! ওই! টুকরো টুকরো আলোর মধ্যে রহস্তমূর্তির মত দেখা যাচ্ছে মাঝে মাঝে। তিনি আবার ছুটলেন দক্ষিণ মুখে। ওই মুখেই লজ্জা চলছে, স্তম্ভিত মহাবলীপুরমের

দিকে।

খানিকটা গিয়ে আবার তিনি দাঁড়ালেন। কতদূরে লল্লা! লল্লা, যেও না, এত দূর পথ! তুমি দুর্বল, তুমি যুবতী, এই গভীর রাত্রি। লল্লা, তুমি দাঁড়াও। কিন্তু কই, আর তো দেখা যাচ্ছে না!

স্বল্প উচ্চকণ্ঠে তিনি ডাকলেন—লল্লা!

সমুদ্রের কলরোলে ঢাকা পড়ে গেল। একটা ঢেউ আবার আছড়ে পড়ে এগিয়ে এসে তাঁর পা ভুবিয়ে দিল। আবার অগ্রসর হলেন। ডাকলেন—লল্লা!

এবার চোখে পড়ল, নারিকেল সারির ছায়ার মধ্যে সঞ্চরমান জ্যোৎস্নার একটি কালি তাঁকে দেখিয়ে দিল একটি নারিকেল কাণ্ডে ঠেস দিয়ে বসেছে লল্লা। তার দেহের কাপড়ের কয়েকটি অংশ স্পষ্ট হয়ে উঠল। লল্লা বসেছে। ক্রান্ত হয়ে বসতে বাধ্য হয়েছে। এ কি! এলিয়ে পড়ল যেন!

ক্রতপদে তিনি এগিয়ে গেলেন। ই্যা, লল্লা নারিকেল গাছের তলায় কাত হয়ে শুয়ে পড়েছে। একটু নত হয়ে তিনি ডাকলেন—লল্লা!

চমকে উঠল লল্লা—কে?

—ভয় নেই লল্লা, আমি।

—প্রভু! আপনি!

সে আবার স্থির হল। একটা দীর্ঘনিঃশ্বাস ফেলে বললে—ভেবেছিলাম, পারব চলে যেতে। কিন্তু পারছি না। বড় দুর্বল বোধ হচ্ছে।

—কেন চলে এলে লল্লা? ছি ছি ছি!

রত্ননাথন বললেন তার শিরে। মাথাটি তুলে নিলেন কোলে—তুমি বেরিয়ে এলে, আমি তোমাকে কথা বলতে পারলাম না ওরা জেগে উঠবে বলে।

তার ললাটে হাত বুলিয়ে দিয়ে বললেন—দেখি তোমার নাড়ী।

মণিবন্ধটি হাতে নিয়ে পরীক্ষা করে বললেন—দুর্বল! এ দুর্বল অবস্থায় কি করলে বল তো!

লল্লা চুপ করে রইল শিষ্ট বালিকার মত।

রত্ননাথন ভাবলেন কি করবেন একে নিয়ে। মহাবলীপুরম অনেক দূর। মাহারাজ, তার নিজের গ্রাম, তার জ্ঞান বন্ধনরজ্জু আর নির্ধাতনের দণ্ড ধরে বসে আছে। জ্যোৎস্নার একটি মোটা টুকরো এসে পড়ল তাঁদের উপর। তিনি দেখলেন লল্লা একদৃষ্টে তাঁর মুখের দিকে তাকিয়ে আছে। মুহূর্তে তাঁর দৃষ্টিও নিবন্ধ হয়ে গেল লল্লার মুখের উপর। লল্লার চুল একরাশি এবং সেগুলি ঘন কুঞ্জে কুঞ্চিত। চোখ দুটি আয়ত, প্রশান্ত, প্রসন্ন। স্তম্ভচ্ছদ দুটি মুক্তাগর্ভ গুপ্তির ভিতরদিককার মতই নীলাভ শুভ্র, গাঢ় কালো মুক্তার মতই তার দুটি টলটল করছে। চন্দ্রালোকে দীপ্তি বিজ্জ্বলিত হচ্ছে।

লল্লা বোধ হয় সচেতন হয়ে উঠল তাঁর দৃষ্টিতে। সে চোখ বুজল। রত্ননাথন ডাকলেন—লল্লা!

—প্রভু—

—কি ভাবছিলে লল্লা?

বলতে পারলেন না, কি দেখছিলে লল্লা আমার দিকে তাকিয়ে। কণ্ঠস্বর তাঁর গাঢ় হয়ে এসেছে। একটা উদ্ভাপ যেন তাঁকে উত্তপ্ত করে তুলছে। একটা মাদকতার ক্রিমার মত

ক্রিয়া তাঁকে যেন আচ্ছন্ন করেছে। দেহের শিরায় রক্তের প্রবাহে মাথার স্বায়ু মধ্য কি যেন উষ্ণতা; কিছু যেন; সমস্ত চিত্ত আচ্ছন্ন করবার মত তীব্র একটা কিছু বয়ে যাচ্ছে। মুদিত-চক্ষু লল্লার ললাটে জ্যোৎস্নার প্রতিবিম্ব ফুটে উঠেছে। ললাটে হাত বুলিয়ে দিয়ে আবার ডাকলেন—লল্লা!

লল্লার ললাট লীভল। চোখ বুজেই অতি ক্ষীণ হেসে সে উত্তর দিল—ভাবছিলাম আপনিই আমার সাক্ষাৎ বরদরাজস্বামী।

আবেশে আচ্ছন্ন হয়ে গেলেন রজনীনাথন। গভীর স্নেহে মুখটি আনত করে হঠাৎ থামলেন। আপন মুখের উপর তাঁর উষ্ণ নিশ্বাসের স্পর্শে চোখ মেলে লল্লা। বিস্ফারিত চোখে বললে—প্রভু!

রজনীনাথন উত্তর দিলেন না, বিরত হলেন না, তার ললাটে একটি চুষন দিয়ে বললেন—এ তোমার বরদরাজের আশীর্বাদ।

একমুহুর্তে কঁদে আকুল হয়ে পড়ল লল্লা। শুধু বাক্যহীন রোদন।

রজনীনাথন তাঁর কাঁধ ধরে একটু আকর্ষণ করে বললেন—ওঠ। পারবে উঠতে?

মন্ত্রমুগ্ধার মতই লল্লা উঠল। রজনীনাথন বললেন—আমার কাঁধে ভর দাও। না পার তো বয়ে নিয়ে যাব। বল।

—কোথায় প্রভু?

—কেন আমার গৃহে।

—প্রভু—

—কোন ভয় নেই লল্লা।

—প্রভু, প্রহরীরা—

—কোন ভয় নেই। তোমার ধরে নিয়ে যেতে পারবে না তারা। দেব না। ভেবে না তুমি।

—আপনার বিপদ হবে। না না—

—হবে না।

—কি বলবেন? কি করে বাঁচাবেন প্রভু? একটা ভিখারিণী শবরকন্টার জন্তু আপনি স্বল্প জাতিচ্যুত হবেন।

—জাতিচ্যুত! না।

স্থির নিম্পলক দৃষ্টিতে তার দিকে তাকিয়ে রজনীনাথন বললেন—না। তবুও তোমাকে ছেড়ে দেব না।

আবার বললেন উচ্চতর কণ্ঠে—না। তোমাকে কোন কালে ছেড়ে দেব না। না।

দৃষ্টি তাঁর উন্মাদের মত। দেহ তাঁর কাঁপছে। হাতে তাঁর অঙ্গুলীপ। শঙ্কিত কণ্ঠে লল্লা বললে—প্রভু!

রজনীনাথন বললেন—ভয় পেয়ে না। আমাকে ঘৃণা করো না লল্লা। প্রয়োজন হয় তোমার জন্তু জাতিচ্যুত হব। আমি শবর হব। তোমাকে ছাড়তে আমি পারব না।

লল্লাকে সবলে বুকের মধ্যে আকর্ষণ করলেন রজনীনাথন। যৌবনের খে নিত্যলীলায় অকস্মাৎ একদা লীভাস্ত্রে, বাতাসের স্পর্শে গতি পরিবর্তিত হয়, সূর্যের স্পর্শে নব তাপের সঞ্চারণ, পৃথিবীর রঞ্জে রঞ্জে কামনা জাগে, সেই তাপে কামনার রজনীনাথনের এত কালের সব সংকল্প ভেঙে গেল।

লজ্জার অধরোষ্ঠের উপর নিজের অধরোষ্ঠ স্থাপন করে মুক করে নিলেন তাকে, নিজেও মুক হয়ে গেলেন। কয়েক মুহূর্ত পর তাকে ছেড়ে দিয়ে বললেন—কামনার কাছে আমি পরাজিত হয়েছি, মাথায় করে নিয়েছি তাকে, কিন্তু আমি কামার্ত পশু নই লজ্জা। তোমাকে আমি বিবাহ করব।

নিজের গলা থেকে তুলসীর মালাখানি খুলে তার গলায় পরিয়ে দিয়ে বললেন—সমুদ্র সাক্ষী রেখে তোমাকে বরণ করলাম আমি। প্রয়োজন হয় আমি জাতিচ্যুত হব। আমি জানি সমাজ জাতিচ্যুত করলেও বরদরাজ ত্যাগ করবেন না। একান্তে দূরে চলে যাব দুজনে। শবরী নয়, ব্রাহ্মণী হবে তুমি।

লজ্জা তাঁর পায়ে লুটিয়ে পড়ল। বললে—আপনিই আমার বরদরাজ।

—তুমি তা হলে লক্ষ্মী।

আবার তাকে তুলে বৃকে ধরলেন। তারপর বললেন—চল।

—না। শাস্ত কণ্ঠে লজ্জা বললে—বড় ভাল লাগছে এখানে। কি সুন্দর চাঁদ! অগরুপ জ্যোৎস্না! সমুদ্রের কি রূপ!

—বেশ, এই সমুদ্রবেলাভূমে হোক আমাদের বাসর।

স্নেহে রক্তনাথন লজ্জাকে নারিকেল কুঞ্জতলে বসিয়ে দিয়ে তার পাশে বসলেন।

একটি উচ্ছ্বসিত উত্তাল তরঙ্গ বেলাভূমে আছড়ে পরে তাঁদের পা পর্যন্ত এসে স্পর্শ করে ফিরে গেল।

রক্তনাথন বললেন—আজ পূর্ণিমা, সমুদ্র উত্তরোল হয়ে উঠেছে।

* * * *

বালুচরে পাতা বাসরশয্যার তাঁরা দুজনেই তন্দ্রায় আচ্ছন্ন হয়ে পড়েছিলেন। ঘুম ভাঙল পাখীর কলরবে। সামুদ্রিক পাখীর দল ভোরের মরা জ্যোৎস্নায় দল বেঁধে চক্রাকারে উড়তে শুরু করেছে আকাশ থেকে ঝরে-পড়া শুভ্রদল আকাশকুসুমের মত। স্থলচারী বিহঙ্গেরা গাছের মাথায় মাথায় কলরব করেছে। যে দু-একটি শাখা-প্রশাখাবিশিষ্ট গাছ আছে তার পত্রপল্লবের মধ্যে ছোট পাখীরা দলবদ্ধ শিশুর মত প্রভাতী কাকলীতে মুগ্ধ হয়ে উঠেছে। পূর্বে অস্তুহীন সমুদ্রের যেখানে আকাশ সমুদ্র-জলে অবগাহনে নেমেছে—সেখানে দীর্ঘায়ত একটি পাণ্ডুর রেখা জেগেছে; তারই মধ্য-বিন্দুর দ্বিধা উত্তর দিকে একস্থানে সে পাণ্ডুরতা মণ্ডলাকারে ক্রমশ আয়তনে বাড়ছে। পূর্বদিকস্থে একপাদ আকাশে জ্যোৎস্না স্নান বিবর্ণ হয়ে গেছে, আকাশের প্রথম পাদ-সীমার একটু উপরে শুকতারী নীলাভ জ্যোতিতে হাসছে।

এ পাশে পশ্চিম দিকস্থে দিগন্তশারী পূর্ণচন্দ্র। রক্তাভ পাণ্ডুর হয়ে এসেছে। কিন্তু তার জ্যোৎস্না এখনও পশ্চিমে দিগন্ত থেকে আকাশের ত্রিপাদ পর্যন্ত আলো করে রেখেছে। সে জ্যোৎস্না পড়ে রয়েছে শাখা-প্রশাখাহীন দীর্ঘলীর্ণ নারিকেল বৃক্ষগুলির পশ্চিম ভাগে, লীর্ণদেশ থেকে তলভূমি পর্যন্ত আলোকিত করে। পূর্বভাগে বালুচরে সমুদ্রগর্ভ পর্যন্ত জেগে রয়েছে অস্পষ্ট ছায়া। পশ্চিম দিগন্তাগত থানিকটা জ্যোৎস্না এসে পড়েছে শবরীর মুখের উপর। নিশ্চিন্ত নিদ্রায় আচ্ছন্ন লজ্জা।

প্রথম ঘুম ভাঙল রক্তনাথনের। রাত্রি শেষ হয়েছে। আর এক দণ্ডের মধ্যেই ওই পাণ্ডুর মণ্ডলটি দ্বিধা রক্তরাগে ভরে উঠবে। তারপর সে রক্তরাগ একদিকে সমুদ্রের জল একটি বিন্দুকে কেন্দ্র করে পরিণিতে আকাশের উর্ধ্বলোক পরিব্যাপ্ত করবে এবং কেন্দ্রে গাঢ় থেকে গাঢ়তর হতে হতে জ্বাকুসুমস্ফাশ স্বর্ষ মাথা তুলবেন। যেন সমুদ্রবক্ষতল থেকেই স্বর্ষদেব উঠে

আসছেন। তারপর একসময় লাক দিয়ে ঝুঁকবেন আকাশে, সমুদ্রের নীল তরঙ্গশীর্ষে রক্তরাগের ছটা বাজবে।

পাশে শব্দকল্পা এখনও নিজিত। রক্তনাথন তার মুখের দিকে তাকালেন। বারেকের জন্ত চিন্তা যেন নিজের উপরেই বিরূপ হয়ে উঠল রক্তনাথনের। ভাবাবেগে এ তিনি কাল কি করেছেন?

হে বরদরাজ, এ কি করলে! তোমার চরণতলে কাল বিষজর্জরা চেতনাহীন! এই কল্পাকে আশ্রয় দেবার সময় বলেছিলাম, এতে যদি অপরাধ হয় তবে সে অপরাধের দণ্ড আমাকে দিও। দোষ তো এর নয়। আমার। তুমি কি আমাকে মোহগ্রস্ত করে আমার ব্রত ভঙ্গ করিয়ে তপশ্চাত্য করিয়ে তারই দণ্ড দিলে? স্থির হয়ে গেছেন তিনি, পাষণ হয়ে গেছেন যেন। দিবালোক যত স্পষ্ট হচ্ছে, পৃথিবী যত বাস্তব রূপে প্রকাশিত হচ্ছে তত তিনি যেন পঙ্গু হয়ে যাচ্ছেন। এ কি করেছেন তিনি! দয়া করতে গিয়ে এ কি বন্ধনে নিজেকে শৃঙ্খলিত করেছেন! লজ্জাকে ডাকতে পারছেন না তিনি। চোখ মেলেই লজ্জার নিদ্রা-জড়িমা-মুক্ত চোখে সমুদ্র-বক্ষে রক্তিম সূর্যের আবির্ভাবের মত প্রেমের দীপ্তি ফুটে উঠবে। তার সারা মুখ কোমল অল্পরাগচ্ছটার অল্পরঞ্জিত হবে। সলজ্জ হাসির রেখায় ঠোট দুটি বিকশিত হবে। কি করবেন তিনি তখন?

লজ্জার গলায় তাঁর গলার বৈষ্ণবজনের মালাটি পড়ে রয়েছে।

অকস্মাৎ রক্তনাথন যেন বেজাহতের মত অধীর হয়ে উঠলেন। লজ্জাকে একটি বৃশ্চিকে দংশন করেছিল—তাঁর মনে হল তাঁকে যেন সহস্র বৃশ্চিকে দংশন করেছে।

কি করবেন তিনি? লজ্জা যেন এখনও তাঁকে বৃশ্চিকের মত ধরে আছে। লজ্জার একখানি হাত তাঁর কোলের উপর সতাই পড়ে ছিল। তিনি আতঙ্কিত ব্যক্তির মতই হাতখানাকে সজোরে কোল থেকে বালুচরের উপর ছুঁড়ে কেলে দিলেন। লজ্জা সেই আঘাতেই চোখ মেলল। সস্ত ঘুম-ভাঙা দৃষ্টির মধ্যে আঘাতের বেদনাবোধও ছিল না। ছিল শুধু প্রসন্ন অল্পরাগ। নিদ্রা-ঘোরের মধ্যে সে আঘাতটা পূর্ণমাত্রায় অহুভব করে নি, এবং অহুমানও করে নি, বা করবার কোন কারণ ঘটে নি তার। চোখ মেলে চেয়ে সে শ্মিতহাস্তে বললে—প্রভু! বোধ হয় তার মনে হয়েছিল রক্তনাথন তাকে ডাকছে। রক্তনাথন তখন উঠে দাঁড়িয়েছেন। প্রভু বলে সাড়ার মধ্যে লজ্জার প্রশ্ন ছিল—কি বলছেন প্রভু? কিন্তু রক্তনাথনের বলার কিছু ছিল না। পথিপার্শ্বে নিজিত চোর যেমন ভোরের আলোর জেগে উঠে উর্ধ্বাঙ্গে ছুটে পালায় তেমনি ভাবে তিনি পালিয়ে গেলেন। লজ্জা উঠে দাঁড়াল। তার বিশ্বাসের অবধি ছিল না। এমন করে ছুটে পালালেন কেন? প্রহরী! চঞ্চল হয়ে উঠল সে। পরমুহূর্তেই তার সব চঞ্চলতা স্থির হয়ে গেল। মনে পড়ে গেল—কাল রক্তনাথন তাকে ধরে নিয়ে যেতে চেয়েছিলেন, বলেছিলেন—কিসের ভয়? তুমি আমার পত্নী। তুমি যাবে আপনার গৃহে—

তা হলে? তা হলে?—

সে যে বিশ্বাস করতে পারছে না। তার কণ্ঠে যে এখনও তাঁরই পরানো মালা—বৈষ্ণব-জনের মালাখানি ঢুলছে! - তবে?

প্রাণের-মূর্তির মতই সে দাঁড়িয়ে রইল। প্রহরীর ভ্রম আর তার নেই। নিয়ে যাক, তার। তাকে ধরে নিয়ে যাক। কল্পক, নির্ধাতন কল্পক, লাঞ্ছনা কল্পক।

স্বর্ষ উঠবে। একটি মণ্ডলাকার রক্তাভ্ররঞ্জন ধীরে ধীরে আকাশলোকে পরিব্যাপ্ত হচ্ছে, পাখীরা দূরদূরান্তরে বাঁকে বাঁকে উড়ে চলেছে। সমুদ্রবক্ষে নৌকা দেখা দিয়েছে। দূর উত্তরে

মাস্ত্রাজ বন্দরে জাহাজের মাংসল দেখা যাচ্ছে। বড় বড় নৌকা পাল তুলে বের হচ্ছে। ছোট মাছ-ধরা নৌকা সারি সারি ছুটছে গভীর সমুদ্রের দিকে। মাহুকের কোলাহল শোনা যাচ্ছে। স্বর্ষ উঠছে। কিন্তু সে কোথায় যাবে? দিনের আলোর কি করে সে পথে বের হবে? সে সব বুঝছে। আর কিছু তার অগোচর নেই। এই হয়। এই বুঝি নিয়ম! স্বর্ষ উঠল। আলো রৌদ্র হয়ে ফুটল—উত্তাপের স্পর্শ লাগল দেহে। সেই স্পর্শে সে সচকিত হয়ে উঠল। যেতে হবে—কোথাও যেতে হবে। অনেক দূরে, অনেক দূরে। পালাতে হবে তাকে। দ্রুতপদে সে বনবীথির ঘন-সন্নিবিষ্ট নারিকেল তালের কাণ্ডগুলির মধ্য দিয়ে চলতে লাগল। দক্ষিণ মুখে।

আবার সকালে জোয়ার আসছে। তার পদচিহ্নগুলি ধুয়ে দিয়ে গেল জোয়ারের জলোচ্ছ্বাস।

* * * *

রজনাতন বেত্রাহতের মত ছুটে আসছিলেন।

প্রহরী দুজনও সকালে ঘুম ভেঙে তাঁকে না পেয়ে উৎকণ্ঠিত হয়ে তাঁকে খুঁজতে বেরিয়েছিল। তাঁকে দেখে আশ্চর্য হল, কিন্তু তাঁর অবস্থা দেখে তাঁকে প্রশ্ন করলে—কি হয়েছে আচার্য? ভোরবেলা উঠে কোথায় গিয়েছিলেন? সমুদ্রকূলে বুঝি?

তিনি বললেন—জ্যা—? ই্যা।

বলেই তিনি তাদের পিছনে ফেলে প্রায় ছুটে এসে ঘরে আপন শয্যার উপর গড়িয়ে পড়লেন। সর্বাঙ্গের বালুকণা বরে পড়ল শয্যার উপর। কিন্তু তার পীড়া অল্পভব তিনি করলেন না। মুখ গুঁজে পড়ে রইলেন।

এ কি মর্যপীড়া! এ কি করলেন! হে বরদরাজ! এ কি শাস্তি দিলে তুমি! আবার উঠলেন। উঠে ভাঙার ঘরের দরজা ঠেলে পূজোর ঘরের দরজায় গিয়ে দাঁড়ালেন, কিন্তু প্রবেশ করতে গিয়েও প্রবেশ করতে পারলেন না।

জ্ঞান করতে হবে তাঁকে। বেরিয়ে এলেন। কুড়ুমগিকে এবং প্রহরী দুটিকে বললেন—আমি জ্ঞান করতে যাচ্ছি সমুদ্রে। মধ্যপথ থেকে ফিরে এলেন। যেতে পারলেন না। লজ্জা—লজ্জা নিশ্চয় নারিকেল কুঞ্জতলে এখনও পড়ে আছে। কাদছে। তাঁকে দেখলেই সে 'প্রভু' বলে এগিয়ে আসবে। পায়ের উপর উপুড় হয়ে পড়ে কাদবে।

ফিরে এসে বললেন—না কুড়ুমগি, শরীর আমার অসুস্থ। সমুদ্রস্নান সহ হবে না। কূপ থেকে জল তুলে জ্ঞান করে পূজোর ঘরে গিয়ে প্রবেশ করলেন। ঘরখানি এখনও লজ্জার অবস্থানের চিহ্নে মলিন হয়ে আছে। সমস্তে তিনি সমস্ত কিছু পরিষ্কার করে পূজার আয়োজন করে পূজার বসলেন। কিন্তু হ'ল না, পূজা হ'ল না। চোখ বন্ধ করলেই লজ্জাকে দেখছেন। একটি দিনে লজ্জা যেন শতমুখিতে নিজেকে তাঁর মনের মধ্যে প্রতিষ্ঠিত করেছে।

লজ্জা গোশালার খুঁটি ধরে দাঁড়িয়ে আছে ম্লান-মুখে, সজল চোখে, রিষ্ট শ্রাম-লভার মত।

লজ্জা বিচালি স্তূপ থেকে যজ্ঞপাকাতর ভস্মাভ-মুখে বের হয়ে আসছে।

লজ্জা বৃশ্চিক-বিষে চেতনাহীন হয়ে ভেঙে পড়েছে।

লজ্জা তাঁর বাহুর উপর।

লজ্জাকে তিনি বরদরাজের সম্মুখে শুইয়ে দিয়ে বলছেন—তোমারই চরণপ্রান্তে একে সমর্পণ করলাম প্রভু। তুমি তাকে রক্ষা করতে পারবে না দেবতা? বুকের ভিতরটা তাঁর কেমন করে উঠল। চোখ থেকে জল গাড়িয়ে এল দরদর-ধারে। পরমুহূর্তেই তিনি চমকে উঠলেন। চোখ

ছুটি খুলে গেল। বিস্ফারিত হয়ে উঠল। মন্ডনের ভিতর থেকে বিপরীত প্রান্ত জেগে উঠল। দেবতা তো তাকে শুঁই হাতে দিয়েছিলেন! দেবতা তো প্রভাষণ করেন নি!

ও! লল্লার সেই মুখ মনে পড়ছে। সেই দৃষ্টি মনে পড়ছে। তাঁর নিজের মালাখানি তার গলায় যখন পরিয়ে দিয়ে বলেছিলেন—কামনা আমার আছে, কিন্তু কামার্ত পশু নই আমি। লল্লা, তোমাকে ছাড়তে পারব না আমি। এই মালা পরিয়ে তোমাকে সমুদ্র স্নানী রেখে বরণ করছি—তুমি আমার পত্নী—সেই মুহূর্তের লল্লার সেই অপরূপ সুষমা-দীপ্ত, প্রসন্ন-ক্লান্ত মুখখানি মনে পড়ছে। সারা ঘরখানিতে এখনও লল্লার দেহগন্ধ পাচ্ছেন তিনি।

লল্লা, লল্লা, লল্লা। সারা অন্তর ভরে লল্লাকে আহ্বান করে উঠল তাঁর হৃদয়। লল্লা! লল্লাকে তিনি ভালবাসেন। লল্লাকে তিনি পত্নী বলে গ্রহণ করেছেন। বরদরাজের যে প্রেরণায়, যে ইঙ্গিতে ওই গান তিনি রচনা করেছিলেন—কৃষ্ণচর্মের অন্তরালে যে দেবতা বাস করেন—সেই দেবতাই বাস করেন বৈকুণ্ঠে—যে দেবতা বাস করেন বৈকুণ্ঠে—তিনিই বাস করেন কৃষ্ণবর্ণ চর্মের অন্তরালে—সেই প্রেরণাতে তিনি তাকে গ্রহণ করেছিলেন। হৃদয়ের অকপট, অকৃত্রিম, ছলনাহীন কামনা—যে কামনার পুণ্যে নারী পূর্ণ হয় পুরুষের মধ্যে, পুরুষ পূর্ণ হয় নারীর মধ্যে—সেই অকৃত্রিম পবিত্র কামনায় কাল তিনি তাঁকে গ্রহণ করেছিলেন। ভুল—ভুল করেছেন তিনি পালিয়ে এসে। ভুল। পাপের প্রায়শ্চিত্ত আছে। ভুল সংশোধন না হলে জীবনের সে ক্ষতি আর পূর্ণ হয় না।

হে বরদরাজ—এ কি মতিভ্রান্তিতে তুমি ছলনা করলে?

কেন? কেন? কেন এমন ভ্রান্তি হল তাঁর? এত বড় আঘাতে তিনি বিচলিত হন নি, মিথ্যা বলেন নি। কারুর ভয়ে তাঁর উপলব্ধ সত্যকে অসত্য বলেন নি। কিন্তু তাঁর জীবনের চরমতম সত্যকে কি করে, কেন তিনি এই ভাবে মুহূর্তের ভ্রান্তিবশে সাগর বালুবেলায় ফেলে দিয়ে চোরের মত পালিয়ে এলেন?

আসন ছেড়ে উঠ পড়ছিলেন। আবার বসলেন। প্রণাম করে বললেন—লল্লাকে কিরিয়ে আনতে চললাম প্রভু। লল্লা আমার জীবনের চরম সত্য। তাকে আমি ভালবাসি। তাকে আমি চাই তোমার প্রসাদের মত। ঘর থেকে বেরিয়ে এসে তিনি চললেন সমুদ্রতটের দিকে। প্রহরী ছটিকে বললেন—আমি চললাম সমুদ্রতটে। তটভূমি ধরে আমি যাব মাস্তাজ পর্যন্ত। তোমরা ফিরে যাও।

কুড়ুমণিকে বললেন—ঘর রইল। ফিরে আসা পর্যন্ত অপেক্ষা করো।

সাগর তটভূমে এসে দাঁড়ালেন।

রৌদ্র-ঝলমল সাগরজল—রৌদ্র এবং রৌদ্রকরোজ্জ্বল সাগরজলচ্ছটার প্রদীপ্ত বেলাভূমি পরম শুচিতায় পরিমার্জিত দেবতার অঙ্গনের মত প্রসারিত। নারিকেল সুপারি বৃক্ষের তরবারির মত দীর্ঘ পাতাগুলি বিকমিক করছে। সরসর সরসর শব্দ উঠছে তাদের আন্দোলনে। সমুদ্র-কল্লোল অবিরাম—অশ্রান্ত। কঁাদছে—

কার্নাই মনে হচ্ছে তাঁর এই মুহূর্তে।

শূন্য বালুচরে লল্লা তো নেই।

• তিনি হাঁটতে শুরু করলেন—উত্তর-মুখে।

প্রথমে যাবেন লল্লাদের গ্রামে। তারপর মাস্তাজে। মাস্তাজে মায়লাপুরে—পার্থসারথি মন্দিরে দেখবেন। তারপর মহাবলীপুরম। তারপর কাঞ্জীভরম। লল্লাকে না পেলে যে হবে না তাঁর! নাহলে যে সব মিথ্যে হয়ে যাবে! জীবন মিথ্যা হয়ে যাবে!

* * * *

বেলা প্রথম গ্রহর পার হচ্ছে। সমুদ্র নৌকোর নৌকোর ভরে গেছে। সমুদ্রের দিকে তাকিয়েই ভাবছিলেন তিনি। একটি বড় বাজীবাহী নৌকা থেকে হাত তুলে কারা নমস্কার করলে। তাদের মধ্যে গৈরিকখারিণী এক প্রৌঢ়া। তিনি চিনলেন। পুরী থেকে স্কোরার পথে পার্শ্বসারথি দর্শনের জন্ত যাত্রাজে নেমেছিল। সেদিন রাত্রে গান শুনে প্রৌঢ়া এসে তাঁকে হাত ধরে বলেছিল, শতায়ু হও। তারা কিরছে আজ। পথে সমুদ্রতে তাঁকে দেখে চিনে অভিবাদন করছে। কিন্তু চিন্তাময় রক্তনাথন যেন দেখেও দেখলেন না। প্রত্যভিবাদন না করেই উত্তর-মুখে হাঁটতে শুরু করলেন। লজ্জা। লজ্জা। যোশেকদের গ্রামের প্রবেশ-পথে থমকে দাঁড়ান নি—কিন্তু যোশেকের বাড়ির দরজার থমকে দাঁড়ালেন। গ্রামের পুকুরেরা অদিকাংশই বাইরে গেছে কাজে। মেয়েরা বিম্বিত হল। তাঁর পথ থেকে সরে দাঁড়াল, আপন আপন ঘরের ভিতর গিয়ে উকি মেয়ে দেখতে লাগল। আচার্য একজন প্রবেশ করেছেন তাদের গ্রামে। চোখমুখে তাদের উত্তেজনা ছুটে উঠল।

—হে বরদরাজ! হে মহেশ্বর!

খুঁটানরা ঘরে ঢুকল না, পথের পাশে সরে দাঁড়াল। রক্তনাথন যত অগ্রসর হলেন যোশেকের দরজার দিকে তত যেন দুর্বল হয়ে পড়তে লাগলেন। অকস্মাৎ এক সময় যেন সম্পূর্ণ পরাভূত হয়ে দাঁড়িয়ে গেলেন। তাঁর বুকের ভিতর আলোড়ন উঠেছে আবার। কি বলবেন তিনি? কি করে বলবেন? কি করে বলবেন লজ্জাকে তিনি কাল রাত্রে সমুদ্র সাক্ষী করে—শেষ হল না মনের প্রশ্ন। একজন খুঁটান যুবক উত্তেজিত উদ্ধত ভক্তিতে পাশের গলিপথ থেকে ছুটে বেরিয়ে এসে দাঁড়াল তাঁর সামনে। মুষ্টি উত্তত করে বললে—কেন প্রবেশ করেছ তুমি আমাদের পল্লীতে? কি প্রয়োজন তোমার? গোক্ষুর সর্প, কাকে দংশন করতে এসেছ?

চোখ বুজলেন রক্তনাথন। মনে মনে বরদরাজকে স্মরণ করে নিজের মন দৃঢ় করতে চেষ্টা করলেন। মনের মধ্যে যে অগ্নি জ্বলছিল, যার শিখা গ্রামে প্রবেশ করার থেকেই নিভে আসছে ধীরে ধীরে, তাতে আবেগ এবং সংকল্পের ইন্ধন ও হবি দিয়ে তাকে জ্বালাবার চেষ্টা করলেন।

যুবকটি বললে—তোমাকে কে আঘাত করলে আর তুমি নাম করলে আমাদের!

চমকে উঠলেন রক্তনাথন, বললেন—না। আমি কারও নাম করি নি। আমি কাউকেই তাদের চিনতে পারি নি। অসত্য আমি বলি না।

ধীরে ধীরে পাশে লোক এসে জমেছিল। তাদের মধ্যে থেকে একটি নারী-কণ্ঠস্বর বলে উঠল—উনি বলেন নি, বলেছে লজ্জা। সমস্ত খুঁটানদের সে শব্দ। শব্দদেরও সে ঘৃণা করে—সেই বলেছে। আমি গোড়া থেকে বলছি। তার কথাতেই কোতোয়ালীতে আমাদের জোয়ানদের ধরেছে।

রক্তনাথনের মনে আগুন জ্বলল আবার। তিনি প্রশ্ন করলেন—কাকে ধরেছে? কবে ধরেছে?

—যাত্রাজ শহরে থাকে আমাদের যে সব জোয়ানরা তাদের দশজনকে ধরেছে আজ ভোরে। লোক এই কিছুক্ষণ আগে সংবাদ এনেছে।

আর একজন বললে—জ্বালা সাজছে। কিছু যেন জানে না।

অজ্ঞ জনে বললে—গ্রামে ও এসেছে আমাদের মুখ দেখে চিনতে। ওকে ধর ধর—ঘরে বন্ধ কর। রাত্রে—

কলরব করে উঠল লোকেরা। কিছু লোক পালিয়ে গেল। রজনাক্ষন তখন মনের বল ফিরে পেয়েছেন। বললেন—বরদরাজের নাম নিয়ে বলছি—আমি কিছুই জানি না। লজ্জাও কিছু জানে না। জান তোমার লজ্জা কোথায়? তাকে কি তোমরা সন্দেহ করে আটকে রেখেছ? দোহাই তোমাদের, সত্য বল?

নির্ভীকতা শুধু আক্রমণকারীকে প্রতিহত করে না, খানিকটা পশ্চাৎপদও করে দেয়। এই নির্ভীকতার সঙ্গে সহৃদয় আকৃতি থাকলে আক্রমণকারীর বিদ্রোহও নষ্ট করে। বিশ্বয় জাগায়।

তাই হল। এরা রজনাক্ষনের কথা শুকনো শুকনো হয়ে সবিস্ময়ে তাঁর মুখের দিকে তাকিয়ে রইল। রজনাক্ষন বললেন—আমাকে একটি সত্য কথা বল—লজ্জা কোথায়? আমি নিজে এখনি কোতোয়ালীতে যাচ্ছি। নিশ্চিন্ত থাক—আমি মিথ্যা বলব না। তারা সঙ্গে সঙ্গেই ছাড়া পাবে। বল।

একজন প্রৌঢ় এসে বললে—মেইরীর নামে শপথ করে বলছি আচার্য, লজ্জা কোথায় আমরা জানি না। সে তো গ্রাম পরিভ্রমণ করেছে তার মায়ের মৃত্যুর পর।

—আজ! আজ সকালে! আজ সকালে সে আসে নি?

—না আচার্য। শপথ করে বলছি। বিশ্বাস করুন।

রজনাক্ষন আর দাঁড়ালেন না। তিনি মাদ্রাজের পথে ছুটলেন।

এ কি বাধা, এ কি বিষ তাঁর গতিকে অন্তরিক্তে ভিন্ন মুখে আকর্ষণ করেছে। লজ্জার সন্ধান থেকে বিরত হয়ে তাঁকে যেতে হবে কোতোয়ালী। সেখানে তারা যে কি করবে—কতক্ষণ তাঁকে আটকে রাখবে কে জানে। লজ্জা কোন দূরদূরান্তরে ছুটে পালাচ্ছে লজ্জায়, ঘৃণায়—তাঁর প্রতি ঘৃণায়। লজ্জাকে যে তাঁকে ধরতে হবে—বলতে হবে, লজ্জা, আমি বুঝছি; লোক-লজ্জার ভ্রান্তি আমার কেটেছে, সমাজের ভয় আমার নেই। তোমার মধ্যে আমার জীবনের লালসাকে তো নয়—আমার ভালবাসাকে পেয়েছি—ভালবাসার কাছে ভ্রান্তি ভয় সব তুচ্ছ। আমাকে ক্ষমা কর। ফিরে এস।

সে পথে এ কি বাধা!

কোতোয়ালীতে তখন ত্রিনিবাসন তাঁর প্রতীক্ষা করছিলেন। এর মধ্যে তাঁর কাছে সওয়ার চলে গেছে। কোতোয়ালীর কর্মচারীরা গোপন তদন্ত করে দশজন শবর খুঁটান এবং পাঁচজন শৈবকে ধরেছেন। এরা নামে শৈব হলেও ধর্মের কোন ধার ধারে না—আসলে দুষ্কৃত-প্রকৃতির লোক।

ত্রিনিবাসনের ঘরের বারান্দায় যোশেফ বসে আছে, একজন ফাদার বসে আছেন। মায়লা-পুরের শিবমন্দিরের একজন প্রতিনিধি বসে আছেন। আচার্য চিদম্বরমও এসেছেন।

ত্রিনিবাসন বললেন—কোথায় গিয়েছিলেন আচার্য? সওয়ার ফিরে এসে বললে, আপনি মাদ্রাজ রওনা হয়েছেন প্রাতঃকালে পূজা সেরেই?

রজনাক্ষনের দৃষ্টির মধ্যে একটি প্রাণরতা বিজুর্জিত হচ্ছিল।

লজ্জাব কামনা—নিজের অহুশোচনা তাঁকে অধীর করে তুলেছে। একটা উদ্ভ্রান্ত বিদ্রোহ তাঁকে ক্ষিপ্তপ্রায় করে তুলেছে। নিজের বিরুদ্ধে বিদ্রোহ, সমাজ ধর্ম সবকিছুর বিরুদ্ধে। কোতোয়ালীর বিরুদ্ধেও। কারণ কোতোয়ালী লজ্জাকে খুঁজছে। মিথ্যা সন্দেহে খুঁজছে। যোশেফের বিরুদ্ধে বিদ্রোহ, আচার্য চিদম্বরমের বিরুদ্ধেও বিদ্রোহ। সবাই সবাই যেন ছেঁড়—

যার জন্ত তিনি লজ্জাকে ফেলে কুৎসিত প্রকৃতির ভীষ্ম চোরের মত পালিয়ে এসেছেন। মধ্যে মধ্যে প্রাণ জাগছে একটা; আশ্চর্য, একটি নারীর জন্ত একি উন্মত্ততা! সঙ্গে সঙ্গে সে উন্মত্ততা প্রবলতর হয়ে চীৎকার করে উঠেছে—হ্যাঁ, লজ্জাকে না পেলে আমি উন্মাদ হয়ে যাব। এখন অর্ধোন্মাদ। পরে পূর্ণোন্মাদ হয়ে যাব।

প্রথর কণ্ঠেই বললেন রঙ্গনাথন—আপনি রাজকর্মচারী। আপনি আপনার অধিকারের মাহুষদের রাজকর্মের প্রয়োজনমত চালিত করতে চান। কিন্তু মাহুষের হৃদয় তো সে প্রয়োজনে চলে না। বরদরাজের অহুজ্জার হৃদয়ের প্রয়োজনে আমি গিয়েছিলাম যোশেকদের পল্লীতে। সেখানে সংবাদ পেলাম আপনার। সন্দেহবশে কয়েকজন গাঙ্গাজের বাসিন্দা ওই গ্রামের যুবকদের ধরেছেন। কয়েকজন শৈবধর্মাম্বুগীকেও ধরেছেন। সংবাদ পেয়েই আমি ছুটে আসছি। আমি তো বার বার বলেছি—আমি তাদের কাউকে চিনতে পারি নি এক সন্দেহও কাউকে করি না। স্মৃতরাং কেন অনর্থক সন্দেহবশে—

বাধা দিলেন শ্রীনিবাসন—আচার্য রঙ্গনাথন, দেশের আইন যা তা আপনি মানতে বাধ্য। ধর্মত বাধ্য। নন কি ?

চূপ করলেন রঙ্গনাথন। একটু নীরব থেকে বললেন—বেশ, বলুন কি করতে হবে ?

—যাদের সন্দেহবশে আমরা ধরেছি তাদের দেখুন। চিন্তা করে মনে মনে মিলিয়ে বলুন, কারও সঙ্গে আকার আয়তন অবয়ব দৃষ্টিগত কোন সাদৃশ্য আছে কি না ?

—চলুন।

কোতরাণীর পশ্চাৎভাগে একটি খোলা জায়গায় প্রহরাধীন লোক কয়েকজনকে এনে দাঁড় করানো হল। রঙ্গনাথন সামনে এসে দাঁড়ালেন।

শ্রীনিবাসন বললেন—ভাল করে দেখুন।

রঙ্গনাথন তাকালেন তাদের দিকে। বিচিত্র। একবার মুখখানা পাংশু হল—পরমুহূর্তে কঠিন হল, পরমুহূর্তে মাথাটা ঝাঁকি দিলেন অকারণে। ষ্ঠান শবরদের দেখা হয়ে গেলে বললেন—না, মাননীয় শ্রীনিবাসন, আমি কারুর সঙ্গে কোন মিল দেখতে পাচ্ছি না। এরা কেউ নয় বলেই আমার বিশ্বাস।

মাহুষগুলির মধ্যে আশ্চর্য পরিবর্তন ঘটল একমুহূর্তে। স্মিত হাসি ফুটল মুখে—প্রসন্ন হয়ে উঠল মুখ। দৃষ্টি এমন কিছু বললে যা রঙ্গনাথনের কাছে অবিস্মরণীয় হয়ে উঠল।

শ্রীনিবাসন বললেন—ছেড়ে দাও এদের। চলুন, এবার ওদিকে চলুন। খানিকটা দূরে দাঁড়িয়েছিল শৈবধর্মাম্বুগীরা। সেখানেও সেই একই ঘটনা ঘটল।

রঙ্গনাথন বললেন—এবার আমাকে মুক্তি দিন, আমি যাই।

শ্রীনিবাসন বললেন—আপনি ইচ্ছাপূর্বক চিনতে চাইলেন না রঙ্গনাথন।

—ইচ্ছাপূর্বক চিনতে চাইলাম না ? প্রশ্ন করলেন। বোধ হয় নিজেকেই করলেন। তার পর বললেন—না।

—আর যেন দোষীকে ধরতে না পারার জন্ত আমাকে দোষ দেবেন না।

—না। দিই নি, দেব না। আমি আসি মাননীয় রাজপ্রতিনিধি। আমার দাঁড়বার সময় নেই।

—কোথায় যাবেন ?

—আমি ? অশ্লোক স্তম্ভ থেকে বললেন—ঠিক জানি না। উদ্দেশ্যহীন যাত্রা শ্রীনিবাসন ! বিন্দিত হবেন না। বরদরাজের অহুজ্জা—হৃদয়ের নির্দেশ আমাকে তাড়না করে ছোটোচ্ছে।

ভা. র. ১২—২৭

বাইরে আসতেই পাঞ্জীটি উঠে বললেন—আপনি সত্যবাদী। ঈশ্বর আপনার উপর খুশী হবেন। ধর্মবাদ আপনাকে।

যোশেফ বললে—আচার্য রঙ্গনাথন, আপনাকে শ্রদ্ধা করি আমি। আমরা এ কখনও ভুলব না।

রঙ্গনাথনের চোখ দুটি মুহূর্তের জন্তে বিস্ফারিত হল—কোন চিন্তার প্রতিকলন পড়ল। তার পর বললেন—একটা অনুরোধ করব তোমাকে?

—বলুন আচার্য। আমরা অকৃতজ্ঞ নই।

—লজ্জা যদি ফিরে আসে তাকে বলো সে যেন আমি ফিরে না আসা পর্যন্ত আমার জন্তে আমার ঘরে অপেক্ষা করে। বলো আমার পূজার ঘরে যে বরদরাজের ছোট মূর্তি আছে—তার সেবার অধিকার তাকে আমি দিয়ে গেলাম।

—আচার্য! প্রবল বিশ্বাসে অপেক্ষাকৃত উচ্চকণ্ঠে চীৎকার করে উঠল যোশেফ। সমবেত জনমণ্ডলীরও বিশ্বাসের সীমা রইল না।

রঙ্গনাথনের চোখে অর্ধোন্মাদের চোখের অস্বাভাবিক দৃষ্টি। তিনি বললেন—কাল রাতে আমার বরদরাজ এই আদেশ করেছেন।

—বরদরাজ আদেশ করেছেন?

ওদিক থেকে আচার্য চিদম্বরম বলে উঠলেন—হাঁ-হাঁ, করবেন বই কি! কালের মহিমা। কলিযুগ, হিন্দুকাল বহুদিন বিগত, মুসলমানকালেও দেবতা এমন আকাঙ্ক্ষা প্রকাশ করেন নি। এবার এসেছে ষ্ঠে ইংরাজ। এবার দেবতাদেরও স্নেহাচারে অনাচারে রুচি না হলে কাল-মহিমা প্রকট হবে কেন? কিন্তু আচার্য রঙ্গনাথন—দেবতার এ আদেশ আমরা মানব না। দেবমূর্তি কলুষিত হলে আমরা তা নিক্ষেপ করি নদীগর্ভে। সমুদ্রগর্ভে। এই কলুষ-অশুচি-অভিলাষী তোমার দেবমূর্তিটাকে তুমি সমুদ্রগর্ভে নিক্ষেপ কর—নতুবা তোমাকে ক্ষমা করব না আমরা। তুমি পতিত—শবরতুল্য হলে আজ থেকে।

রঙ্গনাথন বললেন—জয় বরদরাজ স্বামী! তোমার অমৃত প্রসাদ আমাকে দাও। হে প্রভু!

তিনি বেরিয়ে এলেন কোত্তরালী থেকে। চললেন পার্শ্বসারথির দিকে।

মন্দিরে তিনি ঢুকলেন না। যেদিকে ভিক্ষার্থীরা থাকে সেখানে গিয়ে দাঁড়ালেন। জিজ্ঞাসা করলেন—লজ্জাকে দেখেছ?

—না ভো প্রভু।

মায়লপুরে কপালীশ্বর শিবনিকেতনের আশপাশের ভিক্ষার্থীদেরও ওই প্রশ্ন করলেন—লজ্জা? লজ্জা কোথায় জান?

—কই, না ভো!

চল, তবে মহাবলীপুরম। পথ চলতে চলতে হঠাৎ স্মরণ হল একবস্ত্রে কর্দকহীন হয়ে বেরিয়ে এসেছেন তিনি।

কয়েক মুহূর্তের জন্ত থমকে দাঁড়ালেন। তারপর আবার চলতে শুরু করলেন। এই ভাল। এই শ্রেয়। ফিরে গিয়ে অর্থ এবং কাপড়চোপড় আনতে যে সময় যাবে তার মধ্যে লজ্জা কত—কত দূরান্তরে চলে যাবে। লজ্জার জন্ত তিনি অধীর উন্মাদ হয়ে যাচ্ছেন মুহূর্তে মুহূর্তে। ধর্ম নয়, কর্তব্য নয়, তার থেকেও বড় কিছু। জীবনের তৃষ্ণা—শুধু তৃষ্ণা নয়, অমৃত তৃষ্ণা।

চলে মহাবলীপুরম—

মহাবলীপুরমেই বা কই লল্লা ? সে তো আসেনি ।

চলো কাজীভরম—

কাজীভরমেই বা কই লল্লা ? কাজীভরমে শুধু এইটুকু শুনলেন—তাঞ্জোরে অনেক বাড়ী গেছে । ভিক্ষুক দলও গেছে । সেখানে বিরাট উৎসব ।

চলো তাঞ্জোরে । একমাত্র বস্ত্র ধূলি-মলিন হয়ে গেল ; দাড়িগোঁফে সমাচ্ছন্ন হয়ে গেল মুখ ; পাছকা ছিন্ন হয়ে গেল, ফেলে দিলেন । উত্তরীয়খানি থেকে তৈরী করলেন ভিক্ষার ঝুলি । গান রচনা করলেন—সুর যোজনা করলেন, সেই গান গেয়ে ভিক্ষাজীবী রজনাতন চললেন । অমৃতপ্রসাদ দাও হে দাও—জয় বরদরাজ হে ! হায়, কোথায় অমৃত প্রসাদ !

হায়—কোথায় অমৃত প্রসাদ !

অমৃত হয়তো কথার কথা । না, একবার তো তার সৌরভ অহুভব করেছিলেন । দুপের কাছে পাত্রখানি ধরে মুগ্ধ হয়ে বসেই ছিলেন ; তারপর কেলে দিয়ে পালিয়ে গিয়েছিলেন । তারপর আর মিলল না । সম্ভবত একবারই মেলে । যে পান করে সে অমর হয়—যে “ফেলে দেয় তার আর মেলে না । তৃষ্ণার্ত ধরিত্রী শোষণ করে নেয় ; অথবা পরিত্যক্ত পাত্রের আধেয় বাতাস রৌদ্র পান করে ধ্বংস হয় । পড়ে থাকা পাত্রখানিতে তার আর কোন চিহ্ন পর্যন্ত মেলে না । শূন্য পাত্রখানি হাতে নিয়ে তখন উপলব্ধিতে আসে আসল সত্য । ‘সব মিথ্যা’ এইটেই সত্য ।

*

*

*

জীবনে এই কয়েক বৎসরের মধ্যে যে কতবার এই কথা রজনাতনের মনে হল—তার সংখ্যা তাঁর মনে নেই । তাঞ্জোরে মনে হয়েছে । মাদুরায় মনে হয়েছে । প্রতি স্থানেই মনে হয়েছে এই কথা । আজও নিজের বীণাখানির উপর হাত রেখে এই কথাই ভাবলেন ।

চার বৎসর পর । চার বৎসরের মধ্যে বহু পরিবর্তন ঘটে গেছে তাঁর জীবনে । সংসারে সব মিথ্যা । তাঞ্জোর গিয়ে তিনি বিতাড়িত হলেন—মন্দিরচত্বরে প্রবেশ করতে পেলেন না । তাঁর আসবার পূর্বেই মাদ্রাজে আচার্য চিদম্বরমের দণ্ডের কথা তাঞ্জোরে পৌছে গিয়েছিল । মহাবলীপুরম যখন পৌছেছিলেন—তখন সেখানে বার্তা পৌছয় নি । তিনিই স্নেদিন সেই মহর্ষের প্রথম যাত্রী মাদ্রাজ থেকে মহাবলীপুরমমুখে । কাজীভরমেও তিনি যাত্রা করতে বিলম্ব করেন নি । কাজীভরম থেকে যাত্রা করে পথে তিনি বিলম্ব করেছিলেন । তিনি সমুদ্রতটের দিকে ফিরেছিলেন পথ থেকে । খোঁজ করতে চেয়েছিলেন তটভূমে এমন একটি কিশোরীর মৃতদেহ কি কেউ পড়ে থাকতে দেখেছে ?—কয়েক দিন পর মনে হয়েছিল—না । সে তা করবে না । তার বাবা তাকে বলে গেছে—সে বরদরাজের প্রসাদ পাবে । তার মা তাকে বলে গেছে—কোন দেবমন্দিরের চারিপাশ মার্জনা করে গোপুরমের বাইরে দাঁড়িয়ে তার সুন্দর কণ্ঠে বন্দনা গাইলেই জীবন চরিতার্থ হবে । সে তো সমুদ্রে বাঁপ খাবে না । আবার ফিরে তাঞ্জোরেই গিয়েছিলেন । তখন তিনি একেবারে ভিক্ষুক ।

গোপুরমের বহির্দেশে কাজীভরমের একজন শৈবপাণ্ডা একদল জীর্থযাত্রী সঙ্গে করে তাঞ্জোরের শিবমন্দিরের পাণ্ডাদের হাতে দিচ্ছিলেন । তিনি গুঁকে দৌঁখই ক্ষিপ্ত হয়ে উঠেছিলেন । এই ব্যক্তি তার নিজের বরদরাজ মূর্তিকে খণ্ডান শব্দদের হাতে দিয়েছে । নিজে খুঁজে বেড়াচ্ছে এক শব্দরীকে । এ লোকটা গায়ক কিন্তু কি গান করে জান ? গান করে শব্দ ব্রাহ্মণে ভেদ নেই । এ পাষণ্ড, পাষণ্ড— ! এর পদার্পণে মন্দির অপবিত্র হবে !

মন্দিরে তিনি প্রবেশ করেন নি । প্রয়োজনও ছিল না । লল্লা থাকলে মন্দিরের বাইরেই

থাকবে। কিন্তু ব্রাহ্মণরা ইচ্ছিতে ও বক্র বাক্যে নানান জনে তাঁকে নানা লাঞ্ছনার লালিত্য করেছিল। বিক্রপের আর অস্ত ছিল না। ভেঙে পড়েছিলেন আর একবার।

লল্লার জন্ত আর এমন করে উদ্ভাদের মত ঘুরবেন না। ফিরে যাবেন মাদ্রাজে। একটি বৃক্ষতলে সারারাত্রি পড়ে ছিলেন। মধ্যে মধ্যে মনে মনে বলেছিলেন—হল না। পারলাম না। লল্লা, লল্লা।

পরদিন তাঞ্জোর ত্যাগ করে মাদ্রাজের পথে থানিকটা এসে আবার ফিরেছিলেন। লল্লাকে না পেলে বেঁচে তাঁর লাভ নেই। এর পর কিন্তু তাঁর আর সন্ধান কোন শৃঙ্খলা ছিল না। পথে পথে চলেছিলেন, যে দিকে বেশী লোক চলে সেই দিকে—সে পথে যে স্থান পড়ে, সেই স্থানেই তাকে খুঁজেছেন। গান গেয়ে ভিক্ষা করেছেন, কিছু সঞ্চয় করেছেন, আবার চলেছেন।

এমনি করে আট মাস ঘুরেছিলেন। তিনি তখন প্রায় উন্মাদ।

সারাদেশে অরাজক। একে একে হিন্দুমুসলমান রাজবংশ সামুদ্রিক ঝড়ে সমুদ্রতটের নারিকেল তালবৃক্ষের মত উৎপাটিত হয়ে পড়েছে। ইষ্ট ইণ্ডিয়া কোম্পানীর গভর্নর জেনারেল লর্ড ওয়েলেসলির ভাই কর্নেল ওয়েলেসলি ঝড়ের মত বিক্রম নিয়ে একের পর এক মারহাট্টা টিপুসুলতান ত্রিবাঙ্কর রাজশক্তিকে পরাভূত করছে। ওদিকে পিণ্ডারী, ঠগ চোর-ডাকাতে দেশ পরিপূর্ণ। এর মধ্যে পুর্ণোদ্ভাদ বলেই তাঁর ঘোরা সম্ভবপর হয়েছিল। দেহের শ্রীও তখন পৃথের ধূলায় ঢাকা পড়েছে; মলিন বেশবাস এবং কঁাধের ভিক্ষার ঝোলাই ছিল আত্মরক্ষার বর্ম। আর একটি অস্ত্র ছিল। সে তাঁর গান। যেই হোক—গান শুনে তারা করুণাই করেছে। তারপর এক ঘটনা ঘটল। তিনি তখন শ্রীরঙ্গমে। সেই অবস্থাতেই গোদাদেবীর উপাখ্যান নিয়ে গান রচনা করে মুখেই শুধু গেয়ে ভিক্ষা করতেন। তাঁর বড় ভাল লেগেছিল এ উপাখ্যান। বিষ্ণুভক্ত পারিয়ার কন্ঠা গোদা; স্বপ্নাদেশ দিয়ে শ্রীরঙ্গনাথস্বামী পারিয়ার কন্ঠা গোদাবরীকে বিবাহ করেছিলেন। এ কাহিনীর মধ্যে কোথায় যেন লল্লার সঙ্গে মিল দেখতে পেতেন। মধ্যে মধ্যে ভাবতেন—লল্লা আর নেই। লল্লা তাকে বলেছিল বরদরাজ।—তার সে ভুল ভেঙে দিয়েছেন বরদরাজ। রঙ্গনাথনকে দিয়েই নিজের স্বরূপ নিজে খুলিয়ে দিয়েছেন। এবং তাকে টেনে নিয়েছেন। লল্লাও গোদাবরী কন্ঠার মত মরদেহ থেকে মুক্ত হয়ে বরদরাজের সঙ্গে মিলে মিশে একাকার হয়ে গেছে। যিনি শ্রীবরদরাজ তিনিই শ্রীরঙ্গনাথন। অর্থ তাঁর কিছু জমেছিল। শ্রীরঙ্গনাথস্বামীর বিশাল মন্দিরের স্তরে স্তরে বিস্তৃত চত্বরের মধ্যে পাগলের মত খুঁজতেন—লল্লা! লল্লা! লল্লা!

একদিন একজন লোক তাঁকে ডেকে নিয়ে গিয়েছিল—বাঈ সাহেব ডাকছেন। প্রসন্ন করেছিলেন ক্রুদ্ধ ভাবেই—কে বাঈ?

নাম শুনে সন্ন্যাসে মাথা নত করেছিলেন। সঙ্গীতজ্ঞ হিসেবে সে নাম তাঁর স্বরণে ছিল। বিখ্যাত সরস্বতী বাঈ; সঙ্গীতজ্ঞদের আশা। মা। তিনি শ্রীরঙ্গনাথস্বামী দর্শনে এসেছেন, হুদিন তাঁর গান শুনেছেন। শুনে ডেকেছেন।

পককেশী বৃদ্ধা সরস্বতী বাঈ। তিনি তাঁকে পুত্র বলে সম্বোধন করেছিলেন। প্রসন্ন করেছিলেন—এমন মূলধন থাকতে ভিক্ষা কর কেন? প্রথমটা রঙ্গনাথন মৌন ছিলেন। তারপর ধীরে ধীরে হৃদয়ের উত্তপ্ত স্পর্শে বিগলিত হয়েছিলেন।

তিনি তাঁর পিঠে মলিন বস্ত্রের উপর পরম স্নেহে হাত রেখে বলেছিলেন—দেবতাকে খোঁজ?

তিনি অবাক হয়ে তাঁর মুখের দিকে তাকিয়েছিলেন।

তিনি বলেছিলেন—সে কি মেলে পুত্র ? আমি তো বলতে পারব না। জানি না। আমার জীবনে তো—। একটু চুপ করে থেকে বলেছিলেন—প্রথম জীবনে রূপ আর কণ্ঠের জন্ত বিক্রী হয়েছিলাম। রাজা সুলতানের মনোরঞ্জন করতে গিয়ে দেখলাম মনোরঞ্জন করা যায়, সেও অল্প ক্ষণ বা দিনের জন্তে। সম্পদ মেলে। মন মেলে না। এ বয়সে বিগ্রহ দর্শন করতে এসেছি। দর্শনই মিলল, তার বেশী কিছু না।

তবুও তিনি কিছু বলতে পারেন নি তাঁকে। তারপর বলেছিলেন—আমি খুঁজছি একজনকে।

—মাহুষ ?

—হ্যাঁ।

—নারী ?

—হ্যাঁ।

—তোমার স্ত্রী ?

—হ্যাঁ।

—হারিয়ে গেছে ?

—হ্যাঁ।

সরস্বতী বাড়ি বলেছিলেন—পুত্র, ঈশ্বর হলে বলতাম হয়তো পেতে পার। কিন্তু এ ক্ষেত্রে বলছি আর তো পাবে না তাঁকে।

—পাব না ?

—না। সে যুবতী। দেশ অরাজক। অরাজক বলেই বা কেন, পুরুষদের মধ্যে লম্পট কামুক বেশী। নরখাদকের চেয়েও তারা হিংস্র। হারিয়ে গিয়ে থাকলে পাবে না। নিজের কথা মনে পড়ছে। বললাম না আমার রূপ ছিল কণ্ঠ ছিল। ফলে—

—তারও আছে।

—তবে আর কি ! সে হয় মরেছে নয় হাটে-বাজারে বিক্রী হয়ে গেছে। খুঁজতে খুঁজতে দেখা হয় তো পাবে কিন্তু সেও তোমাকে চিনবে না, তুমিও চিনতে পারবে না, চিনতে পারলে আত্মহত্যা করবে।

রঙ্গনাথন উমাদের মত উঠে চলে আসতে চেয়েছিলেন। কিন্তু আশ্চর্য তাঁর হাত ধরে বলেছিলেন—আমি আশ্চা, পুত্র। যেও না, আমার কথা শোন। তোমার এমন কণ্ঠ, এমন গান। বস। পথে মরলে বড় কষ্ট পাবো। বস। গান গাও। শোনাও আমাকে কিছু।

—পারব না। মার্জনা করুন।

বৃদ্ধা বলেছিলেন—তাহলে আমিই গাউ শোন। বলেই তাঁর বীণা নিয়ে বসেছিলেন। গেয়েছিলেন রঙ্গনাথস্বামীর স্তোত্র।

পদ্মাধিরাজে-গুরুধাধিরাজে বিরিকিরাজে গুররাজরাজে

ত্রৈলোক্যরাজে-খিললোকরাজে শ্রীরঙ্গরাজেরমতাং মনোমে।

লক্ষ্মী নিবাসে জগতাং নিবাসে-উৎপন্ন বাসে রবিবিষবাসে—

স্কীরাক্ষিবাসে ফণিভোগবাসে শ্রীরঙ্গবাসেরমতাং মনোমে !

শাস্ত স্তব্ধ হয়ে গিয়েছিলেন শ্রীরঙ্গনাথন। আশ্চা বলেছিলেন—কিছুদিন আমার কাছে থাক। স্নান হও। তুমি অসুস্থ।

তাই ছিলেন তিনি। তাঁর পরমার্শেই তিনি পালাগান ফেলে দক্ষিণী মার্গসংগীত নতুন

করে চর্চা করেছিলেন। মাস চারেক পর। তখন তাঁরা পণ্ডিচেরীতে। গোলাযোগ তখন ঘনি়ে উঠছে দক্ষিণ পথের উত্তর অংশে। দক্ষিণ পর্যন্ত তার ঢেউ এসেছে। ভৌসলে সিন্ধিয়া হোলকার একসঙ্গে মিলে ইংরেজের বিরুদ্ধে যুদ্ধ ঘোষণা করে দক্ষিণমুখে আসে। সরস্বতী বাদে শেষ মহীশূর যুদ্ধে শীরঙ্গপত্তনে ছিলেন। সে রক্তপাত লুণ্ঠরাজের স্মৃতি তাঁকে বিহ্বল করেছিল। বলেছিলেন, পুত্র, মাহুয যখন যুদ্ধ করতে নামে তখন রাক্ষস হয়ে যায়। আমি জানি। চল। পণ্ডিচেরী করাসী এলাকা; সেখানে চল।

পণ্ডিচেরীতে এসে আমরা সরস্বতী বাদ্যের কাছে কয়েক মাস ছিলেন। তাঁর কাছে নতুন করে চর্চা করেছিলেন মার্গসঙ্গীতের। মন তাঁর ধীরে ধীরে অনেক সুস্থ হয়ে এসেছিল।

পণ্ডিচেরীতে কয়েকটা মজলিসে গান গেয়ে খ্যাতিও অর্জন করেছিলেন। হঠাৎ এরই মধ্যে মনে পড়েছিল লল্লাকে। লল্লা যদি মাদ্রাজে এর মধ্যে ফিরে এসে থাকে! কয়েক দিনের মধ্যে অস্থির হয়ে উঠেছিলেন। একদিন বলেছিলেন সরস্বতী বাদ্যকে—আমাকে যেতেই হবে আশ্রা। আমাকে যেতেই হবে। আমার মন বলছে—সে এতদিনে মাদ্রাজ ফিরেছে।

আশ্রা বাধা দেন নি। পণ্ডিচেরী থেকে একদিন আশ্রা-সাহেবের কাছে বিদায় নিয়ে মাদ্রাজে ফিরেছিলেন। স্থলপথে নয়, সমুদ্রপথে বড় মালবাহী নৌকায়। আশ্রা তাঁকে অর্থ দিয়েছিলেন, আর একটি বীণা দিয়েছিলেন। বলেছিলেন—পুত্র, মনকে বাঁধো। তাকে আর পাবে না। এই ছুনিয়ায় হারানোই নিয়ম। মাহুয হারাতেই আসে। বেঁচেও যদি থাকে তবুও ঠিক সেই তাকে আর পাবে না।

একটু চুপ করে থেকে বলেছিলেন—খুঁজতে বারণ করবার অধিকার আমার নেই। নিজে এই বৃদ্ধ বয়সে ওই ছাড়া তো বাঁচবার পথ দেখি না। তবুও বারণ করছি। তোমার মূলধন আছে। ওই ভাঙিয়ে যদি চিরকাল রাখতে পার তবে যে সুখ পাবে সে চোপের জলের সুখ।

একটু চুপ করে থেকে আবার বলেছিলেন—তার থেকে তুমি ঈশ্বরকে খুঁজো। না পেলেও ছুনিয়া তেতো হবে না। তাঁকে শুধু জীবনেই মেলে না, মরণেও মেলে। কিন্তু—

তার মুখের দিকে তাকিয়েছিলেন।

তারপর বলেছিলেন—কিন্তু—। তুমি কি এখানেই থাকতে পার না পুত্র? শবরীকে তুমি পত্নী, হিসাবে গ্রহণ করতে চাও—তুমি কি আমাকে জননী হিসাবে গ্রহণ করে আমার কাছে থাকতে পার না? তোমাকে সম্পদের লোভ দেখাব না। কিন্তু সঙ্গীত, সে তো দেবদুর্লভ সম্পদ। তাই দেব আমি তোমাকে।

রঙ্গনাথন বলেছিলেন—আশ্রা, ভেবে দেখুন—রামচন্দ্র বনবাসে এসেছিলেন—এসে সীতাকে হারিয়েছিলেন। বনবাস-অস্ত্রে সীতা উদ্ধার করে ফিরেছিলেন। সীতাকে না নিয়ে তিনি কি কৌশল্যা মাতার কাছে ফিরতে পারতেন? ফিরলে কৌশল্যা মাতাও কি তাঁকে ফিরিয়ে দিতেন না, বলতেন না, সীতাকে নিয়ে তবে তুমি ফিরে এস?

সরস্বতী বাদ্য বলেছিলেন—ঠিক বলেছ পুত্র। আমিও তোমাকে তাই বলছি—তুমি যাও। লল্লাকে নিয়ে তবে তুমি ফিরে এস। আর না পেলেও যেন এস।

রঙ্গনাথন প্রথমই ফিরেছিলেন মাদ্রাজ। প্রথম দেখা হয়েছিল যোশেফের সঙ্গে।

যোশেফ প্রশ্ন করেছিল—তুমি কোথায় গিয়েছিলে আচার্য?

—তারই সন্ধানে।

—লল্লায়?

—হ্যাঁ যোশেফ। আমি তোমার কাছে সত্য বলব। তাকে আমি বরদরাজের নাম নিয়ে

সমুদ্র সাক্ষী করে বিবাহ করেছিলাম। সেইদিন রাত্রে যে দিন—। সংক্ষেপে সবই বলেছিলেন তিনি যোশেককে। বলেছিলেন—আমার অপরাধ। আমার অপরাধে—। একটা দীর্ঘনিঃশ্বাস ফেলেছিলেন তিনি।

যোশেক সবিস্ময়ে বলেছিল—তুমি শবর হয়েছ রজনাতন ?

রজনাতন বলেছিলেন—না, যোশেক, লল্লাকে ব্রাহ্মণী করব বলে গ্রহণ করেছিলাম।

যোশেক আক্ষেপ করে বলেছিল—হতভাগিনী, সে হতভাগিনী। নিবোধ। সে আমার কাছে এল না কেন ? একটু পরে সে প্রশ্ন করেছিল—কিন্তু তুমি এখন কি করবে রজনাতন ?

—ঠিক তো জানি না।

যোশেক সাগ্রহে বলেছিল—একটা কথা বলব আচার্য ?

—বল।

—তুমি খুঁটান হবে ? তোমার সঙ্গে আমি খুব সুন্দরী খুঁটান কন্ঠার বিবাহ দেব। যারা ব্রাহ্মণ থেকে খুঁটান হয়েছে তাদের কন্ঠা। পাদরীরা আমার কথা শুনবে।

হেসে রজনাতন বলেছিলেন—না যোশেক। লল্লা—লল্লা ছাড়া আর কারুর আমার জীবনে স্থান নেই। সে হয় না যোশেক।

যোশেক একটু চুপ করে থেকেছিল, তারপর বলেছিল—তা হলে তুমি আর মাদ্রাজে থেকে না রজনাতন। এ কথা প্রকাশ হলে—

—তাতে তো আমি লজ্জিত হব না যোশেক। পতিত তো আমি হয়েই আছি।

লজ্জিত তিনি সত্যই হন নি। মাদ্রাজকে তিনি জয় করেছিলেন গানে। পালাগান গান নি। মার্গসঙ্গীত গেয়ে তিনি নতুন করে মাল্লষকে জয় করেছিলেন। মন্দিরে নয়—সঙ্গীত-বিলাসী মাল্লষদের নিমন্ত্রণে শুধু মাল্লষের আসরে। তাঁর অপূর্ব সঙ্গীতের জগৎ তাঁর পাতিত্যকে মাল্লষের হৃদয় আর প্রশ্রয় দেয় নি। লোকে বলেছিল, রজনাতন পাগল হয়ে সিদ্ধিলাভ করেছে গানে।

আচার্য চিপস্বরম বলেছিলেন—তুমি একটা প্রায়শ্চিত্ত কর রজনাতন।

রজনাতন হেসে বলেছিলেন—মার্জনা করবেন আচার্য !

*

*

সমাজ থেকে দূরে তিনি সেই সমুদ্রতটে আপনার ঘরে বাস করতে লাগলেন। কাটাবেন লল্লার তপস্শায়। লল্লার স্মৃতি তাঁকে আচ্ছন্ন করে রেখেছিল। নিশীথ রাত্রে পূর্ণিমার দিন—সমুদ্রে যখন জোয়ারের ডাক উঠত তখন অকস্মাৎ তাঁর মনে হত সমুদ্রতটে নারিকেল বনের বাতাসে যেন একটি নারী-কণ্ঠের আকুল ডাক ভেসে আসছে।

—প্রভু ! প্রভু ! বরদরাজ ! লল্লার বরদরাজ !

তিনি উৎকর্ষ হয়ে শুনতেন।

নিরবচ্ছিন্ন আহ্বান ভেসেই আসত—ভেসেই আসত।

রজনাতন উদভ্রান্তের মত বেরিয়ে পড়তেন ঘর থেকে। সমুদ্রতটের দিকে হাঁটতে আরম্ভ করতেন। উঁচু বালিঝাড়ি পার হয়ে নিচে নামতেন সমুদ্রতটে। সেই নারিকেল বৃক্ষশ্রেণীর দীর্ঘ ছায়া আর পূর্ণিমার জ্যোৎস্নার দুগ্ধবল আলোয় চিত্রিত-বিচিত্রিত বালুবেলার উপর তিনি ঘুরে বেড়াতেন। চীৎকার করে ডাকতেন—লল্লা—লল্লা—। আমার জীবনলক্ষ্মী ! কোথায় তুমি ?

সমুদ্রবক্ষে সমুদ্রবিহঙ্গের দল—রাত্রেও তাদের বিশ্রাম নেই—তারা জ্যোৎস্নার মধ্যে কলরব

করে উড়ে বেড়াত।

কতদিন সেই নারিকেল বৃক্ষজাড়ার তলায় শুয়ে ঘুমিয়ে পড়তেন। ভোররাজে ঘুম ভাঙত ; পাশের দিকে তাকাতে—। লল্লা নেই। চুপ করে তিনি কিছুক্ষণ বসে থেকে তারপর উঠতেন। বাড়ি কিরতেন। এসে পূজার ঘরে বসতেন ; কাঁদতেন।

পূজার ঘরটিতে সবই আছে, নেই কোন মূর্তি। সেই যে বরদরাজের মূর্তিটি চুরি গেছে, স্থানটি শূন্য হয়েছে, সে স্থান তিনি আর পূরণ করেন নি।

এক-একদিন সকালে ঘুম ভেঙে উঠেও তাঁর ভ্রম দূর হত না। তিনি সেই সেদিনের মতই ভাবতেন—লল্লা তাঁকে না পেয়ে চলে গেছে। তিনি সমুদ্রতট ধরে হাঁটতে শুরু করতেন যোশেকদের পল্লীর দিকে।

যোশেকদের পল্লীর ছেলেমেয়েরা তাকে দেখে হাসত। ব্যঙ্গের হাসি। বলত—কি আচার্য ? লল্লাকে চাই ?

—লল্লা ? কোথায় সে ? কোথায় ?

—আছে। কাল সে কিরেছে গো।

—ডাক। তাকে ডাক। আঃ !

—কিন্তু সে তো আসবে না !

—কেন ?

—সে খুঁটান হয়েছে। পৃথিবীর শ্রেষ্ঠ ত্রাণকর্তার শরণ নিয়েছে। তুমি যদি খুঁটান হও তবে সে তোমাকে দেখা দিতে পারে।

ধীরে ধীরে তাঁর স্বাভাবিক চেতনা ফিরত। তিনি বুঝতে পারতেন—এরা তাঁকে ঠাট্টা করছে। বিষন্নচিত্তে তিনি ফিরে আসতেন।

মধ্যে মধ্যে যোশেকের সঙ্গে দেখা হলে সে তাঁকে সন্মম করে অভিবাদন করে বলত—আচার্য, আবার তুমি রাত্রে বেরিয়েছিলে ? পৃথিমার ভ্রমে পেরেছিল তোমাকে !

রঙ্গনাথন বলতেন—হ্যাঁ যোশেক। কাল রাত্রে ঘুমের ঘোরের মধ্যে অকস্মাৎ যেন লল্লার ডাক শুনতে পেলাম। বার বার শুনেছি। ভ্রম তো ঠিক নয়।

যোশেক গায়ে ক্রেশ একে বলত—মেরী তোমাকে রক্ষা করুন আচার্য। প্রভু তোমাকে দয়া করুন। ভ্রম হয়তো নয়, এ সত্যই হয়তো বটে। লল্লা মরেছে তাহলে, তার প্রেতাত্মা তোমাকে ডাকে। ডেকে নিয়ে যার সমুদ্রকূলে। তার কামনা সে তোমাকে ওই সমুদ্রে কেলে তোমাকে আত্মহত্যা করাবে। তারপর তোমার আত্মাকে তার সঙ্গী করবে।

চুপ করে থাকতেন রঙ্গনাথন। ভাবতেন—তাই কি ? মন বলত—না।—লল্লা যদি মরেই থাকে তবু সে তাকে কখনও আত্মহত্যা প্রলুব্ধ করবে না। না। তা সে কখনও করতে পারে না। তার তো কামনা ছিল না। ছিল প্রেম—শুধু প্রেম—সে তো লীলাময়ী নয়—তাই তার নাম লল্লার বদলে কলাবন্তী থেকে কলাগাী করে দিয়েছিলেন। তার শ্রামবর্ণ মুখখানি উজ্জল হয়ে উঠেছিল।

মাস কয়েক পর এই ভ্রান্তিটা যেন তাঁর কমে আসতে আসতে ঘুচে গেল। কিন্তু রঙ্গনাথন তাতে তৃপ্তি পেলেন না। মনে হল সব যেন শূন্য হয়ে গেছে। এই ভ্রান্তির মধ্যে তিনি যেন লল্লাকে হারিয়েও লল্লার সঙ্গে বাস করেছিলেন।

কতদিন রাত্রে এই ভ্রমের বশে কত নারিকেল ছায়ার মধ্যে শীর্ণ একটি জ্যোৎস্নার ফালিকে লল্লা বলে মনে করে ছুটে গেছেন ; সেখানে তাকে পান নি—তবু ভ্রম ভাঙে নি, মনে হয়েছে

লল্লা। কৌতুকভরে বা অভিমানবশে এখান থেকে সরে গিয়ে গাঢ় ছায়ার মধ্যে লুকিয়েছে—
তিনি খুঁজেছেন। খুঁজে ক্লান্ত হয়ে ফিরে এসে সেই জোড়া নারিকেল বৃক্ষের তলদেশে শুয়েছেন ;
ভেবেছেন—সে একসময় এসে তাঁর পাশে বসে তাঁকে মুহূর্তের ডাকবে, প্রভু, আমি এসেছি।
আমার বরদরাজ, আমাকে ক্ষমা কর। আমি তোমাকে দুঃখ দিয়েছি। ভাবতে ভাবতে
ঘুমিয়ে গেছেন। স্বপ্নঘোরে মনে হয়েছে লল্লা তাঁর পাশে শুয়ে আছে। হাত দিয়ে তিনি
নারিকেল বৃক্ষের গোড়াটি জড়িয়ে ধরেছেন। ঘুম ভেঙে গেছে।

সে যেন মিথ্যার মধ্যেও তিনি বিরহ-মিলনের পরম-আনন্দের সত্যলোকে বাস করেছেন।
সেই বাস্তবে আনন্দলোক ক্রমে ক্রমে পরমসত্য কোথায় যেন মিলিয়ে গেল !

তিনি অনেক ভেবে স্থির করলেন—আবার তিনি দেবতা মন্দিরের বাইরে বসে
দেবতাকে গান শোনাবেন।

সেদিন তিনি যাত্রাজ ছেড়ে আবার গেলেন কাঞ্জীভরমে বরদরাজের মন্দিরের সম্মুখে।
মন্দির-চত্বরের বাইরে একটি গাছতলায় বসে তিনি বীণা নিয়ে ভজন শুরু করলেন।—

মধুরং মধুরং মধুরং মধুরং

মধু তোহপি মধুরং মধুরং মধুরং।

মধুরং বদনং মধুরং বচনং

মধুরং মধুরং কলবরং।

মধুরমধীরম নিক্তি মধুবং

মধুতোহপি মধুরং পীতাম্বরং

মধুরং চরণং চরণাভরণং

মধুরসুরং স্থিত রত্নং।

মধুর শ্রিতমেতদহো

প্রেক্ষণম তত্ত্ব মনোহরং।

আপনমনে তিনি গেয়ে চলেছেন। কোনদিকে দৃষ্টি তাঁর ছিল না। 'আত্মমগ্ন' হয়ে
গাইছিলেন। হঠাৎ মন্দিরচত্বরের মধ্য থেকে কঁাসরঘণ্টা শিঙা এবং দামামা বাজিয়ে একদল লোক
এসে তাঁকে ঘিরে দাঁড়াল। তখন দেখলেন অনেক লোক তার চারিপাশে জমে গেছে, তাদেরও
ঔপাশে মন্দিরের সিংহদ্বার থেকে বেরিয়ে একদল লোক এসে উচ্চরোলে বাজনা বাজাচ্ছে, যার
মধ্যে নিজের কণ্ঠস্বর তিনি নিজেই শুনতে পাচ্ছেন না। মধ্যপথেই গান বন্ধ করলেন তিনি।
বুঝলেন পুরোহিতেরা তাঁকে ক্ষমা করেন নি। একটা দীর্ঘনিঃশ্বাস কেলে উঠে পড়লেন।

—নাঃ। দেবমন্দির থেকে তিনি নির্বাসিত হয়েছেন। দেবমন্দিরে দেবতা কেউ নন।
পুরোহিতেরাই সব। ভুল হয়েছিল তাঁর। ভুল হয়েছিল।

সেখান থেকে উঠে কাঞ্জীপুরমের প্রান্তদেশে এসে রাত্রিটা কাটিয়ে দিলেন উন্মুক্ত আকাশের
তলায়। আশ্রয় কারুর কাছে নেবেন না তিনি। তিনি পথিক। সন্ধ্যানে চলেছেন—লল্লার
সন্ধ্যানে। পথই তাঁর আশ্রয়।

ঘুম তাঁর আসে নি। ক্ষুধা পেয়েছিল। দূরন্ত ক্ষুধা। ক্ষুৎকাতর অবস্থায় জেগে আকাশের
দিকে তাকিয়েছিলেন।* অকস্মাৎ কিছু দূরে গাছঘের সাড়া পেয়ে তিনি একটু শঙ্কিত না হয়ে
পারেন নি। মনে পড়েছিল এই বরদরাজের মন্দিরে তাঁর সেই প্রথম পালাগানের কথা।
পালাগান সেরে সমুদ্রতটে নৌকা ধরবার জন্ত যখন আসছিলেন তখন তাঁকে অজ্ঞাত আত্মত্যাগীরা

মাথায় আঘাত হেনেছিল। প্রসন্ন করেছিল, এই গান রচনা করতে কে শেখালে তোমাকে ?

আবার আজও কি তারই পুনরাবৃত্তি ঘটবে ? সেদিন যারা আঘাত করেছিল, তাদের তিনি চিনেছিলেন। তারা যোশেকের দল। তারা খৃষ্টান হয়ে আজ নতুন শিক্ষা পেয়েছে, উন্নত হয়েছে, তারা আজ শবরদের সমাজে পতিত বললে ক্রুদ্ধ হয়ে ওঠে। তিনি তাদের প্রতি উচ্চবর্ণের অন্ত্যায় অভ্যাচারের বেদনায় তাদেরই জয়ধ্বনি তুলতে চেয়েছিলেন। কিন্তু তারা তা বোঝে নি। আঘাত করেছিল।

আর আজ নিঃসন্দেহে যারা আসছে, তারা ঐ পুরোহিতের দল। তারা তাঁকে ক্ষমা করে নি। তিনি ব্রাহ্মণ হয়ে শবরকন্যাকে ভালবেসেছেন, তাকে বরদরাজের মূর্তিটি দিতে বলেছিলেন যোশেককে, সে কথা শুনে অবধি তাঁর প্রতি তাদের মর্যাস্তিক ক্রোধ। তিনি কিরে এসে মার্গ-সন্ধীতে সাধারণ মানুষের চিত্ত জয় করেছেন, সম্মান পেয়েছেন, সম্পদও পেয়েছেন, পেয়ে পেয়ে ভেবেছিলেন তিনি পুরোহিতদের চিত্তও জয় করেছেন। কিন্তু না। এদের জয় তিনি করতে পারেন নি। তারা তাঁকে প্রায়শ্চিত্ত করতে বলেছিল—তাও তিনি করেন নি। তাতে ওদের আক্রোশ আরও উত্তপ্ত হয়ে উঠেছে। আজ বরদরাজের মন্দির-সীমানার বাইরে বসে গান করাটাকে তারা চরম স্পর্ধা ধরে নিয়ে তাকে নিষ্ঠুর আঘাত করতে আসছে। তিনি স্থির হয়ে বসলেন। আশ্রুক, যা আগবে আশ্রুক।

লোক কটি কিছু দূরে এসে দাঁড়াল।

তিনি প্রশ্ন করলেন—কে ? কারা তোমরা ?

—আপনি আচার্য রঙ্গনাথন ?

হেসে রঙ্গনাথন বললেন—আচার্য কি না জানি না। তবে আমি রঙ্গনাথন।

—আমি আপনার সঙ্গে দেখা করতে এসেছি।

বিস্ময়ে চমকে উঠলেন রঙ্গনাথন। এ যে নারীকণ্ঠ !

স্বর্ধাঙ্গ আচ্ছাদনে আবৃত করে একটি বালকমূর্তির মত কেউ তাঁর দিকে এগিয়ে এল। এসে তাঁর সামনে বালুর উপর হাঁটু গেড়ে বসল। নিজের অঙ্গের আচ্ছাদন সে খুলে ফেলে বললে—প্রণাম আচার্য।

সেদিন পূর্ণিমা ছিল। পরিপূর্ণ জ্যোৎস্নায় প্রান্তর ঝলমল করছিল। সেই জ্যোৎস্নায় অবাক হয়ে তার মুখের দিকে তাকিয়ে রইলেন রঙ্গনাথন। কি রূপ ! এ কৃষ্ণাঙ্গী নয়, গৌরী—অপরূপ লাবণ্যবতী পূর্ণযৌবনা একটি মেয়ে।

রঙ্গনাথন জিজ্ঞাসা করলেন, তুমি কে ?

মেয়েটি বললে—আমি সামান্ধ্য। আমার নাম ‘হেমাধা’।

—হেমাধা ! বিস্ময়ের আর অবধি রইল না রঙ্গনাথনের। দেবদাসীশ্রেষ্ঠা হেমাধা ! অনেককাল আগে তাকে দেখেছেন রঙ্গনাথন। সে দেখেছেন আলোকমালায় উজ্জল নাট্যমন্দিরের মধ্যে, নর্তকীর বেশে। অপূর্ব প্রসাধনে প্রসাধিতা, পুষ্পমালায় অলঙ্কারে সজ্জিতা। আর এ মেয়ের সঙ্গে সে-সবের চিহ্ন নেই। কিন্তু তার থেকেও অনেক শ্রীমতী মনে হচ্ছে। তার উপর এই ভুবনভরা জ্যোৎস্না। জ্যোৎস্নার আলোয় সূর্যের দীপ্তি নেই, উত্তাপ নেই, কিন্তু একটি আশ্চর্য রহস্য আছে। রূপকে সে তীক্ষ্ণ বিশ্লেষণে বিশ্লেষিত করে না, একটি কুহেলী রহস্যে রহস্যময়তায় অপরূপা করে তোলে। শুভ্র সৌন্দর্যের একটি বিলেপনের প্রসাধন বুলিয়ে দেয়। মনের মধ্যে তাঁর গুঞ্জন করে উঠল—

“স্বর্ণ-কমলবর্ণাভাং স্নেহকোমলাং স্নেহোচনাং শুভ্রজ্যোৎস্নাবিলেপিতাং অপরূপাং মনোরমাং—”

সলজ্জ হেসে হেমাষা বললে—আচার্য, আপনাকে আমি আহ্বান করতে এসেছি আমার গৃহে। যখন পুরোহিতেরা দামামা নাকাড়া শিঙা বাজিয়ে আপনাকে গানে বাধা দিয়ে স্তব্ব করে দেয়, তখন আমি নিজেকে আচ্ছাদনে আবৃত করে ওই জনতার মধ্যে দাঁড়িয়ে আপনার গান শুনছিলাম। চোখ থেকে আমার জল পড়েছিল। আপনি গান বন্ধ করলেন। তারপর উঠে নগরের পথ ধরে চলে গেলেন, আমি অনেক দুঃখ পেলাম। কালীভরমে আপনি কোথায় যাবেন, কোথায় স্থান পাবেন তা বুঝতে পারলাম না। একটি অল্পগত লোককে আপনার পিছনে পিছনে পাঠিয়েছিলাম আপনি কোথায় যান তাই দেখতে। সে গিয়ে বললে, আপনি নগর পার হয়ে এই বালুপ্রান্তরে এসে উত্তরীয় পেতে শুয়েছেন তার উপর। অতুচ্চ। কারণ সে আপনাকে কোথাও খেতে দেখে নি। তাই আমি এসেছি আচার্য। কিঞ্চিৎ আহাৰ নিয়ে এসেছি, দয়া করে গ্রহণ করুন, আর দয়া করে আমার গৃহে আশ্রয়, রাত্রির মত অবস্থান করবেন।

অবাক হয়ে গেলেন রজনাতন।

বললেন—দাও, আহাৰ দাও। সত্যই বড় ক্ষুধা পেয়েছিল আমার। কিন্তু তোমার ঘরে আমি যাব না দেবদাসীশ্রেষ্ঠা, তাতে তোমার বিপদ হবে।

হেমাষা বললে—আর আমি দেবদাসী নই আচার্য। বোধ হয় আপনি জানেন না। একদিন রাত্রে মন্দির থেকে বেরিয়ে যাবার পথে আমি অপহৃত হয়েছিলাম। কুরিঙ্গী পণ্টনের কজন গোরা আমাকে ধরে তুলে নিয়ে গিয়েছিল। সকালে আমি অচেতন হয়ে পড়ে ছিলাম নগর থেকে ক্রোশখানেক দূরে। তারপর থেকে আর আমি দেবদাসী নই। এখন আমি গণিকা।

মাথা হেঁট করে বসে রইল হেমাষা।

রজনাতন বললেন—দাও, আমাকে আগে খেতে দাও। বলে হাত পাতলেন তিনি। আহাৰ করে জলপান করে বললেন—আঃ! প্রাণ আহাৰ নইলে বাঁচেনা। তুমি আমাকে আহাৰ দিলে না—প্রাণ দিলে!

হেমাষা বললে—এবার আমার ঘরে চলুন। আমি জানি শ্রীরঙ্গমে আপনি আশ্রয় সন্ধানী বাজিএর ঘরে অনেক দিন ছিলেন। আশ্রয় আপনাকে মায়ের মতই স্নেহ করতেন।

কণ্ঠস্বর মুহূ করে সে বললে—আজীবন আপনার কৃতদাসী হয়ে থাকব আচার্য। আপনি এক শবরীকে ভালবেসে তাকে হারিয়ে উদ্ভ্রান্তের মত হয়ে গেছেন। গৃহহীন বৈরাগী আপনি। আমি শবরীর চেয়ে বেশী ভালবাসতে জানি প্রভু। আমি শুধু একদিনের জন্ত নয়, চিরদিনের জন্ত আপনাকে নিয়ে যেতে চাচ্ছি। আমার অর্থ আছে প্রভু। আমি আপনাকে নিয়ে শ্রীরঙ্গম ত্যাগ করে চলে যাব। মাদ্রাজে আপনার লজ্জা হবে হয় তো। মাদ্রাজ নয়, চলে যাব পণ্ডিচেরীতে, নয় তো কলকাতায়। যেখানে বলবেন আপনি।

স্তব্ব নিম্পন্দ মাটির মূর্তির মত বসে রইলেন রজনাতন।

—আচার্য!

—দেবী!

—দেবী নয়, আমি হেমাষা—আপনার দাসী।

—অমৃতের মত বাঁকা তোমার মধুর থেকেও মধুর। কিন্তু তুমি আমাকে ক্ষমা কর।

একটু চুপ করে থেকে হেমাষা বললে—একটা প্রশ্ন করব আচার্য?

—বল।

—কৃষ্ণাঙ্গী লল্লা এর, অর্থাৎ যে সব গুণ-রূপের কথা বললেন, তার থেকেও অধিকতর রূপ-গুণের অধিকারিণী ?

—তা আমি বলছি না, দেবী !

—তবে ?

—একদিন সমুদ্রতটে, আজকের মতই এক পুর্ণিমা রাত্রে সে আমাকে বলেছিল, আপনি আমার বরদরাজ। আমি তাকে বলেছিলাম, আমি যদি তোমার বরদরাজ হই লল্লা, তবে তুমি আমার লক্ষ্মী। অথবা গোদাদেবী, যিনি লক্ষ্মী হয়েও অনার্য গৃহে জন্ম নিয়ে নিজ তপস্যায় নারায়ণের পাশে নিজ অধিকার অর্জন করে আজও প্রতিষ্ঠিতা আছেন।

—কিন্তু সে তো হারিয়ে গেছে আচার্য।

—মনে সে অক্ষয় হয়ে আছে হেমাষা। নইলে তোমার নিগমণ উপেক্ষা করতাম না। মাথায় করে নিতাম। সে আমার কাছে বরদরাজের নির্মাণ্য, আমার জীবনের সঙ্গে জড়িয়ে গেছে। তুমি আমাকে মার্জনা কর।

হেমাষা কয়েক মুহূর্ত নতমস্তকে চুপ করে রইল, তারপর প্রণাম করে উঠে ভোজনপাত্রটি হাতে করে চলে গেল। রঙ্গনাথন দেখলেন, জ্যোৎস্নার আলোয় তার গালের উপর ছুটি রেখা চকচক করছে। কাঁদছিল হেমাষা।

সেদিন তিনিও কেঁদেছিলেন, তবে তারপরে—

পরদিন ভোরবেলা যাত্রা করে মাদ্রাজ এসে পৌঁছেছিলেন। কিন্তু কিছুদিনের মধ্যেই কাজীভরম থেকে এল বিচিত্র সংবাদ, মাদ্রাজের উচ্চবর্ণের সমাজে এ নিয়ে পরিহাস ও ব্যঙ্গের আর অবধি রইল না।

শ্রেষ্ঠ উচ্চিষ্টা দেবদাসী হেমাষার ঘরে অল্পজল গ্রহণ করেছেন রঙ্গনাথন। রঙ্গনাথনের উপাধি রটে গেল “হেমাষার জ্বর” “শবরীর অধরপিয়াসী”।

মাদ্রাজের বিশিষ্ট ব্যক্তিদের মজলিসে মার্গসঙ্গীতের আসরে তিনি গান ধরলেই কোথাও থেকে কেউ বলে উঠত—“জয় লল্লা”। গান শেষ হলে ধ্বনি উঠত, “জয় হেমাষা”।

তিন্তু হঠাৎ একদিন রঙ্গনাথন অনেক তদ্বির করে ইংরেজদের জাহাজে স্থান সংগ্রহ করে চড়ে বসলেন। যাবেন কলকাতা। কলকাতা থেকে উত্তর ভারত ঘুরবেন।

* * * *

উত্তর ভারতের তীর্থে তীর্থে। বারাণসী প্রয়াগ অযোধ্যা বৃন্দাবন পর্যন্ত গিয়ে আর যেতে পারলেন না। সমগ্র উত্তর ভারত তখন একটা যুদ্ধক্ষেত্রে পরিণত হয়েছে। অযোধ্যার নবাবের রাজ্যে কিছু শান্তি। বৃন্দাবনে কিছুদিন থাকলেন। রাধা আর কিশণজী। কিশণজীর থেকেও রাধা প্রধান। রাধারাজীর রাজ্য। জগতের পতি, পুণ্যাবতার কিশণজী তাঁর অধীন। পায়ে ধরে মান-ভঙ্গন করেছিলেন। তারপর চলে গিয়েছিলেন। সারা জীবন কেঁদেছিলেন রাধা।

কুঞ্জে কুঞ্জে ঘুরে বেড়াতে, কান পেতে শুনতে সে ক্রন্দন শোনা যায় কিনা। তার মধ্যে মিল-পেতে নজের জীবনে। লল্লার ক্রন্দন আর রাধার ক্রন্দনে তফাৎ ছিল না তাঁর কাছে।

বিচিত্র মাহুষের মন। আবার একদিন উত্তলা হয়ে উঠল। মনে হল দক্ষিণের কথা। মাদ্রাজ! লল্লা যদি কিরে এসে থাকে! মনে মনে নানান কাহিনী রচনা করেন। লল্লা পথভ্রাস্ত হয়ে গিয়ে পড়েছিল কোন স্থানে হয়তো। মারাঠাদের এলাকায় কিংবা নিজামের

এলাকার—যেখানে লড়াই চলছেই চলছে। সর্বত্র আছে ইংরেজ ফিরিকী। তারা হয়তো তাকে ধরে নিয়ে গিয়েছিল। অথবা নির্মম অত্যাচার করেছিল। মনে পড়েছিল মালাবান পর্বত যাবার সময়কার সেই আশ্রয়স্থল শবরপল্লী। সেই “উল্লি” মেয়েটি। ওদের গোষ্ঠীপতির কন্ঠ। অত্যাচারে পাগল হয়ে গিয়েছিল। দিনরাত্রি চীৎকার করত—‘না-না-না ছেড়ে দে, ছেড়ে দে, ছেড়ে দে। মেরে কেল। মেরে কেল আমাকে। মেরে কেল।’ সেই ‘উল্লি’র মতই হয়তো পাগল হয়ে পথে পথে ফিরে আবার ক্রমে স্বস্থ হয়েছে এতদিনে। স্বস্থ হয়ে মাদ্রাজ ফিরে এসেছে। যোশেক তাকে নিশ্চয় সব বলেছে। হয়তো বা যোশেকদের পল্লীতেই তাঁর পথ চেয়ে সে বসে আছে।

ভাবতে ভাবতে মনে বিশ্বাসটা দৃঢ় হয়ে ওঠে। শেষে একদিন স্বপ্ন দেখলেন। পরদিন তিনি আবার ওঠেন। চল মাদ্রাজ। আবার মাদ্রাজ ফিরে যাবেন। বৃন্দাবন থেকে শহুরে শহুরে বড় বড় মজলিসে গান শুনিয়ে উপার্জন করে, কোথাও নৌকায়, কোথাও উটের গাড়িতে, কোথাও পদব্রজে ঘুরে কলকাতা এসে পৌঁছলেন। এবার ফিরিকী কোম্পানীর জাহাজে স্থান সংগ্রহ করবেন। মাদ্রাজ যাবেন। মাদ্রাজে নেমেই নিশ্চয় যোশেকদের পল্লীর কারুর সঙ্গে দেখা হবেই। তারা নৌকায় কাজ করে।

জাহাজে একটু নিজের স্থানের জন্ত গিয়ে কিন্তু যোশেকের সঙ্গেই তাঁর দেখা হয়ে গেল।

—যোশেক!

যোশেকও কম আশ্চর্য হয় নি, সে বললে—আশ্চর্য!

—তুমি কি আমাকে খুঁজতে কলকাতায় এসেছ? লজ্জা ফিরেছে?

যোশেক হাসলে। অতি বিষন্ন সে হাসি। বললে—সে ছুঁতগিনীকে এখনও তুমি ভুলতে পার নি, আচার্য?

—ভুলতে কি পারি যোশেক! তাকে যে আমি সত্যি ভালবেসেছি। শুধু সমাজের ভয়ে কয়েক দণ্ড বিহ্বল হয়ে গিয়েছিলাম। তার জন্ত এতদিন দুঃখ পাচ্ছি। কিন্তু তার কত বড় দুঃখ, কত বড় দুর্দশা হয়েছে ভাব তো! ওঃ—

দীর্ঘনিঃশ্বাস ফেলে যোশেক বললে—না আচার্য, সে তো ফেরে নি।

—ফেরে নি! স্তম্ভিত হয়ে গেলেন রজনাতন। এত বড় বিশ্বাস, তীর্থের স্বপ্ন সব মিথ্যা হয়ে গেল! সংসারে কি সবই মিথ্যা! সত্য কি কিছুই নেই! হে বরদরাজ! হে শ্রীরজনাতন প্রভু! হে একাধরেশ্বর! হে কন্তাকুমারী! তোমার অনাদিকালের মহেশ্বর কামনায় তপস্শ্রা, তাও কি মিথ্যা?

দীর্ঘনিঃশ্বাস ফেলেই ফিরছিলেন রজনাতন। যোশেক তাঁকে ধরে আটকালে।

—কোথায় যাবে?

—জানি না যোশেক। যেমন পথে পথে ফিরছি, তেমনিই ফিরব। এখানে থাকি কিছুদিন। আবার উঠব।

—না। ফিরেই চল আচার্য। মাদ্রাজ চল। তোমার অভাব আমরা অহুভব করি। আর মাদ্রাজের লোক তোমার বিপক্ষে যাবে না। তুমি বারাগনীতে আর বৃন্দাবনে মন্দিরে গান করেছ, সেখানকার প্রশংসা লোকের মুখে মুখে মাদ্রাজ পর্যন্ত পৌঁছেছে। চল, ফিরে চল।

শুনে ভাল লাগল রজনাতনের। সে অনেকক্ষণ চুপ করে থেকে বললে—সেই জন্তই এসেছিলাম এখানে। কোম্পানীর জাহাজে জায়গার জন্ত। বৃন্দাবনে স্বপ্ন দেখেছিলাম যোশেক, লজ্জা মাদ্রাজে তোমাদের পল্লীর সমুদ্রতটে আমার জন্তে বসে আছে। সেই বিশ্বাসে ফিরছিলাম

বড় আশা নিয়ে। আবার একটু চূপ করে থেকে বললেন, তবে তাই চল।

যোশেক তার হাত চেপে ধরে বললে—আমি বড় নৌকা নিয়ে এসেছি ব্যবসায়ীদের মাল নিয়ে। এখন আমি নিজে মালের বড় নৌকা করেছি। এখানকার মাল নিয়ে আবার কালই রওনা হব। চল তুমি।

সেই নৌকায় ফিরেছিলেন রঙ্গনাথন। নৌকো পথে মধ্যে মধ্যে কূলে ভিড়িয়ে বিশ্রাম করে। প্রয়োজন হয় পানীয় জলের। খাবার-দাবারেরও দরকার হয়। নৌকো সেই কারণেই ভিড়েছিল পুরীতে।

নীলমাধবের রাজধানী পুরী। সমুদ্র থেকে তার মন্দিরচূড়া দেখা যায়। হঠাৎ রঙ্গনাথনের চিত্ত আলোড়িত হয়ে উঠল।

মহাতীর্থ জগন্নাথম। আচণ্ডালের পরমতীর্থ। জগন্নাথ নীলমাধবের পরম প্রিয় এই শবরেয়া। শবরেয়াও তাঁর সেবক। সেবার অধিকারী। মহাপ্রসাদে জাতিভেদ নেই, স্পৃশ্য-স্পৃশ্য নেই। সর্ব জাতির হাতের মহাপ্রসাদ অন্ন ফিরিয়ে দেবার জুফুন নেই এখানে। এখানে সব সমান, সব সমান। ভাবতে ভাবতে রঙ্গনাথনের চোখে জল এল। আপোস হল, এতকাল সে এই মহাপ্রভু—মহান দেবতাকে গান শোনায় নি!

রঙ্গনাথন বীণা হাতে উঠে দাঁড়িয়ে বললে—যোশেক, আমি এখানে নামব। জগন্নাথকে আমার আজও গান শোনানো হয় নি। আমি নামব।

যোশেক হেসে বললে—নামবে আচার্য? কিন্তু মাদ্রাজ?

—যাব। যাব। পরে যাব। এখন আমাকে নাগিয়ে দাও।

একথানা ছোট নৌকো ডাকলে যোশেক। বললে—মাদ্রাজকে তুলো না।

* * * *

সেই অবধি রঙ্গনাথন এইখানে রয়ে গেছেন। বড় ভাল লেগেছে। বড় ভাল লেগেছে।

প্রথম যেদিন বীণা হাতে মন্দিরচত্বরে ঢুকে পাণ্ডাদের অনুমতি নিয়ে মহাপ্রভুকে গান শোনাতে বসলেন সেইদিন সেই গানই গেয়েছিলেন। যে গান গেয়ে তিনি ভিরস্কৃত হয়েছিলেন কাজীভরমে—সেই গান—“কৃষ্ণবর্ণ চর্মের অন্তরালে যিনি বাস করেন, তিনিই বাস করেন বৈকুণ্ঠে। তিনিই বাস করেন শ্বেত পীত গৌর শ্রাম সকল-বর্ণ-চর্মাবৃত মাল্লবের দেহের মধ্যে। জীবের মধ্যে। যিনি বসবাস করেন বৈকুণ্ঠে, তিনিই বাস করেন ব্রাহ্মণপল্লীতে এবং শবর পল্লীতেও তিনিই বাস করেন। ওই কৃষ্ণচর্মের অন্তরালে যিনি, তিনিই কোথাও বরদরাজ, কোথাও জগন্নাথ, কোথাও শ্রীরঙ্গনাথন, কোথাও রামেশ্বরম, কালীতে তিনিই বিশ্বনাথ। কৈলাসের ভবানীপতি যিনি, তিনিই কিরাতরূপী হয়ে অর্জুনের প্রণতি এবং পূজার মাল্য কণ্ঠ ধারণ করেছিলেন।”

জয়ধ্বনি উঠেছিল চারিদিকে—জয় জয় জগন্নাথ, জয় নীলমাধব! একদিনেই তিনি সকলের স্নেহ প্রশংসা দুই অর্জন করেছিলেন। চিত্ত তাঁর ভরে উঠেছিল। উঠে আসবার সময় প্রভুকে প্রণাম করে বলে এসেছিলেন, সাধুনা তোমার কাছেই পাব। এখানেই রইলাম জীবনের বাকী দিনগুলি।

সেই অবধি এখানেই থেকে গেছেন। শবরপল্লীর পূর্বদিকে বন কাউবন, পশ্চিমে চক্রতীর্থের ধার থেকেও কাউবন, সম্মুখে বেলাভূমি সেখানে অশাস্ত সমুদ্রকল্লোল, উত্তরে নীলমাধবের মন্দির। এরই মধ্যে বেছে বেছে শবরপল্লীর পূর্বদিকের কাউবনের মধ্যে তিনি একটি কুটির তৈরী

করালেন। মনোরম ছোট একটি কুটির। দক্ষিণমুখে একটি বারান্দা, পশ্চিমে একটি বারান্দা। সকালে উঠে পশ্চিমদিকের বারান্দায় বসে বীণায় বঁজার তুলে আলাপ করেন ভৈরবী। আবার সন্ধ্যায় চলে যান মন্দিরে, আরতি দর্শন শেষে প্রণাম করে চলে এসে দক্ষিণের বারান্দায় বসে সমুদ্রের দিকে তাকিয়ে আপনমনেই সঙ্গীত আলাপ করেন। সম্মুখে সমুদ্রবক্ষে উষ্ম তরঙ্গ-লীর্ঘে বিচিত্র দীপমালা জলে ওঠে মধ্যে মধ্যে। মনে মনে বলেন—এই ভাল, এই ভাল—

জপ কোটি গুণং ধ্যানং ধ্যান কোটি গুণং লয়ঃ।

লয় কোটি গুণং গায়ং গানং পরতরং নহি।

এর মধ্যেই জীবন তাঁর পূর্ণ হয়ে উঠুক।

মধ্যে মধ্যে নিমজ্ঞণ আসে। দেবদাসীদের নৃত্য দেখবার জন্ত মন্দিরের পুরোহিত বলে পাঠান—আজ নাট্যমন্দিরে প্রভুর সম্মুখে এক দেবদাসী নৃত্য দেখাবার নিমজ্ঞণ করেছেন আচার্য। উপস্থিত থাকবেন আপনি।

বাকী সময়টা কাটে তাঁর ওই শবর বালক-বালিকাদের নিয়ে। কিন্তু তার মধ্যেও অকস্মাৎ লল্লা সম্মুখে এসে দাঁড়ায়। মধ্যে মধ্যে এমনও হয় যে তিনি বিভ্রান্ত হয়ে যান।

মনে হয় জগন্নাথদেবের মন্দিরের মধ্যে গণিবেদীর সম্মুখে দেবতাকে আডাল করে দাঁড়িয়ে আছে লল্লা। কখনও কখন দিনরাত্রি সব বিষণ্ণতায় ভয়ে যায়।

তখন চলে যান পুরী ছেড়ে। ভুবনেশ্বরের দিকে।

বিন্দু-সরোবর-প্রান্তে গিয়ে বসেন। সরোবরের মাঝে মন্দির। বৈশাখে চন্দনঘাটায় ভগবান এসে ওই মন্দিরে বাস করেন। কখনও ঘোরেন মন্দিরে মন্দিরে। দেবাদিদেব মহাদেব এবং মহাদেবীর চত্বরে বসে গান শোনান।

কখনও মন্দিরগাত্রে উৎকীর্ণ বনম্পতি-কাণ্ডে লীলারিত দেহের ভার ত্রস্ত করে প্রতীক্ষমানা তরুণীকে দেখেন। তার মধ্যে লল্লার ছায়া দেখতে পান।

কখনও চলে যান খণ্ডগিরি উদয়গিরিতে। সেপানকার চারিদিকে গভীর বন জমে উঠেছে। বাঘের ভয় আছে। সাপের ভয় আছে। কিন্তু সে ভয় যেন তাঁর চলে গেছে। সেইখানেই কোন একটি গুহাতে বসে কাটিয়ে দেন দিন। অপরাহ্ন হলে চলে আসেন। কিছুদিনের মধ্যে ভুবনেশ্বরেও ছোট একটি কুটির তৈরী করলেন।

পুরীধামে যাত্রীদের ভিড় হলে এখানে চলে আসেন। মাহুঘের ভিড় তাঁর সহ্য হয় না। শুধু ভাবতে ভাল লাগে।

আত্মা সরস্বতী বাকী ঠিক বলেছিলেন—পুত্র, সব মিথ্যা। আমি জন্মেছিলাম উচ্চকুলে, রূপের জন্ত কণ্ঠের জন্ত ঘর-সংসার থেকে ছিনিয়ে নিয়ে মাহুঘ আমাকে নর্তকী করে আমার যত অপমান করুক—আমাকে নিরাসক্তি একটি দিয়েছে। নিরাসক্ত হয়ে পৃথিবীকে দেখবার স্রোত আমি পেয়েছিলাম। দেখে বুঝেছি, মাহুঘ পৃথিবীতে নিতে আসে না—দিতে আসে, পেতে আসে না, হারাতে আসে। পাণ্ডুরাটা মিথ্যা, হারানোটা ইতি। সব হারিয়ে ককির হয়ে পথে দাঁড়াতে অনেক দুঃখ পুত্র। তাই যে জীবনের প্রথম থেকে ককির সে কিছু হারায় না। লল্লাকে তুমি পেয়েছিলে, লল্লা সত্যি তোমার কাছে নিজেকে ঢেলে দিয়েছিল—তাই তাকে হারিয়েছ—এবং এত দুঃখ তোমার। ভুলতে হলে আর কাউকে পেতে হবে। তাই বলি ভগবানকে পেতে চেষ্টা কর। যাকে পেলে হারাতে হয় না।

লল্লা হারিয়ে গেছে। কিন্তু তাকে ভুলতে তিনি পারছেন না—পারবেন না। দেবতাকেও তিনি পেতে চাইতে গিয়েও যেন চাইতে পারছেন না। তাতে যে লল্লাকে হারানোর দুঃখ

হারিয়ে কেলেতে হবে।

লল্লা হারিয়েছে—কিন্তু তাকে হারানোর দুঃখ তিনি ভুলতে পারবেন না। কিছুতেই পারবেন না। তা হলে লল্লা নিশ্চিহ্ন হয়ে যাবে।

*

*

*

*

সেদিনও বীণায় হাত রেখে ঠিক এই কথাই ভাবছিলেন। ফাস্তন মাস—পুরীতে ভগবানের দোলযাত্রার মহোৎসব। যাত্রীরা দলে দলে আসতে শুরু করেছে। ভিড় জমছে দিন-দিন। কোলাহল ছেড়ে পাগিয়ে ভুবনেশ্বর-প্রান্তে নির্জনে তাঁর কুটিরটিতে এসে আশ্রয় নিয়েছেন রঙ্গনাথন।

আজ বসে আছেন বিন্দু সরোবরের ধারে। কোথায় পুষ্পিত হয়েছে চম্পকবৃক্ষ। মন্দির গন্ধ আসছে। কাছে একটি নিমগাছকে আচ্ছন্ন করে একটি মাধবীলতা পীতময় শুভ্রবর্ণ ক্ষুদ্র ক্ষুদ্র পুষ্পস্বকে যেন ভেঙে পড়তে চাইছে। বেলা প্রায় এক প্রহর। কোলের উপর বীণাটি রয়েছে, তাতে সুর বেঁধে তিনি তারে ঝঙ্কার দিয়ে সুর তুলছেন। কি বাজাচ্ছেন—সে সম্পর্কে খুব সচেতন নন। আঙুল তাঁর বাজিয়ে চলেছে অবচেতন মনের পেয়ালে। তিনি নিজে ভাবছেন সব মিথ্যা, এটাই সব থেকে বড় সত্য।

পুষ্পস্বক আচ্ছন্ন করে বস্ত্র মধুমক্ষিকারা গুঞ্জন করছে। সে গুঞ্জনে প্রমত্ততা রয়েছে। বীণাতে তাঁর আঙুল ওই গুঞ্জন ঝঙ্কারকে তুলে চলেছে।

একটি কলরব এসে কানে পৌঁছল।

তিনি চোখ তুললেন। কলরবের ভাষা তাঁকে আকৃষ্ট করল। তামিল ভাষায় কথা বলছে। দক্ষিণের যাত্রী এই সময় আসে বেশী। এই ইংরেজ মারাঠা নিজাম পিণ্ডারীদের তাণ্ডবের মধ্যে স্থলপথ বিপদসঙ্কুল। সমুদ্রপথ আবার মাসে ঝঙ্কাবিস্কুল। তাই নৌকো করে তারা এই বসন্তোৎসব দোলযাত্রার সময় বেশী আসে। তামিল-ভাষী যাত্রী। স্বাভাবিকভাবেই তিনি উৎসুক দৃষ্টিতে তাকালেন। একদল নারী-পুরুষ। সন্ন্যাসিনী একজন। অনাবৃত মস্তক, মাথার রক্ষ কেশভার চূড়া করে বাঁধা। ও কে? গলায় তুলসীর মালা! ও কে?

মুহূর্তে পল্লু হয়ে গেলেন তিনি।

লল্লা! লল্লা সন্ন্যাসিনী! কণ্ঠে তার তাঁরই সেই তুলসীর মালা! গৈরিক-বাসা—শীর্ণা, তপস্বিনী। ‘আয়ত দৃষ্টিতে বৈরাগ্য। সে লল্লায় এ লল্লায় অনেক প্রভেদ। তবুও সে লল্লা। লল্লাও তাঁকে দেখে শুরু হয়ে দাঁড়িয়ে গেছে। স্থির দৃষ্টিতে দেখছে। নিম্পলক স্থির দৃষ্টি।

যাত্রীরা তাকে বলছে—কি হল? এস। কল্যাণী! কল্যাণী! লল্লা নিরুত্তর।

তিনি চীৎকার করে ডাকতে চাচ্ছেন, কিন্তু কণ্ঠ কি তাঁর রুদ্ধ হয়ে গেল?

হে বরদরাজ—হে রঙ্গনাথস্বামী—ভাষা দাও, ভাষা দাও।

লল্লা নড়েছে। স্থির দৃষ্টিতে তাঁর দিকে তাকিয়ে কম্পিত পদক্ষেপে এগিয়ে আসছে। সে কাছে এসে নতজাহ্ন হয়ে বসল। চারিদিকের জনতাকে গ্রাহ্য করলে না। তিনি এবার বললেন—কণ্ঠ বাষ্পরুদ্ধ হয়ে গেছে তাঁর—বললেন—লল্লা!

সে হাত জোড় করে শ্মিত হেসে বললে—আমি কল্যাণী। কন্ঠাকুমারিকায় দেবী কুমারী-মাতার মন্দিরের বহির্দেশ পরিমার্জনা করি—আর মাতার দৃষ্টিতে তপস্বী করি। বরদরাজকে আমার কামনা। লল্লাকে আমি জানতাম। সে সেদিন সমুদ্রজলে ডুবে মরতে গিয়েছিল। তাকে তুলেছিলেন কন্ঠাকুমারীর সন্ন্যাসিনী মাতা। তাঁরা নৌকোয় ফিরছিলেন পার্শ্বসারথি দর্শন করে।

সেদিন ভোরে যখন রঙ্গনাথন চলে গেলেন তার দিকে না তাকিয়ে, তার আহ্বানে সাড়া না দিয়ে চোরের মত, তখন লজ্জা প্রথম ভেবেছিল, বোধ হয় গ্রহরীরা তাঁকে খুঁজতে এসেছে—এদিকে, তাদের সাড়া পেয়ে তিনি উঠে চলে গেলেন তাদের পথ রোধ করতে। তাকে বাঁচাতে। সে সজরে উঠে বসেছিল। নারিকেল বৃক্ষের সন্নিবেশ যেখানে নিবিড় সেখানে গিয়ে সে লুকিয়েছিল। কিন্তু কিছুক্ষণের মধ্যেই তার মনের ভয় স্থির হয়ে গিয়ে জেগেছিল সংশয় ও প্রাণ।

রঙ্গনাথন কাল তার সঙ্গে সমুদ্রতটে বাসর পেতে তাকে বৃকে টেনে নেবার সময় বলেছিলেন—কিসের ভয়? তুমি আমার পত্নী। তুমি যাবে আপনার গৃহে।

তবে? তাহলে? বার বার—তার গলায় ঝুলছিল যে তুলসীর মালাখানি, যেখানি তিনিই' পরিয়ে দিয়েছিলেন পত্নীরূপে বরণ করে, সেখানিকে সে হাত দিয়ে বার বার স্পর্শ করেছিল। এ তো তার স্বপ্ন নয়। মিথ্যা নয়। এ তো সব সত্য। তবে, তাহলে?

এর উত্তর নারীকে কাউকে দিতে হয় না। নারীর নিজের অন্তর দিয়ে দেয়।

ওঃ, তার সারা অঙ্গে রঙ্গনাথনের দেহের উষ্ণ স্পর্শ এখনও লেগে রয়েছে। তার অধরোষ্ঠে তাঁর চুষনের স্পর্শ অনুভব করেছে। কি আবেগ—কি গাঢ়তা সে চুষমে। সে ভেবেছিল তার নারীদেহ সার্থক, নারীজীবন সার্থক। সে ধন্ত, সে ধন্ত। সে ধন্ত হয়ে গেল।

সে তাকে বলেছিল, আপনিই আমার বরদরাজ!

তিনি বলেছিলেন, তা হলে তুমিই আমার লক্ষ্মী!

সব মিথ্যা! সব মিথ্যা! সব মিথ্যা! সত্য এমন করে মিথ্যা হয়ে যায়? হে বরদরাজ! চীৎকার করে কঁাদতে ইচ্ছা করছিল লজ্জার। কিন্তু ভয়ে সে পারে নি। ভয় হয়েছিল তার নারীত্বের ব্যর্থতার লজ্জা প্রকাশের, ভয় হয়েছিল নিজের লাঞ্ছনার, ভয় হয়েছিল রঙ্গনাথনের লাঞ্ছনা হবে, জাতিচ্যুতি ঘটবে তাঁর সমাজে। কিন্তু সে কি করবে?

সূর্য উঠছে তখন। পূর্ব দিগন্তে আকাশমণ্ডল এবং সমুদ্রগর্ভে একটি রক্তাভুরঞ্জিত মণ্ডল ক্রমশ বিস্তৃত হচ্ছে। এইবার একসময় ওই অম্লরঞ্জন উজ্জল থেকে উজ্জলতর হতে হতে সমুদ্রগর্ভ থেকেই যেন সূর্য লোক দিয়ে উঠবেন আকাশলোকে। তিনি দেখবেন ওর এই লজ্জিত, কলঙ্কিত লাহিত মুখ? ছি ছি ছি!

মর্মযজ্ঞগার ক্ষোভের আর সীমা ছিল না তার। সে ভেবেছিল মৃত্যু ভাল। সে মরবে, সে মরবে।

উদ্রাস্ত ক্ষোভে যজ্ঞগায় মাছুষের এক-একটি মুহূর্ত আসে যখন তার মৃত্যুভয় থাকে না। পৃথিবীর ভয় বড় হয়ে ওঠে। মৃত্যু তখন পরমাত্রায় বলে মনে হয়। সে মুহূর্তে তার কর্তব্য স্থির করে নিয়ে তার বন্ধুবন্ধনীখানি খুলে নিয়ে এসে ঝাঁড়িয়েছিল খাড়া বালুচরের উপরে। তখন আবার জোয়ার এসেছে। বালুচরের নিচেই সমুদ্রজল গভীর হয়ে উঠেছে, উজ্জ্বলিত তরঙ্গে আঘাতের পর আঘাত হানছে।—সেখানে বসে সে নিজের পা দুটি বেঁধেছিল ওই বন্ধুবন্ধনী দিয়ে। আর গলায় শক্ত করে পাক দিয়ে জড়িয়ে নিয়েছিল তুলসীর মালাটিকে—যেন খুলে পড়ে না যায়। থাক তার ওই পরিচয়—সে পরপার পর্যন্ত বহন করে নিয়ে যাবে।

সমুদ্র-জলতলে আত্মগোপনই তার ভাল। কিন্তু সে সমুদ্রতটবাসী শবরকন্ঠা। সাঁতার সে জানে। শৈশব থেকেই সমুদ্রের বৃকে ঝাঁপ দিয়ে সে খেলা করেছে। হয়তো ঝাঁপ দিয়ে পড়েও সে সাঁতার ঝেঁবে—পালিয়ে আসবে রক্তগর্ভ সমুদ্রতল থেকে বালুচরে। সমুদ্রগর্ভে বাতাস

নেই। তাই সে বেঁধেছিল তার পা দুটো। তারপর বসে বসেই কিনারায় এসে উঠে দাঁড়িয়ে কাঁপ খেয়েছিল।

ডুবেও ছিল। কিন্তু স্বাভাবিক নিয়মে খোলা হাত দুটো দিয়ে সঁতার কেটে উঠেছিল উপরে। কিন্তু বাঁধা পায়ের জন্তু আবার ডুবেছিল। আবার উঠেছিল। আবার ডুবেছিল। তারপর আর মনে নেই। জ্ঞান হারিয়েছিল সে।...

যখন চেতনা হয়েছিল, তখন সে একখানা বড় নৌকোর উপর। তার মাথার কাছে বসে এক গৈরিক বস্ত্রধারিণী সন্ন্যাসিনী।

সন্ন্যাসিনী তাকে প্রশ্ন করেছিলেন, স্নান বোধ করছ ?

অবাক হয়ে তাঁর শাস্ত প্রশ্ন মুখের দিকে সে তাকিয়েছিল এবং তাঁকে সে চিনতেও পেরেছিল। মাদ্রাজে পার্থসারথির মন্দিরে সে তাঁকে দেখেছে। দরিদ্রদের দান করেছিলেন। চাল দিয়েছিলেন। সাধারণ মুষ্টিভিক্ষা নয়। এক-একজনকে একদিনের আহারের উপযোগী চাল। তারপরও তাঁকে সে দেখেছে; দেখেছে তাঁকে রত্ননাথনের গানের আসরে। চোখ বন্ধ করে গান শুনছিলেন। শুনেছিল—কত্য়ামারীর সন্ন্যাসিনী তিনি। গিয়েছিলেন নাকি জগন্নাথদাম, মহাপ্রভু দর্শন করতে। সেখান থেকেই ফিরেছেন। পথে মাদ্রাজে নেমেছিলেন আহাৰ্য জল সংগ্রহের জন্তু, এবং তার সঙ্গে দেবতা দর্শনও করেছেন।

তিনি আবার প্রশ্ন করেছিলেন, তোমার পা এমন করে বাঁধা কেন? তুমি নিজেকে বেঁধেছিলে ?

সে একটা দীর্ঘনিঃশ্বাস কেলে চোখ বন্ধ করেছিল, চোখের পাতার চাপে জল গড়িয়ে পড়েছিল গুণ্ডদেশ বেয়ে। কথা বলতে পারে নি। ঘাড় নেড়ে জানিয়েছিল, ইয়া।

—তা হলে মরবার জন্তুই এমন করে কাঁপ খেয়েছিলে ?

সে চুপ করে চোখ বুজ দিয়েছিল। শুধু অশ্রুই পড়েছিল গড়িয়ে গড়িয়ে।

—কেন ? মরতে চাও কেন ?

সে ফুঁপিয়ে ফুঁপিয়ে কেঁদেছিল। কথা বলতে পারে নি।

—আচ্ছা থাক। বলতে হবে না। তিনি আর তাঁকে প্রশ্ন করেন নি। জানতে চেয়েছিলেন পরিচয়। সে বলেছিল, সে অনাথা। মা বাপ ভাই কেউ নেই।

—স্বামী ?

আবার কাঁদতে শুরু করেছিল সে।

তিনি তখন তাকে আর প্রশ্ন করেন নি।

পরে স্নান হলে সে বীরে বীরে সবই বলেছিল মাতাজীকে। শুধু রত্ননাথনের নাম করে নি। বলেছিল—এক ব্রাহ্মণ তাকে সমুদ্রতটে সমুদ্রকে সাক্ষী করে বিবাহ করেছিল। সাক্ষী তার এই তুলসীর মালা। কিন্তু—

আর বলতে পারে নি ললা।

মাতাজী তাকে প্রশ্ন করেছিলেন, তার পর ?

সে একটু ঘুরিয়ে বলেছিল, তারপর যে তিনি কোথায় চলে গেলেন!—একটা গভীর দীর্ঘনিঃশ্বাস কেলে বলেছিল, আর সন্ধান জানি না। হয়তো তাঁর সমাজ—

মাতাজী তার মাথার হাত বুলায়ে বলেছিলেন, সমাজ নিষ্ঠুর। শাস্ত্রও নিষ্ঠুর। মাহুষের হৃদয়কে সে পাথর চাপিয়ে পিষ্ট করে দেয়। কুটিল তাদের চক্রান্ত। স্বাধী হুঁসী চক্রান্ত করে এমন ভাবেই এক কুমারীর তপস্যা ব্যর্থ করে দিয়েছিলেন কল্যাণী।

লল্লা তাঁকে তার লল্লা নাম বলে নি—বলেছিল তার নাম কল্যাণী।

মাতাজী বলেছিলেন, তিনি আজও কুমারী অবস্থাতেই স্বামীর তপস্যা করছেন—অথচ তিনি কে জান ? তিনি আত্মশক্তি। স্বয়ং পার্বতী। কঙ্কাকুমারী তীর্থের নাম শুনেছ ?

যাড় নেড়ে লল্লা তাঁকে জানিয়েছিল, ই্যা—জানে।

—সেই কঙ্কাকুমারীতে আমি থাকি। আমিও তাঁর পূজা করি। আমিও কুমারী। বাণ অম্বরকে বধ করিতে দেবী পার্বতী কুমারীকঙ্কার রূপে আবির্ভূতা হয়েছিলেন। অম্বরকে বধ করে তিনি কামনা করলেন পশুপতিনাথ-মহেশ্বরকে। তিনি বিবাহ করলেন, তপস্যা করতে লাগলেন। তপস্যায় তুষ্ট হয়ে দেবতার। এসে বিবাহের লগ্ন স্থির করে গেলেন। এই লগ্নে বিবাহ হবে। দেবী সেদিন বিবাহের সজ্জায় সেজে বরমালা হাতে নিয়ে সজ্জিত মণ্ডপে বসে রইলেন। ওদিকে দেবতার। মহেশ্বরকে নিয়ে মর্ত্যলোকে যাত্রা করে এলেন। কিন্তু মহর্ষি দুর্বাশা চাইলেন না এ বিবাহ। সেও এই প্রসন্ন। দেবী পার্বতী হিমাচলভূমিত। উত্তরাবর্তের গৌরী তপ্তকাক্ষসবর্ণা। আর এ দক্ষিণের নীলগিরি-ভূমিত। শ্যামাঙ্গিনী। দুর্বাশা চক্রান্ত করে বিবাহলগ্ন ভ্রষ্ট করে দিলেন। বিবাহ আর হল না। শিব আজও কঙ্কাকুমারী মন্দিরের কিছুদূরে প্রতীক্ষা করে রয়েছেন। কিন্তু সে লগ্ন আজও ফিরে আসে নি। অনন্তকাল কুমারীকঙ্কা তার মালাগানি হাতে সেই তপস্যাই করে চলেছেন।

আমি তাঁরই সেবিকা। ছোট আশ্রম আছে। আমার যিনি কাম্য তিনি পৃথিবীতে নেই। পরপারে তাঁর সঙ্গে মিলব। তিনি মহেশ্বরে লীন হয়েছেন। চল, তুমি আমার সঙ্গে চল। সেখানে থাকবে। পার তো তপস্যা করবে। যাবে ?

আর যদি ফিরে আসতে চাও মাস্তাজ তবে মাস্তাজগামী নৌকোতে তোমাকে ফিরে পাঠিয়ে দেব।

লল্লার চিত্ত ভরে উঠেছিল। সে তপস্যাই বেছে নিয়েছিল।

আর সে লল্লা নয়—লল্লা মরে গেছে সমুদ্রের জলে ; যে বেঁচে আছে সে তপস্বিনী কল্যাণী।

* * * *

সে শবরী। দূর থেকে সে দর্শন করেছে কঙ্কাকুমারীর অপূর্ব লাবণ্যগরী সর্বালঙ্কারভূষিত। বিবাহের কঙ্কাবেশিনী অপূর্ব মূর্তি। মুগ্ধ হয়ে গেছে। তার সব সন্তাপ যেন মুছে গেছে।

সে মাতাজীর আশ্রমে থাকে। আশ্রমের কাজ করে। গাভীর সেবা করে। বাগানের গাছের পরিচর্যা করে।

মাতাজী বলেন—তুমি আর শবরী নও কল্যাণী, তুমি ব্রাহ্মণী। তোমার ব্রাহ্মণ প্রিয়তমের মালা তোমার কণ্ঠে, আচারে-আচরণে পবিত্র। কেন, দূরে থাক কেন ?

লল্লা হাসে। সবিনয়ে বলে—মাতাজী, আপনার করুণাই আমার শ্রেষ্ঠ সম্পদ, ওই আমার ব্রাহ্মণ্য। ওতে আর আমার প্রলোভন নেই। মাল্লুষকে আমি চাই না মাতাজী—আমি চাই ভগবানকে।

মাতাজী তাকে বলছিলেন—তুমি তীর্থদর্শন কর কল্যাণী। নিশ্চয় তুমি ভগবানের দর্শ্য পাবে। তুমি পরিপূর্ণা হয়ে যাবে।

লল্লা প্রথমই এসেছে দোলযাত্রার পুরী। নীলমাধব দর্শনে। বরদরাজ ও নীলমাধব ভেদ নেই।

দোলযাত্রায় নীলমাধবকে দর্শন করে তাঁর বসন্তোৎসবের আত্মীয় কুমকুম প্রসাদ নিয়ে ধস্ত হয়েছেন। জীবনে মাল্লুষ রক্তনাথনের শূন্যস্থান তিনি পূর্ণ করে বসেছেন। তারপর আজ এসেছে

সে ভুবনেশ্বরে দর্শনে ।

এসে দূর থেকে বিন্দু সরোবর প্রান্তে ওই পুষ্পিত মাধবীলতার তলায় রজনাতনকে দেখে প্রথমটা অবশ পঙ্ক হয়ে গিয়েছিল । তারপর আত্মসম্বরণ করে ধীরে ধীরে এগিয়ে এসে দাঁড়িয়েছে । তপস্বীকে সে আজ পরিপূর্ণ করবে । রজনাতনের সম্মুখে হৃদয়ের দ্বারখানি বন্ধ করে দিয়ে বিদায় নিয়ে বলবে—তোমাকে নীলমাধবরূপে পেয়েছি হৃদয়ে । আর তো স্থান নেই ।

সেই কথা বলতেই সে এসে নতজান্ন হয়ে বসে প্রণাম করে বললে—প্রভু, সন্ন্যাসিনী লল্লাকে অচেতন অবস্থায় সমুদ্র থেকে তুললেও সে বাঁচে নি । সে মরে গেছে । আমি লল্লা নই, আমি কল্যাণী । তবে লল্লা মরবার সময় এইটি আমার কাছে গচ্ছিত রেখে গেছে । লল্লার প্রিয়তম আপনি । আপনাকে দিতে বলে গেছে ।

রলে গলার মালাগাছি খুলে তাঁর পায়ের তলায় রেখে প্রণাম করলে ।

রজনাতন জড়িত কণ্ঠে আর একবার বললেন—লল্লা !

—আমি কল্যাণী । আমি আসি প্রভু ।

লল্লা চলে যাচ্ছে । মালাগাছি পড়ে রয়েছে । তিনি স্বাগ্র মত বসেই রইলেন ।

চোখ বন্ধ হয়ে গেল তাঁর । বোধ হয় আপনা থেকেই । চোখের ভিতর জল ছলছল করছে । রজনাতন আতঁকণ্ঠে ডাকলেন, কল্যাণী !

সে আহ্বানে না দাঁড়িয়ে পারল না সন্ন্যাসিনী ।

রজনাতন প্রশ্ন করলেন—চোখ থেকে তখন অশ্রুধারা উল্লাত হচ্ছে—আতঁস্বরেই বললেন—পৃথিবীর কি সবই মিথ্যা ? সন্ন্যাসিনী সহসা প্রশ্নের উত্তর দিতে পারলে না । আকাশের দিকে তাকিয়ে উত্তর খুঁজে নিয়েই বললেন—না প্রভু, সবই সত্য । বৃক্ষশাখার বুস্তুে পুষ্পকলিও সত্য—বিকশিতদল পুষ্পও সত্য । আবার বিগলিতদল ফুলও সত্য । এবার আসি । সব সত্য ।

চোখ বন্ধ করেই বসে রইলেন রজনাতন । চোখ খুলতে সাহস হল না । শুধু আঙ্গুলগুলি চলছে বীণার তারের উপর । পদস্বৰ কি মিলিয়ে যাচ্ছে ?

হঠাৎ মনে হল—এ কি, কি বাজাচ্ছেন তিনি ?

ক্ষীণ একটি হাস্যরেখা ফুটে উঠল তাঁর ওষ্ঠপ্রান্তে ।

এ তো বসন্ত রাগ !

মিথ্যা কথা । জীবনে বসন্ত রাগ একবার আসে । তারপর সে চিরদিনের মত মিথ্যা হয়ে যায় । শুধু রেশ—না, রেশও থাকে না, থাকে স্মৃতি । লল্লা মিথ্যা হয়ে গেছে—সত্য হয়ে উঠেছে কল্যাণী । না, সেও না । সত্য এক তপস্বিনী । তাকে দেখে স্মৃতিবিভ্রমে বসন্ত রাগ বেজে উঠেছে আঙুলে । বাজুক । চোখ বুজে বাজাতে লাগলেন । হঠাৎ কানে গেল—প্রভু !

চোখ মেললেন রজনাতন । দেখলেন লল্লা ফিরে এসে দাঁড়িয়ে আছে । মুখের দিকে তাকালেন রজনাতন । বীণায় বসন্ত রাগ বেজে চলেছে । থামবার উপায় নেই । লল্লা বললে—মালাগাছি—ও গাছি আমি ফিরে চাচ্ছি প্রভু । লল্লা মরেছে—তার আত্মা ফিরে চাচ্ছে । ওতেই সে বাঁধা আছে প্রভু ।

বলে মালাগাছি সে তুলে নিয়ে চলে গেল । বসন্ত রাগ অকস্মাৎ যেন বীণার তারে জীবন্ত অবস্থায় বাজতে লাগল ।